

1 Samuel

Hannā Allāh se Bachchā Māngtī Hai

¹ Ifrāīm ke pahārī ilāqe ke shahr Rāmātāym-sofīm yānī Rāmā meñ ek Ifrāīmī rahtā thā jis kā nām Ilqānā bin Yarohām bin Ilīhū bin Tūkhū bin Sūf thā.

² Ilqānā kī do bīwiyān thīñ. Ek kā nām Hannā thā aur dūsri kā Faninnā. Faninnā ke bachche the, lekin Hannā beaulād thī.

³ Ilqānā har sāl apne qhāndān samet safr karke Sailā ke maqdis ke pās jātā tāki wahān Rabbul-afwāj ke huzūr qurbānī guzarāne aur us kī parastish kare. Un dinoñ meñ Elī Imām ke do beṭe Hufnī aur Fīnhās Sailā meñ imām kī qhidmat anjām dete the.

⁴ Har sāl Ilqānā apnī qurbānī pesh karne ke bād qurbānī ke gosht ke ṭukre Faninnā aur us ke beṭe-beṭiyōñ meñ taqsīm kartā.

⁵ Hannā ko bhī gosht miltā, lekin jahān dūsroñ ko ek hissā miltā wahān use do hisse milte the. Kyōñki Ilqānā us se bahut muhabbat rakhtā thā, agarche ab tak Rab kī marzī nahīn thī ki Hannā ke bachche paidā hoñ.

⁶ Faninnā kī Hannā se dushmanī thī, is lie wuh har sāl Hannā ke bāñhpan kā mazāq urā kar use tang kartī thī.

⁷ Sāl basāl aisā hī huā kartā thā. Jab bhī wuh Rab ke maqdis ke pās jāte to Faninnā Hannā ko itnā tang kartī ki wuh us kī bāteñ sun sun kar ro partī aur khā-pī na saktī.

⁸ Phir Ilqānā pūchhtā, “Hannā, tū kyon ro rahī hai? Tū khānā kyon nahīn khā rahī? Udās hone kī kyā zarūrat? Main to hūn. Kyā yih das beṭon se kahīn behtar nahīn?”

⁹ Ek din jab wuh Sailā meñ the to Hannā khāne-pīne ke bād duā karne ke lie uṭhī. Elī Imām Rab ke maqdis ke darwāze ke pās kursī par baiṭhā thā.

¹⁰ Hannā shadīd pareshānī ke ālam meñ phūṭ phūṭ kar rone lagī. Rab se duā karte karte

¹¹ us ne qasam khāī, “Ai Rabbul-afwāj, merī burī hālat par nazar dāl kar mujhe yād kar! Apnī khādīmā ko mat bhūlnā balki beṭā atā farmā! Agar tū aisā kare to main use tujhe wāpas kar dūngī. Ai Rab, us kī pūrī zindagī tere lie maḥsūs hogī! Is kā nishān yih hogā ki us ke bāl kabhī nahīn kaṭwāe jāeñge.”

¹² Hannā baṛī der tak yon duā kartī rahī. Elī us ke muñh par ghaur karne lagā

¹³ to dekhā ki Hannā ke hoñt to hil rahe haiñ lekin āwāz sunāī nahīn de rahī, kyonki Hannā dil hī dil meñ duā kar rahī thī. Lekin Elī ko aisā lag rahā thā ki wuh nashe meñ dhut hai,

¹⁴ is lie us ne use jhīrakte hue kahā, “Tū kab tak nashe meñ dhut rahegī? Mai pīne se bāz ā!”

¹⁵ Hannā ne jawāb diyā, “Mere āqā, aisī koī bāt nahīn hai. Main ne na mai, na koī aur nashā-āwar chīz chakhī hai. Bāt yih hai ki main baṛī ranjīdā hūn, is lie Rab ke huzūr apne dil kī āh-o-zārī unḍel dī hai. *

* **1:15** Lafzī tarjumā: apnī jān unḍel dī hai.

16 Yih na samjheñ ki maiñ nikammī aurat hūñ, balki maiñ baṛe ḡham aur aziyat meñ duā kar rahī thī.”

17 Yih sun kar Elī ne jawāb diyā, “Salāmatī se apne ghar chalī jā! Isrāīl kā Ḳhudā terī darḡhāst pūrī kare.”

18 Hannā ne kahā, “Apnī ḡhādīmā par āp kī nazar-e-karm ho.” Phir us ne jā kar kuchh khāyā, aur us kā chehrā udās na rahā.

Samuel kī Paidāish aur Bachpan

19 Agle din pūrā ḡhāndān subah-sawere uṡhā. Unhoñ ne maḡdis meñ jā kar Rab kī parastish kī, phir Rāmā wāpas chale gae jahān un kā ghar thā. Aur Rab ne Hannā ko yād karke us kī duā sunī.

20 Ilḡānā aur Hannā ke beṡā paidā huā. Hannā ne us kā nām Samuel yānī ‘Us kā Nām Allāh Hai’ rakhā, kyoñki us ne kahā, “Maiñ ne use Rab se māngā.”

21 Agle sāl Ilḡānā ḡhāndān ke sāth māmūl ke mutābiḡ Sailā gayā tāki Rab ko sālānā ḡurbānī pesh kare aur apnī mannat pūrī kare.

22 Lekin Hannā na gaī. Us ne apne shauhar se kahā, “Jab bachchā dūdh pīnā chhoṛ degā tab hī maiñ use le kar Rab ke huzūr pesh karūngī. Us waḡt se wuh hameshā wahīñ rahegā.”

23 Ilḡānā ne jawāb diyā, “Wuh kuchh kar jo tujhe munāsib lage. Bachche kā dūdh chhurāne tak yahāñ rah. Lekin Rab apnā kalām ḡāym rakhe.” Chunāñche Hannā bachche ke dūdh chhurāne tak ghar meñ rahī.

24 Jab Samuel ne dūdh pīnā chhoṛ diyā to Hannā use Sailā meñ Rab ke maḡdis ke pās le

gai, go bachchā abhī chhoṭā thā. Qurbāniyon ke lie us ke pās tīn bail, maide ke taqriban 16 kilogrām aur mai kī mashk thī.

²⁵ Bail ko qurbāngāh par chaṛhāne ke bād Ilqānā aur Hannā bachche ko Elī ke pās le gae.

²⁶ Hannā ne kahā, “Mere āqā, āp kī hayāt kī qasam, main wuhī aurat hūn jo kuchh sāl pahle yahān āp kī maujūdagī meñ kharī duā kar rahī thī.

²⁷ Us waqt main ne iltamās kī thī ki Rab mujhe beṭā atā kare, aur Rab ne merī sunī hai.

²⁸ Chunānche ab main apnā wādā pūrā karke beṭe ko Rab ko wāpas kar detī hūn. Umr-bhar wuh Rab ke lie maḥsūs hogā.” Tab us ne Rab ke huzūr sijdā kiyā.

2

Hannā kā Gīt

¹ Wahān Hannā ne yih gīt gāyā,

“Merā dil Rab kī ḡhushī manātā hai, kyonki us ne mujhe quwwat atā kī hai. Merā muñh dilerī se apne dushmanon ke ḡhilāf bāt kartā hai, kyonki main terī najāt ke bāis bāḡh bāḡh hūn.

² Rab jaisā quddūs koī nahīn hai, tere siwā koī nahīn hai. Hamāre Ḡhudā jaisī koī chaṭṭān nahīn hai.

³ Dīngeñ mārne se bāz āo! Gustāḡh bāteñ mat bako! Kyonki Rab aisā Ḡhudā hai jo sab kuchh jāntā hai, wuh tamām āmāl ko tol kar parakhtā hai.

⁴ Ab baṛon kī kamāneñ tūt gai haiñ jabki girne wāle quwwat se kamarbastā ho gae haiñ.

⁵ Jo pahle ser the wuh roṭī milne ke lie mazdūrī karte haiñ jabki jo pahle bhūke the wuh ser ho gae haiñ. Beulād aurat ke sāt bachche paidā hue haiñ jabki wāfir bachchoñ kī māñ murjhā rahī hai.

⁶ Rab ek ko marne detā aur dūsre ko zindā hone detā hai. Wuh ek ko Pātāl meñ utarne detā aur dūsre ko wahāñ se nikal āne detā hai.

⁷ Rab hī ḡharīb aur amīr banā detā hai, wuhī past kartā aur wuhī sarfarāz kartā hai.

⁸ Wuh khāk meñ dabe ādmī ko kharā kartā hai aur rākh meñ leṭe zarūratmand ko sarfarāz kartā hai, phir unheñ ra'isoñ ke sāth izzat kī kursī par biṭhā detā hai. Kyoñki duniyā kī buniyādeñ Rab kī haiñ, aur usī ne un par zamīn rakhī hai.

⁹ Wuh apne wafādār pairokāroñ ke pāñw mahfūz rakhegā jabki sharīr tārikī meñ chup ho jāenge. Kyoñki insān apnī tāqat se kāmyāb nahīñ hotā.

¹⁰ Jo Rab se laṛne kī jurrat karen wuh pāsh pāsh ho jāenge. Rab āsmān se un ke khilāf garaj kar duniyā kī intahā tak sab kī adālat karegā. Wuh apne bādshāh ko taqwiyyat aur apne masah kie hue khādīm ko quwwat atā karegā.”

¹¹ Phir Ilqānā aur Hannā Rāmā meñ apne ghar wāpas chale gae. Lekin un kā beṭā Elī Imām ke pās rahā aur maqdis meñ Rab kī khidmat karne lagā.

Elī ke Beṭoñ kī Bedīn Zindagī

¹² Lekin Elī ke beṭe badmāsh the. Na wuh Rab ko jānte the,

¹³ na imām kī haisiyat se apne farāyẓ saḥīh taur par adā karte the. Kyoṅki jab bhī koī admī apnī qurbānī pesh karke rifāqatī khāne ke lie gosht ubāltā to Elī ke beṭe apne naukar ko wahān bhej dete. Yih naukar sihshākhā kāñṭā

¹⁴ deg meṅ ḍāl kar gosht kā har wuh ṭukrā apne mālikoṅ ke pās le jātā jo kāñṭe se lag jātā. Yihī un kā tamām Isrāīliyoṅ ke sāth sulūk thā jo Sailā meṅ qurbāniyān charḥāne āte the.

¹⁵ Na sirf yih balki kāī bār naukar us waqt bhī ā jātā jab jānwar kī charbī abhī qurbāngāh par jalānī hotī thī. Phir wuh taqāzā kartā, “Mujhe imām ke lie kachchā gosht de do! Use ublā gosht manzūr nahīn balki sirf kachchā gosht, kyoṅki wuh use bhūnanā chāhtā hai.”

¹⁶ Qurbānī pesh karne wālā etarāz kartā, “Pahle to Rab ke lie charbī jalānā hai, is ke bād hī jo jī chāhe le leṅ.” Phir naukar badtamīzī kartā, “Nahīn, use abhī de do, warnā maiṅ zabardastī le lūngā.”

¹⁷ In jawān imāmoṅ kā yih gunāh Rab kī nazar meṅ nihāyat sangīn thā, kyoṅki wuh Rab kī qurbāniyān haqīr jānte the.

Mān-bāp Samuel se Milne Āte Haiṅ

¹⁸ Lekin chhoṭā Samuel Rab ke huzūr kḥidmat kartā rahā. Use bhī dūsre imāmoṅ kī tarah katān kā bālāposh diyā gayā thā.

¹⁹ Har sāl jab us kī mān kḥāwind ke sāth qurbānī pesh karne ke lie Sailā ātī to wuh nayā choḡhā sī kar use de detī.

20 Aur rawānā hone se pahle Elī Samuel ke mān-bāp ko barkat de kar Ilqānā se kahtā, “Hannā ne Rab se bachchā māng liyā aur jab milā to use Rab ko wāpas kar diyā. Ab Rab āp ko is bachche kī jagah mazīd bachche de.” Is ke bād wuh apne ghar chale jāte.

21 Aur wāqāī, Rab ne Hannā ko mazīd tīn beṭe aur do beṭiyān atā kīn. Yih bachche ghar meñ rahe, lekin Samuel Rab ke huzūr ḳhidmat karte karte jawān ho gayā.

Elī ke Beṭe Bāp kī Nahīn Sunte

22 Elī us waqt bahut būṛhā ho chukā thā. Beṭoñ kā tamām Isrāīl ke sāth burā sulūk us ke kānoñ tak pahuñch gayā thā, balki yih bhī kī beṭe un auratoñ se nājāyz tālluqāt rakhte haiñ jo mulāqāt ke ḳhaimē ke darwāze par ḳhidmat kartī haiñ.

23 Us ne unheñ samjhāyā bhī thā, “Āp aisi harkateñ kyoñ kar rahe haiñ? Mujhe tamām logoñ se āp ke sharīr kāmoñ kī ḳhabreñ miltī rahtī haiñ.

24 Beṭo, aisā mat karnā! Jo bāteñ āp ke bāre meñ Rab kī qaum meñ phail gāī haiñ wuh achchhī nahīn.

25 Dekheñ, agar insān kisī dūsre insān kā gunāh kare to ho saktā hai Allāh donoñ kā darmiyānī ban kar qusūrwar shakhs par rahm kare. Lekin agar koī Rab kā gunāh kare to phir kaun us kā darmiyānī ban kar use bachhāegā?”

Lekin Elī ke beṭoñ ne bāp kī na sunī, kyoñki Rab kī marzī thī ki unheñ sazā-e-maut mil jāe.

26 Lekin Samuel un se farq thā. Jitnā wuh baṛā hotā gayā utnī us kī Rab aur insān ke sāmne qabūliyat baṛhtī gai.

Elī ke Gharāne ko Sazā Milne kī Peshgoī

27 Ek din ek nabī Elī ke pās āyā aur kahā, “Rab farmātā hai, ‘Kyā jab terā bāp Hārūn aur us kā gharānā Misr ke bādshāh ke ḡhulām the to main ne apne āp ko us par zāhir na kiyā?’

28 Go Isrāīl ke bārah qabīle the lekin main ne muqarrar kiyā ki usī ke gharāne ke mard mere imām ban kar qurbāngāh ke sāmne k̄hidmat karen, baḡhūr jalāen aur mere huzūr imām kā bālāposh pahnen. Sāth sāth main ne unhen qurbāngāh par jalne wālī qurbāniyon kā ek hissā milne kā haq de diyā.

29 To phir tum log zabah aur ḡhallā kī wuh qurbāniyān haqīr kyon jānte ho jo mujhe hī pesh kī jātī haiñ aur jo main ne apnī sukūnatgāh ke lie muqarrar kī thīñ? Elī, tū apne beṭon kā mujh se zyādā ehtirām kartā hai. Tum to merī qaum Isrāīl kī har qurbānī ke behtarīn hisse khā khā kar moṭe ho gae ho.’

30 Chunānche Rab jo Isrāīl kā K̄hudā hai farmātā hai, wādā to main ne kiyā thā ki Lāwī ke qabīle kā terā gharānā hameshā hī imām kī k̄hidmat saranjām degā. Lekin ab main elān kartā hūñ ki aisā kabhī nahīñ hogā! Kyonki jo merā ehtirām karte haiñ un kā main ehtirām karūnga, lekin jo mujhe haqīr jānte haiñ unhen haqīr jānā jāegā.

31 Is lie sun! Aise din ā rahe haiñ jab main terī aur tere gharāne kī tāqat yoñ toṛ dālūngā ki ghar kā koī bhī buzurg nahīn pāyā jāegā.

32 Aur tū maqdis meñ musibat dekhegā hālāñki main Isrāīl ke sāth bhalāi kartā rahūngā. Tere ghar meñ kabhī bhī buzurg nahīn pāyā jāegā.

33 Main tum meñ se har ek ko to apnī k̄hidmat se nikāl kar halāk nahīn karūngā jab terī āñkheñ dhundlī-sī paṛ jāeñgī aur terī jān halkān ho jāegī. Lekin terī tamām aulād ghairtabaī maut maregī.

34 Tere beṭe Hufnī aur Fīnhās donoñ ek hī din halāk ho jāeñge. Is nishān se tujhe yaqīn āegā ki jo kuchh main ne farmāyā hai wuh sach hai.

35 Tab main apne lie ek imām kharā karūngā jo wafādār rahegā. Jo bhī merā dil aur merī jān chāhegī wuhī wuh karegā. Main us ke ghar kī mazbūt buniyādeñ rakhūngā, aur wuh hameshā tak mere masah kie hue k̄hādīm ke huzūr ātā jātā rahegā.

36 Us waqt tere ghar ke bache hue tamām afrād us imām ke sāmne jhuk jāeñge aur paise aur roṭī māñg kar iltamās kareñge, mujhe imām kī koī na koī zimmedārī deñ tāki roṭī kā ṭukṛā mil jāe.’”

3

Allāh Samuel se Hamkalām Hotā Hai

1 Chhoṭā Samuel Elī ke zer-e-nigarānī Rab ke huzūr k̄hidmat kartā thā. Un dinon meñ Rab kī taraf se bahut kam paighām yā royāeñ miltī thiñ.

² Ek rāt Elī jis kī ānkheñ itnī kamzor ho gaī thīn ki deḡhnā taqrīban nāmumkin thā māmūl ke mutābiq so gayā thā.

³ Samuel bhī leṭ gayā thā. Wuh Rab ke maqdis meñ so rahā thā jahān ahd kā sandūq parā thā. Shamādān ab tak Rab ke huzūr jal rahā thā

⁴⁻⁵ ki achānak Rab ne āwāz dī, “Samuel!” Samuel ne jawāb diyā, “Jī, maiñ abhī atā hūn.” Wuh bhāg kar Elī ke pās gayā aur kahā, “Jī janāb, maiñ hāzir hūn. Āp ne mujhe bulāyā?” Elī bolā, “Nahīn, maiñ ne tumheñ nahīn bulāyā. Wāpas jā kar dubārā leṭ jāo.” Chunānche Samuel dubārā leṭ gayā.

⁶ Lekin Rab ne ek bār phir āwāz dī, “Samuel!” Laṛkā dubārā uṭhā aur Elī ke pās jā kar bolā, “Jī janāb, maiñ hāzir hūn. Āp ne mujhe bulāyā?” Elī ne jawāb diyā, “Nahīn beṭā, maiñ ne tumheñ nahīn bulāyā. Dubārā so jāo.”

⁷ Us waqt Samuel Rab kī āwāz nahīn pahchān saktā thā, kyonki abhī use Rab kā koī paiḡhām nahīn milā thā.

⁸ Chunānche Rab ne tīsri bār āwāz dī, “Samuel!” Ek aur martabā Samuel uṭh kharā huā aur Elī ke pās jā kar bolā, “Jī janāb, maiñ hāzir hūn. Āp ne mujhe bulāyā?” Yih sun kar Elī ne jān liyā ki Rab Samuel se hamkalām ho rahā hai.

⁹ Is lie us ne laṛke ko batāyā, “Ab dubārā leṭ jāo, lekin aglī dafā jab āwāz sunāī de to tumheñ kahñā hai, ‘Ai Rab, farmā. Terā ḡhādim sun rahā hai.’”

Samuel ek bār phir apne bistar par leṭ gayā.

10 Rab ā kar wahān kharā huā aur pahle kī tarah pukārā, “Samuel! Samuel!” Laṛke ne jawāb diyā, “Ai Rab, farmā. Terā ḳhādīm sun rahā hai.”

11 Phir Rab Samuel se hamkalām huā, “Dekh, main Isrāil meñ itnā haulnāk kām karūṅga ki jise bhī is kī ḳhabar milegī us ke kān bajne lageṅge.

12 Us waqt main shurū se le kar āḳhir tak wuh tamām bāteñ pūrī karūṅga jo main ne Elī aur us ke gharāne ke bāre meñ kī haiñ.

13 Main Elī ko āgāh kar chukā hūn ki us kā gharānā hameshā tak merī adālat kā nishānā banā rahegā. Kyonki go use sāf mālūm thā ki us ke beṭe apnī ḡhalat harkatoñ se merā ḡhazab apne āp par lāeṅge to bhī us ne unheñ karne diyā aur na rokā.

14 Main ne qasam khāi hai ki Elī ke gharāne kā qusūr na zabāh aur na ḡhallā kī kisī qurbānī se dūr kiyā jā saktā hai balki is kā kaffārā kabhī bhī nahīn diyā jā sakegā!”

15 Is ke bād Samuel subah tak apne bistar par leṭā rahā. Phir wuh māmūl ke mutābiq uṭhā aur Rab ke ghar ke darwāze khol die. Wuh Elī ko apnī royā batāne se ḍartā thā,

16 lekin Elī ne use bulā kar kahā, “Samuel, mere beṭe!” Samuel ne jawāb diyā, “Jī, main hāzir hūn.”

17 Elī ne pūchhā, “Rab ne tumheñ kyā batāyā hai? Koī bhī bāt mujh se mat chhupānā! Allāh tumheñ saḳht sazā de agar tum ek lafz bhī mujh se poshīdā rakho.”

18 Phir Samuel ne use khul kar sab kuchh batā

diyā aur ek bāt bhī na chhupāī. Elī ne kahā, “Wuhī Rab hai. Jo kuchh us kī nazar meñ thīk hai use wuh kare.”

¹⁹ Samuel jawān hotā gayā, aur Rab us ke sāth thā. Us ne Samuel kī har bāt pūrī hone dī.

²⁰ Pūre Isrāīl ne Dān se le kar Bair-sabā tak jān liyā ki Rab ne apne nabī Samuel kī tasdīq kī hai.

²¹ Agle sālon meñ bhī Rab Sailā meñ apne kalām se Samuel par zāhir hotā rahā.

4

¹ Yoñ Samuel kā kalām Sailā se nikal kar pūre Isrāīl meñ phail gayā.

Filistī Ahd kā Sandūq Chhīn Lete Haiñ

Ek din Isrāīl kī Filistiyon ke sāth jang chhīr gaī. Isrāīliyon ne larne ke lie nikal kar Aban-azar ke pās apnī lashkargāh lagāī jabki Filistiyon ne Afīq ke pās apne dera dāle.

² Pahle Filistiyon ne Isrāīliyon par hamlā kiyā. Larṭe larṭe unhoñ ne Isrāīl ko shikast dī. Taqriban 4,000 Isrāīlī maidān-e-jang meñ halāk hue.

³ Fauj lashkargāh meñ wāpas āī to Isrāīl ke buzurg sochne lage, “Rab ne Filistiyon ko ham par kyon fatah pāne dī? Āo, ham Rab ke ahd kā sandūq Sailā se le āen tāki wuh hamāre sāth chal kar hameñ dushman se bachāe.”

⁴ Chunāñche ahd kā sandūq jis ke ūpar Rabbul-afwāj karūbī farishton ke darmiyān takhtnashīn hai Sailā se lāyā gayā. Elī ke do beṭe Hufnī aur Fīnhās bhī sāth āe.

⁵ Jab ahd kā sandūq lashkargāh meñ pahuñchā to Isrāīlī nihāyat khush ho kar buland āwāz se

nāre lagāne lage. Itnā shor mach gayā ki zamīn hil gāi.

⁶ Yih sun kar Filistī chaunk uṭhe aur ek dūsre se pūchhne lage, “Yih kaisā shor hai jo Isrāīlī lashkargāh meñ ho rahā hai?” Jab patā chalā ki Rab ke ahd kā sandūq Isrāīlī lashkargāh meñ ā gayā hai

⁷ to wuh ghabrā kar chillāe, “Un kā dewatā un kī lashkargāh meñ ā gayā hai. Hāy, hamārā satyānās ho gayā hai! Pahle to aisā kabhī nahīn huā hai.

⁸ Ham par afsos! Kaun hamēñ in tāqatwar dewatāoñ se bachāegā? Kyoñki inhīn ne registān meñ Misriyoñ ko har qism kī balā se mār kar halāk kar diyā thā.

⁹ Bhāiyo, ab diler ho aur mardānagī dikhāo, warnā ham usī tarah Ibrāniyoñ ke ghulām ban jāenge jaise wuh ab tak hamāre ghulām the. Mardānagī dikhā kar laṛo!”

¹⁰ Apas meñ aisī bāteñ karte karte Filistī laṛne ke lie nikle aur Isrāīl ko shikast dī. Har taraf qatl-e-ām nazar āyā, aur 30,000 piyāde Isrāīlī kām āe. Bāqī sab farār ho kar apne apne gharoñ meñ chhup gae.

¹¹ Elī ke do bete Hufnī aur Fīnhās bhī usī din halāk hue, aur Allāh ke ahd kā sandūq Filistiyōñ ke qabze meñ ā gayā.

Elī kī Maut

¹² Usī din Binyamīn ke qabile kā ek admī maidān-e-jang se bhāg kar Sailā pahuñch gayā. Us ke kapṛe phaṭe hue the aur sar par khāk thī.

¹³⁻¹⁵ Elī saṛak ke kināre apnī kursī par baiṭhā thā. Wuh ab andhā ho chukā thā, kyoñki us kī

umr 98 sāl thī. Wuh baṛī bechainī se rāste par dhyān de rahā thā tāki jang kī koī tāzā khabar mil jāe, kyonki use is bāt kī baṛī fikr thī ki Allāh kā sandūq lashkargāh meñ hai.

Jab wuh ādmī shahr meñ dākḥil huā aur logoñ ko sārā mājarā sunāyā to pūrā shahr chillāne lagā. Jab Elī ne shor sunā to us ne pūchhā, “Yih kyā shor hai?” Binyamīnī dauṛ kar Elī ke pās āyā aur bolā,

¹⁶ “Main maidān-e-jang se āyā hūn. Āj hī main wahān se farār huā.” Elī ne pūchhā, “Beṭā, kyā huā?”

¹⁷ Qāsīd ne jawāb diyā, “Isrāīlī Filistiyon ke sāmne farār hue. Fauj ko har taraf shikast mānanī paṛī, aur āp ke donoñ beṭe Hufnī aur Fīnhās bhī māre gae haiñ. Afsos, Allāh kā sandūq bhī dushman ke qabze meñ ā gayā hai.”

¹⁸ Ahd ke sandūq kā zikr sunte hī Elī apnī kursī par se pīchhe kī taraf gir gayā. Chūnki wuh būṛhā aur bhārī-bharkam thā is lie us kī gardan ṭuṭ gaī aur wuh wahīn maqdis ke darwāze ke pās hī mar gayā. Wuh 40 sāl Isrāīl kā qāzī rahā thā.

Fīnhās kī Bewā kī Maut

¹⁹ Us waqt Elī kī bahū yānī Fīnhās kī bīwī kā pañw bhārī thā aur bachchā paidā hone wālā thā. Jab us ne sunā ki Allāh kā sandūq dushman ke hāth meñ ā gayā hai aur ki susar aur shauhar donoñ mar gae haiñ to use itnā saḥt sadmā pahuñchā ki wuh shadīd dard-e-zah meñ muṭtalā ho gaī. Wuh jhuk gaī, aur bachchā paidā huā.

²⁰ Us kī jān nikalne lagī to dāiyon ne us kī hauslā-afzāī karke kahā, “Ḍaro mat! Tumhāre

beṭā paidā huā hai.” Lekin mān ne na jawāb diyā, na bāt par dhyān diyā.

²¹⁻²² Kyoṅki wuh Allāh ke sandūq ke chhin jāne aur susar aur shauhar kī maut ke bāis nihāyat bedil ho gaī thī. Us ne kahā, “Beṭe kā nām Yakabod yānī ‘Jalāl Kahān Rahā’ hai, kyoṅki Allāh ke sandūq ke chhin jāne se Allāh kā jalāl Isrāil se jātā rahā hai.”

5

Filistiyon meñ Ahd kā Sandūq

¹ Filistī Allāh kā sandūq Aban-azar se Ashdūd Shahr meñ le gae.

² Wahān unhoñ ne use apne dewatā Dajūn ke mandir meñ but ke qarīb rakh diyā.

³ Agle din subah-sawere jab Ashdūd ke bāshinde mandir meñ dākḥil hue to kyā dekhte haiñ ki Dajūn kā mujassamā muñh ke bal Rab ke sandūq ke sāmne hī paṛā hai. Unhoñ ne Dajūn ko uṭhā kar dubārā us kī jagah par khaṛā kiyā.

⁴ Lekin agle din jab subah-sawere āe to Dajūn dubārā muñh ke bal Rab ke sandūq ke sāmne paṛā huā thā. Lekin is martabā but kā sar aur hāth ṭuṭ kar dahlīz par paṛe the. Sirf dhaṛ rah gayā thā.

⁵ Yihī wajah hai ki āj tak Dajūn kā koī bhī pujārī yā mehmān Ashdūd ke mandir kī dahlīz par qadam nahīn rakhtā.

⁶ Phir Rab ne Ashdūd aur gird-o-nawāh ke dehātoñ par saḥt dabāw ḍāl kar bāshindoñ ko pareshān kar diyā. Un meñ achānak aziyatnāk phoṛoñ kī wabā phail gaī.

7 Jab Ashdūd ke logoñ ne is kī wajah jān lī to wuh bole, “Lāzim hai ki Isrāīl ke Ḳhudā kā sandūq hamāre pās na rahe. Kyoñki us kā ham par aur hamāre dewatā Dajūn par dabāw nāqābil-e-bardāsht hai.”

8 Unhoñ ne tamām Filistī hukmrānoñ ko ikatṭhā karke pūchhā, “Ham Isrāīl ke Ḳhudā ke sandūq ke sāth kyā karen?”

Unhoñ ne mashwarā diyā, “Use Jāt Shahr meñ le jāen.”

9 Lekin jab ahd kā sandūq Jāt meñ chhoṛā gayā to Rab kā dabāw us shahr par bhī ā gayā. Baṛī afrā-tafrī paidā huī, kyoñki chhoṛoñ se le kar baṛoñ tak sab ko aziyatnāk phoṛe nikal āe.

10 Tab unhoñ ne ahd kā sandūq āge Aqrūn bhej diyā.

Lekin sandūq abhī pahuñchne wālā thā ki Aqrūn ke bāshinde chīkhne lage, “Wuh Isrāīl ke Ḳhudā kā sandūq hamāre pās lāe haiñ tāki hameñ halāk kar deñ!”

11 Tamām Filistī hukmrānoñ ko dubārā bulāyā gayā, aur aqrūniyoñ ne taqāzā kiyā ki sandūq ko shahr se dūr kiyā jāe. Wuh bole, “Ise wahāñ wāpas bhejā jāe jahāñ se āyā hai, warnā yih hameñ balki pūrī qaum ko halāk kar dālegā.” Kyoñki shahr par Rab kā saḡht dabāw hāwī ho gayā thā. Mohlak wabā ke bāis us meñ ḡhauf-o-hirās kī lahar dauṛ gaī.

12 Jo marne se bachā use kam az kam phoṛe nikal āe. Chāroñ taraf logoñ kī chīkh-pukār fizā meñ buland huī.

6

Ahd kā Sandūq Isrāil Wāpas Lāyā Jātā Hai

¹ Allāh kā sandūq ab sāt mahīne Filistiyon ke pās rahā thā.

² Āḡhirkār unhoñ ne apne tamām pujāriyon aur rammāloñ ko bulā kar un se mashwarā kiyā, “Ab ham Rab ke sandūq kā kyā karen? Hameñ batāeñ ki ise kis tarah is ke apne mulk meñ wāpas bhejeñ.”

³ Pujāriyon aur rammāloñ ne jawāb diyā, “Agar āp use wāpas bhejeñ to waise mat bhejnā balki qusūr kī qurbānī sāth bhejnā. Tab āp ko shafā milegī, aur āp jān leñge ki wuh āp ko sazā dene se kyon nahīñ bāz āyā.”

⁴ Filistiyon ne pūchhā, “Ham use kis qism kī qusūr kī qurbānī bhejeñ?”

Unhoñ ne jawāb diyā, “Filistiyon ke pāñch hukmrān haiñ, is lie sone ke pāñch phoṛe aur pāñch chūhe banwāeñ, kyonki āp sab is ek hī wabā kī zad meñ āe hue haiñ, ḡhāh hukmrān hoñ, ḡhāh riāyā.

⁵ Sone ke yih phoṛe aur mulk ko tabāh karne wāle chūhe banā kar Isrāil ke dewatā kā ehtirām karen. Shāyad wuh yih dekh kar āp, āp ke dewatāon aur mulk ko sazā dene se bāz āe.

⁶ Āp kyon purāne zamāne ke Misriyon aur un ke bādshāh kī tarah aṛ jāeñ? Kyonki us waqt Allāh ne Misriyon ko itnī saḡht musibat meñ ḡāl diyā ki āḡhirkār unheñ Isrāiliyon ko jāne denā paṛā.

⁷ Ab bailgāri banā kar us ke āge do gāeñ joteñ. Aisī gāeñ hoñ jin ke dūdh pīne wāle bachche hoñ aur jin par ab tak juā na rakhā gayā ho. Gāyon

ko bailgārī ke āge joteñ, lekin un ke bachchoñ ko sāth jāne na deñ balki unheñ kahīn band rakheñ.

⁸ Phir Rab kā sandūq bailgārī par rakhā jāe aur us ke sāth ek thailā jis meñ sone kī wuh chīzeñ hoñ jo āp qusūr kī qurbānī ke taur par bhej rahe haiñ. Is ke bād gāyoñ ko khulā chhoṛ deñ.

⁹ Ghaur kareñ ki wuh kaun-sā rāstā ikhtiyār kareñgī. Agar Isrāil ke Bait-shams kī taraf chaleñ to phir mālūm hogā ki Rab ham par yih baṛī musibat lāyā hai. Lekin agar wuh kahīn aur chaleñ to matlab hogā ki Isrāil ke dewatā ne hameñ sazā nahīn dī balki sab kuchh ittafāq se huā hai.”

¹⁰ Filistiyōñ ne aisā hī kiyā. Unhoñ ne do gāeñ naī bailgārī meñ jot kar un ke chhoṛe bachchoñ ko kahīn band rakhā.

¹¹ Phir unhoñ ne ahd kā sandūq us thaile samet jis meñ sone ke chūhe aur phoṛe the bailgārī par rakhā.

¹² Jab gāyoñ ko chhoṛ diyā gayā to wuh ḍakrātī ḍakrātī sīdhī Bait-shams ke rāste par ā gaīñ aur na dāīñ, na bāīñ taraf haṭīñ. Filistiyōñ ke sardār Bait-shams kī sarhad tak un ke pīchhe chale.

¹³ Us waqt Bait-shams ke bāshinde nīche wādī meñ gandum kī fasal kāṭ rahe the. Ahd kā sandūq dekh kar wuh nihāyat ḡhush hue.

¹⁴ Bailgārī ek khet tak pahuñchī jis kā mālik Bait-shams kā rahne wālā Yashua thā. Wahāñ wuh ek baṛe patthar ke pās ruk gaī. Logoñ ne bailgārī kī lakaṛī ṭukṛe ṭukṛe karke use jalā diyā aur gāyoñ ko zabah karke Rab ko bhasm hone wālī qurbānī ke taur par pesh kiyā.

15 Lāwī ke qābīle ke kuchh mardoñ ne Rab ke sandūq ko bailgārī se uṭhā kar sone kī chīzoñ ke thaile samet patthar par rakh diyā. Us din Bait-shams ke logoñ ne Rab ko bhasm hone wālī aur zabah kī qurbāniyāñ pesh kiñ.

16 Yih sab kuchh dekhne ke bād Filistī sardār usī din Aqrūn wāpas chale gae.

17 Filistiyon ne apnā qusūr dūr karne ke lie har ek shahr ke lie sone kā ek phoṛā banā liyā thā yānī Ashdūd, Ghazzā, Askqalūn, Jāt aur Aqrūn ke lie ek ek phoṛā.

18 Is ke alāwā unhoñ ne har shahr aur us ke gird-o-nawāh kī ābādiyon ke lie sone kā ek ek chūhā banā liyā thā. Jis baṛe patthar par ahd kā sandūq rakhā gayā wuh āj tak Yashua Bait-shamsī ke khet meñ is bāt kī gawāhī detā hai.

Ahd kā Sandūq Qiriyat-yārīm Meñ

19 Lekin Rab ne Bait-shams ke bāshindoñ ko sazā dī, kyonki un meñ se bāz ne ahd ke sandūq meñ nazar dālī thī. Us waqt 70 afrād halāk hue. Rab kī yih saḡht sazā dekh kar Bait-shams ke log mātam karne lage.

20 Wuh bole, “Kaun is muqaddas Ḳhudā ke huzūr qāym rah saktā hai? Yih hamāre bas kī bāt nahīñ, lekin ham Rab kā sandūq kis ke pās bhejeñ?”

21 Āḡhir meñ unhoñ ne Qiriyat-yārīm ke bāshindoñ ko paighām bhejā, “Filistiyon ne Rab kā sandūq wāpas kar diyā hai. Ab āeñ aur use apne pās le jāeñ!”

7

¹ Yih sun kar Qiriyat-yārīm ke mard āe aur Rab kā sandūq apne shahr meñ le gae. Wahāñ unhoñ ne use Abīnadāb ke ghar meñ rakh diyā jo pahārī par thā. Abīnadāb ke beṭe Iliyazar ko maḥsūs kiyā gayā tāki wuh ahd ke sandūq kī pahrādāri kare.

Taubā kī Wajah se Isrāīlī Filistiyon par Fatah Pāte Haiñ

² Ahd kā sandūq 20 sāl ke tawīl arse tak Qiriyat-yārīm meñ parā rahā. Is daurān tamām Isrāīl mātām kartā rahā, kyonki lagtā thā ki Rab ne unheñ tark kar diyā hai.

³ Phir Samuel ne tamām Isrāīliyon se kahā, “Agar āp wāqaī Rab ke pās wāpas ānā chāhte haiñ to ajnabī mābūdoñ aur Astārāt Dewī ke but dūr kar deñ. Pūre dil ke sāth Rab ke tābe ho kar usī kī ḳhidmat karen. Phir hī wuh āp ko Filistiyon se bachāegā.”

⁴ Isrāīliyon ne us kī bāt mān lī. Wuh Bāl aur Astārāt ke buton ko phaink kar sirf Rab kī ḳhidmat karne lage.

⁵ Tab Samuel ne elān kiyā, “Pūre Isrāīl ko Misfāh meñ jamā karen to maiñ wahāñ Rab se duā karke āp kī sifārish karūnga.”

⁶ Chunāñche wuh sab Misfāh meñ jamā hue. Taubā kā izhār karke unhoñ ne kueñ se pānī nikāl kar Rab ke huzūr unḍel diyā. Sāth sāth unhoñ ne pūrā din rozā rakhā aur iqrār kiyā, “Ham ne Rab kā gunāh kiyā hai.” Wahāñ Misfāh meñ Samuel ne Isrāīliyon ke lie kachahrī lagāi.

7 Filistī hukmrānoñ ko patā chalā ki Isrāīlī Misfāh meñ jamā hue haiñ to wuh un se larne ke lie æe. Yih sun kar Isrāīlī saḡht ghabrā gae

8 aur Samuel se minnat kī, “Duā karte raheñ! Rab hamāre Ḳhudā se iltamās karne se na rukeñ tāki wuh hamēñ Filistiyōñ se bachāe.”

9 Tab Samuel ne bheḡ kā dūdh pītā bachchā chun kar Rab ko bhasm hone wālī qurbānī ke taur par pesh kiyā. Sāth sāth wuh Rab se iltamās kartā rahā.

Aur Rab ne us kī sunī.

10 Samuel abhī qurbānī pesh kar rahā thā ki Filistī wahāñ pahuñch kar Isrāīliyōñ par hamlā karne ke lie taiyār hue. Lekin us dīn Rab ne zor se karaktī huī āwāz se Filistiyōñ ko itnā dahshatzadā kar diyā ki wuh darham-barham ho gae aur Isrāīlī āsānī se unheñ shikast de sake.

11 Isrāīliyōñ ne Misfāh se nikal kar Bait-kār ke nīche tak dushman kā tāqqub kiyā. Rāste meñ bahut-se Filistī halāk hue.

12 Is fatah kī yād meñ Samuel ne Misfāh aur Shen ke darmiyān ek baḡā patthar nasab kar diyā. Us ne patthar kā nām Aban-azar yānī ‘Madad kā Patthar’ rakhā. Kyoñki us ne kahā, “Yahāñ tak Rab ne hamārī madad kī hai.”

13 Is tarah Filistiyōñ ko maḡhlūb kiyā gayā, aur wuh dubārā Isrāīl ke ilāqe meñ na ghuse. Jab tak Samuel jitā rahā Filistiyōñ par Rab kā saḡht dabāw rahā.

14 Aur Aqrūn se le kar Jāt tak jitnī Isrāīlī ābādiyāñ Filistiyōñ ke hāth meñ ā gaiñ thīñ wuh sab un kī zamīnoñ samet dubārā Isrāīl ke qabze meñ ā gaiñ. Amoriyōñ ke sāth bhī sulah ho gai.

15 Samuel apne jīte-jī Isrāīl kā qāzī aur rāhnumā rahā.

16 Har sāl wuh Baitel, Jiljāl aur Misfāh kā daurā kartā, kyonki in tīn jaghoñ par wuh Isrāīliyonñ ke lie kachahrī lagāyā kartā thā.

17 Is ke bād wuh dubārā Rāmā apne ghar wāpas ā jātā jahāñ mustaqil kachahrī thī. Wahāñ us ne Rab ke lie qurbāngāh bhī banāī thī.

8

Isrāīl Bādshāh kā Taqāzā Kartā Hai

1 Jab Samuel būrḥā huā to us ne apne do beṭoñ ko Isrāīl ke qāzī muqarrar kiyā.

2 Baṛe kā nām Yoel thā aur chhoṭe kā Abiyāh. Donoñ Bair-sabā meñ logoñ kī kachahrī lagāte the.

3 Lekin wuh bāp ke namūne par nahīn chalte balki rishwat khā kar ghalat faisle karte the.

4 Phir Isrāīl ke buzurg mil kar Samuel ke pās āe, jo Rāmā meñ thā.

5 Unhoñ ne kahā, “Dekheñ, āp būrḥe ho gae haiñ aur āp ke beṭe āp ke namūne par nahīn chalte. Ab ham par bādshāh muqarrar karen tāki wuh hamārī us tarah rāhnumāī kare jis tarah dīgar aqwām meñ dastūr hai.”

6 Jab buzurgoñ ne rāhnumāī ke lie bādshāh kā taqāzā kiyā to Samuel nihāyat nākhush huā. Chunāñche us ne Rab se hidāyat māngī.

7 Rab ne jawāb diyā, “Jo kuchh bhī wuh tujh se māngte haiñ unheñ de de. Is se wuh tujhe radd nahīn kar rahe balki mujhe, kyonki wuh nahīn chāhte ki maiñ un kā Bādshāh rahūn.

⁸ Jab se main unheñ Misr se nikāl lāyā wuh mujhe chhor kar dīgar mābūdoñ kī k̄hidmat karte āe haiñ. Aur ab wuh tujh se bhī yihī sulūk kar rahe haiñ.

⁹ Un kī bāt mān le, lekin sanjīdagī se unheñ un par hukūmat karne wāle bādshāh ke huqūq se āgāh kar.”

Bādshāh ke Huqūq

¹⁰ Samuel ne bādshāh kā taqāzā karne wāloñ ko sab kuchh kah sunāyā jo Rab ne use batāyā thā.

¹¹ Wuh bolā, “Jo bādshāh āp par hukūmat karegā us ke yih huqūq hoñge: Wuh āp ke beṭoñ kī bhartī karke unheñ apne rathoñ aur ghoroñ ko sañbhālne kī zimmedārī degā. Unheñ us ke rathoñ ke āge āge daurnā paṛegā.

¹² Kuchh us kī fauj ke janral aur kaptān baneñge, kuchh us ke khetoñ meñ hal chalāne aur fasleñ kātne par majbūr ho jāeñge, aur bāz ko us ke hathiyār aur rath kā sāmān banānā paṛegā.

¹³ Bādshāh āp kī beṭiyōñ ko āp se chhīn legā tāki wuh us ke lie khānā pakāeñ, roṭī banāeñ aur k̄hushbū taiyār kareñ.

¹⁴ Wuh āp ke khetoñ aur āp ke angūr aur zaitūn ke bāghoñ kā behtarīn hissā chun kar apne mulāzimoñ ko de degā.

¹⁵ Bādshāh āp ke anāj aur angūr kā daswāñ hissā le kar apne afsaroñ aur mulāzimoñ ko de degā.

¹⁶ Āp ke naukar-naukarāniyāñ, āp ke moṭe-tāze bail aur gadhe usī ke istemāl meñ āeñge.

17 Wuh āp kī bher-bakriyon̄ kā daswān hissā talab karegā, aur āp ḵhud us ke ḡhulām hoṅge.

18 Tab āp pachhtā kar kaheṅge, ‘Ham ne bādshāh kā taqāzā kyon̄ kiyā?’ Lekin jab āp Rab ke huzūr chīḵhte-chillāte madad chāheṅge to wuh āp kī nahīn sunegā.”

19 Lekin logoṅ ne Samuel kī bāt na mānī balki kahā, “Nahīn, to bhī ham bādshāh chāhte haiṅ,

20 kyon̄ki phir hī ham dīgar qaumoṅ kī mānind hoṅge. Phir hamārā bādshāh hamārī rāhnumāi karegā aur jang meṅ hamāre āge āge chal kar dushman se laṛegā.”

21 Samuel ne Rab ke huzūr yih bāteṅ dohrāiṅ.

22 Rab ne jawāb diyā, “Un kā taqāzā pūrā kar, un par bādshāh muḡarrar kar!”

Phir Samuel ne Isrāil ke mardoṅ se kahā, “Har ek apne apne shahr wāpas chalā jāe.”

9

Sāul Bāp kī Gadhiyān Talāsh Kartā Hai

1 Binyamīn ke qabāylī ilāqe meṅ ek Binyamīnī banām Qīs rahtā thā jis kā achchhā-ḵhāsā asar-o-rasūḵh thā. Bāp kā nām Abiyel bin Saror bin Bakūrat bin Afīḵh thā.

2 Qīs kā beṭā Sāul jawān aur ḵhūbsūrat thā balki Isrāil meṅ koī aur itnā ḵhūbsūrat nahīn thā. Sāth sāth wuh itnā lambā thā ki bāqī sab log sirf us ke kandhoṅ tak āte the.

3 Ek dīn Sāul ke bāp Qīs kī gadhiyān gum ho gaīṅ. Yih dekh kar us ne apne beṭe Sāul ko hukm diyā, “Naukar ko apne sāth le kar gadhiyon̄ ko ḡhūṅd lāeṅ.”

⁴ Donoñ ādmī Ifrāīm ke pahārī ilāqe aur Salisā ke ilāqe meñ se guzare, lekin besūd. Phir unhoñ ne Sālīm ke ilāqe meñ khoj lagāyā, lekin wahāñ bhī gadhiyāñ na milīñ. Is ke bād wuh Binyamīn ke ilāqe meñ ghūmte phire, lekin befāydā.

⁵ Chalthe chalthe wuh Sūf ke qarīb pahuñch gae. Sāūl ne naukar se kahā, “Āo, ham ghar wāpas chaleñ, aisā na ho ki wālid gadhiyoñ kī nahīñ balki hamārī fikr kareñ.”

⁶ Lekin naukar ne kahā, “Is shahr meñ ek mard-e-Ḳhudā hai. Log us kī baṛī izzat karte haiñ, kyoñki jo kuchh bhī wuh kahtā hai wuh pūrā ho jātā hai. Kyoñ na ham us ke pās jāeñ? Shāyad wuh hameñ batāe ki gadhiyoñ ko kahāñ dhūñdnā chāhie.”

⁷ Sāūl ne pūchhā, “Lekin ham use kyā deñ? Hamārā khānā khatm ho gayā hai, aur hamāre pās us ke lie tohfā nahīñ hai.”

⁸ Naukar ne jawāb diyā, “Koī bāt nahīñ, mere pās chāñdī kā chhoṭā sikkā * hai. Yih maiñ mard-e-Ḳhudā ko de dūngā tāki batāe ki ham kis taraf dhūñdeñ.”

⁹⁻¹¹ Sāūl ne kahā, “Ṭhīk hai, chaleñ.” Wuh shahr kī taraf chal paṛe tāki mard-e-Ḳhudā se bāt kareñ. Jab pahārī dhalāñ par shahr kī taraf chaṛh rahe the to kuchh laṛkiyāñ pāñī bharne ke lie niklīñ. Ādmiyoñ ne un se pūchhā, “Kyā ghaibbīn shahr meñ hai?” (Purāne zamāne meñ nabī ghaibbīn kahlātā thā. Agar koī Allāh se kuchh mālūm karnā chāhtā to kahtā, “Āo, ham ghaibbīn ke pās chaleñ.”)

* **9:8** Lafzī tarjumā: chāñdī ke sikke kī ek chauthāī.

12-13 Laṛkiyon ne jawāb diyā, “Jī, wuh abhī abhī pahuñchā hai, kyonki shahr ke log āj pahārī par qurbāniyān chaṛhā kar īd manā rahe haiñ. Agar jaldī karen to pahārī par chaṛhne se pahle us se mulāqāt ho jāegī. Us waqt tak ziyāfat shurū nahīn hogī jab tak ḡhaibbīn pahuñch na jāe. Kyonki use pahle khāne ko barkat denā hai, phir hī mehmānon ko khānā khāne kī ijāzat hai. Ab jāeñ, kyonki isī waqt āp us se bāt kar sakte haiñ.”

14 Chunānche Sāul aur naukar shahr kī taraf baṛhe. Shahr ke darwāze par hī Samuel se mulāqāt ho gaī jo wahāñ se nikal kar qurbāngāh kī pahārī par chaṛhne ko thā.

Samuel Sāul kī Mehmān-nawāzī Kartā Hai

15 Rab Samuel ko ek din pahle paighām de chukā thā,

16 “Kal main isī waqt Mulk-e-Binyamīn kā ek ādmī tere pās bhej dūngā. Use masah karke merī qaum Isrāil par bādshāh muqarrar kar. Wuh merī qaum ko Filistiyon se bachāegā. Kyonki main ne apnī qaum kī musibat par dhyān diyā hai, aur madad ke lie us kī chikheñ mujh tak pahuñch gaī haiñ.”

17 Ab jab Samuel ne shahr ke darwāze se nikalte hue Sāul ko dekhā to Rab Samuel se hamkalām huā, “Dekh, yihī wuh ādmī hai jis kā zikr main ne kal kiyā thā. Yihī merī qaum par hukūmat karegā.”

18 Wahīn shahr ke darwāze par Sāul Samuel se muḡhātib huā, “Mehrbānī karke mujhe batāie kī ḡhaibbīn kā ghar kahān hai?”

19 Samuel ne jawāb diyā, “Maiñ hī ghaibbīn hūñ. Āeñ, us pahārī par chaleñ jis par ziyāfat ho rahī hai, kyoñki āj āp mere mehmān haiñ. Kal maiñ subah-sawere āp ko āp ke dil kī bāt batā dūngā.

20 Jahāñ tak tīn din se gumshudā gadhiyon kā tālluq hai, un kī fikr na karen. Wuh to mil gāi haiñ. Waise āp aur āp ke bāp ke gharāne ko Isrāil kī har qīmtī chīz hāsīl hai.”

21 Sāul ne pūchhā, “Yih kis tarah? Maiñ to Isrāil ke sab se chhoṭe qabile Binyamīn kā hūñ, aur merā khāndān qabile meñ sab se chhoṭā hai.”

22 Samuel Sāul ko naukar samet us hāl meñ le gayā jis meñ ziyāfat ho rahī thī. Taqriban 30 mehmān the, lekin Samuel ne donoñ ādmiyon ko sab se izzat kī jagah par biṭhā diyā.

23 Khānsāme ko us ne hukm diyā, “Ab gosht kā wuh ṭukrā le āo jo maiñ ne tumheñ de kar kahā thā ki use alag rakhnā hai.”

24 Khānsāme ne qurbānī kī rān lā kar use Sāul ke sāmne rakh diyā. Samuel bolā, “Yih āp ke lie mahfūz rakhā gayā hai. Ab khāeñ, kyoñki dūsroñ ko dāwat dete waqt maiñ ne yih gosht āp ke lie aur is mauqe ke lie alag kar liyā thā.” Chunāñche Sāul ne us din Samuel ke sāth khānā khāyā.

25 Ziyāfat ke bād wuh pahārī se utar kar shahr wāpas āe, aur Samuel apne ghar kī chhat par Sāul se bāchit karne lagā.

26 Agle din jab pau phaṭne lagī to Samuel ne nīche se Sāul ko jo chhat par so rahā thā āwāz

dī, “Uṭheñ! Maiñ āp ko ruḡhsat karūñ.” Sāul jāg uṭhā aur wuh mil kar rawānā hue.

²⁷ Jab wuh shahr ke kināre par pahuñche to Samuel ne Sāul se kahā, “Apne naukar ko āge bhejeñ.” Jab naukar chalā gayā to Samuel bolā, “Ṭhahar jāeñ, kyonki mujhe āp ko Allāh kā ek paighām sunānā hai.”

10

Sāul ko Masah Kiyā Jātā Hai

¹ Phir Samuel ne kuppī le kar Sāul ke sar par zaitūn kā tel unḡel dīyā aur use bosā de kar kahā, “Rab ne āp ko apnī ḡhās milkiyat par rāhnumā muḡarrar kiyā hai.

² Mere pās se chale jāne ke bād jab āp Binyamīn kī sarhad ke shahr Zilzakḡ ke qarīb Rākḡhil kī qabr ke pās se guzareñge to āp kī mulāqāt do ādmiyoñ se hogī. Wuh āp se kahañge, ‘Jo gadhiyāñ āp ḡhūñḡne gae wuh mil gā haiñ. Aur ab āp ke bāp gadhiyoñ kī nahīñ balki āp kī fikr kar rahe haiñ. Wuh kah rahe haiñ ki maiñ kis tarah apne beṭe kā patā karūñ?’

³ Āp āge jā kar Tabūr ke balūt ke daraḡht ke pās pahuñcheñge. Wahāñ tīn ādmī āp se mileñge jo Allāh kī ibādat karne ke lie Baitel jā rahe hoñge. Ek ke pās tīn chhoṭī bakriyāñ, dūsre ke pās tīn roṭiyāñ aur tīsre ke pās mai kī mashk hogī.

⁴ Wuh āp ko salām kah kar do roṭiyāñ deñge. Un kī yih roṭiyāñ qabūl karen.

⁵ Is ke bād āp Allāh ke Jibiyā jāeñge jahāñ Filistiyōñ kī chaukī hai. Shahr meñ dākḡhil hote

waqt āp kī mulāqāt nabiyōn ke ek julūs se hogī jo us waqt pahārī kī qurbāngāh se utar rahā hogā. Un ke āge āge sitār, daf, bānsriyān aur sarod bajāne wāle chaleᅅge, aur wuh nabuwwat kī hālat meᅅ hoᅅge.

⁶ Rab kā Rūh āp par bhī nāzil hogā, aur āp un ke sāth nabuwwat kareᅅge. Us waqt āp farq shaᅅhs meᅅ tabdīl ho jāeᅅge.

⁷ Jab yih tamām nishān wujūd meᅅ āeᅅge to wuh kuchh kareᅅn jo āp ke zahan meᅅ ā jāe, kyonki Allāh āp ke sāth hogā.

⁸ Phir mere āge Jiljāl chale jāeᅅn. Main bhī āūᅅgā aur wahān bhasm hone wālī aur salāmatī kī qurbāniyān pesh karūᅅga. Lekin āp ko sāt din merā intazār karnā hai. Phir main ā kar āp ko batā dūᅅgā ki āge kyā karnā hai.”

⁹ Sāul rawānā hone ke lie Samuel ke pās se muᅅrā to Allāh ne us kā dil tabdīl kar diyā. Jin nishānoᅅn kī bhī peshgoī Samuel ne kī thī wuh usī dīn pūrī huī.

¹⁰ Jab Sāul aur us kā naukar Jibiyā pahuᅅnche to wahān un kī mulāqāt mazkūrā nabiyōn ke julūs se huī. Allāh kā Rūh Sāul par nāzil huā, aur wuh un ke darmiyān nabuwwat karne lagā.

¹¹ Kuchh log wahān the jo bachpan se us se wāqif the. Sāul ko yoᅅn nabiyōn ke darmiyān nabuwwat karte hue dekh kar wuh āpas meᅅ kahne lage, “Qīs ke beᅅe ke sāth kyā huā? Kyā Sāul ko bhī nabiyōn meᅅ shumār kiyā jātā hai?”

¹² Ek maᅅāmī admī ne jawāb diyā, “Kaun in kā bāp hai?” Bād meᅅ yih muᅅhāwarā ban gayā, “Kyā Sāul ko bhī nabiyōn meᅅ shumār kiyā jātā hai?”

13 Nabuwwat karne ke iḡhtitām par Sāūl pahārī par chaṛh gayā jahān qurbāngāh thī.

14 Jab Sāūl naukar samet wahān pahuñchā to us ke chachā ne pūchhā, “Āp kahān the?” Sāūl ne jawāb diyā, “Ham gumshudā gadhiyoñ ko ḡhūñḡne ke lie nikle the. Lekin jab wuh na milīn to ham Samuel ke pās gae.”

15 Chachā bolā, “Achchhā? Us ne āp ko kyā batāyā?”

16 Sāūl ne jawāb diyā, “Ḳhair, us ne kahā ki gadhiyān mil gāi haiñ.” Lekin jo kuchh Samuel ne bādshāh banane ke bāre meñ batāyā thā us kā zikr us ne na kiyā.

Sāūl Bādshāh Ban Jātā Hai

17 Kuchh der ke bād Samuel ne awām ko bulā kar Misfāh meñ Rab ke huzūr jamā kiyā.

18 Us ne kahā, “Rab Isrāīl kā Ḳhudā farmātā hai, ‘Maiñ Isrāīl ko Misr se nikāl lāyā. Maiñ ne tumheñ Misriyoñ aur un tamām saltanatoñ se bachāyā jo tum par zulm kar rahī thīñ.

19 Lekin go maiñ ne tumheñ tumhārī tamām musibatoñ aur tangiyoñ se chhuṭkārā diyā to bhī tum ne apne Ḳhudā ko mustarad kar diyā. Kyoñki tum ne isrār kiyā ki ham par bādshāh muḡarrar karo! Ab apne apne qabīloñ aur ḡhāñḡānoñ kī tartīb ke mutābiq Rab ke huzūr khare ho jāo.’ ”

20 Yih kah kar Samuel ne tamām qabīloñ ko Rab ke huzūr pesh kiyā. Qurā ḡālā gayā to Binyamīn ke qabīle ko chunā gayā.

21 Phir Samuel ne Binyamīn ke qabīle ke sāre ḡhāñḡānoñ ko Rab ke huzūr pesh kiyā. Matrī ke

ḳhāndān ko chunā gayā. Yoñ qurā dālte dālte Sāūl bin Qīs ko chunā gayā. Lekin jab Sāūl ko ḍhūṇḍā gayā to wuh ḡhāyb thā.

²² Unhoñ ne Rab se dariyāft kiyā, “Kyā Sāūl yahāñ pahuñch chukā hai?” Rab ne jawāb diyā, “Wuh sāmān ke bīch meñ chhup gayā hai.”

²³ Kuchh log dauṛ kar use sāmān meñ se nikāl kar awām ke pās le āe. Jab wuh logoñ meñ kharā huā to itnā lambā thā ki bāqī sab log sirf us ke kandhoñ tak āte the.

²⁴ Samuel ne kahā, “Yih ādmī dekho jise Rab ne chun liyā hai. Awām meñ us jaisā koī nahīn hai!” Tamām log ḳhushī ke māre “Bādshāh zindābād!” Kā nārā lagāte rahe.

²⁵ Samuel ne bādshāh ke huḳūq tafsīl se sunāe. Us ne sab kuchh kitāb meñ likh diyā aur use Rab ke maḡdis meñ mahfūz rakhā. Phir us ne awām ko ruḳhsat kar diyā.

²⁶ Sāūl bhī apne ghar chalā gayā jo Jibiyā meñ thā. Kuchh faujī us ke sāth chale jin ke diloñ ko Allāh ne chhū diyā thā.

²⁷ Lekin aise sharīr log bhī the jinhoñ ne us kā mazāq uṛā kar pūchhā, “Bhalā yih kis tarah hameñ bachā saktā hai?” Wuh use haqīr jānte the aur use tohfe pesh karne ke lie bhī taiyār na hue. Lekin Sāūl un kī bāteñ nazarandāz karke ḳhāmosh hī rahā.

11

Sāūl Ammoniyoñ par Fatah Pātā Hai

¹ Kuchh der ke bād Ammonī bādshāh Nāhas ne apnī fauj le kar Yabīs-jiliyād kā muhāsarā kiyā. Yabīs ke tamām afrād ne us se guzārish

kī, “Hamāre sāth muāhadā karen̄ to ham āindā āp ke tābe raheᅅge.”

² Nāhas ne jawāb diyā, “Ṭhīk hai, lekin is shart par ki main̄ har ek kī dah̄nī ānkh nikāl kar tamām Isrāīl kī be'izzatī karūᅅga!”

³ Yabīs ke buzurgoᅅn ne darᅅhāst kī, “Hameᅅn ek hafte kī muhlat dījie tāki ham apne qāsidoᅅn ko Isrāīl kī har jagah bhejeᅅn. Agar koī hameᅅn bachāne ke lie na āe to ham hathiyār ᅅāl kar shahr ko āp ke hawāle kar deᅅge.”

⁴ Qāsīd Sāūl ke shahr Jibiyā bhī pahuᅅch gae. Jab maqāmī logoᅅn ne un kā paighām sunā to pūrā shahr phūᅅ phūᅅ kar rone lagā.

⁵ Us waqt Sāūl apne bailoᅅn ko khetoᅅn se wāpas lā rahā thā. Us ne pūchhā, “Kyā huā hai? Log kyoᅅn ro rahe haiᅅn?” Use qāsidoᅅn kā paighām sunāyā gayā.

⁶ Tab Sāūl par Allāh kā Rūh nāzil huā, aur use sakht ᅅhussā āyā.

⁷ Us ne bailoᅅn kā joᅅā le kar unheᅅn ᅅukᅅre ᅅukᅅre kar diyā. Phir qāsidoᅅn ko yih ᅅukᅅre pakaᅅā kar us ne unheᅅn yih paighām de kar Isrāīl kī har jagah bhej diyā, “Jo Sāūl aur Samuel ke pīchhe chal kar Ammoniyōᅅn se laᅅne nah̄in jāegā us ke bail isī tarah ᅅukᅅre ᅅukᅅre kar die jāeᅅge!”

Yih ᅅhabar sun kar logoᅅn par Rab kī dahshat tāri hō gai, aur sab ke sab ek dil ho kar Ammoniyōᅅn se laᅅne ke lie nikle.

⁸ Bazaq ke qarīb Sāūl ne fauj kā jāyzā liyā. Yahūdāh ke 30,000 afrād the aur bāqī qabīloᅅn ke 3,00,000.

⁹ Unhoᅅn ne Yabīs-jiliyād ke qāsidoᅅn ko wāpas bhej kar batāyā, “Kal dopahar se pahle pahle āp

ko bachā liyā jāegā.” Wahān ke bāshinde yih
 ̄khabar sun kar bahut ̄khus̄h hue.

¹⁰ Unhoñ ne Ammoniyon ko ittalā dī, “Kal ham
 hathiyār ̄dāl kar shahr ke darwāze khol deñge.
 Phir wuh kuchh karen̄ jo āp ko ̄thīk lage.”

¹¹ Agle din subah-sawere Sāul ne fauj ko tīn
 hisson̄ meñ taqsīm kiyā. Sūraj ke tulū hone se
 pahle pahle unhoñ ne tīn simton̄ se dushman kī
 lashkargāh par hamlā kiyā. Dopahar tak unhoñ
 ne Ammoniyon ko mār mār kar ̄khatm kar diyā.
 Jo thore-bahut log bach gae wuh yon̄ titar-bitar
 ho gae ki do bhī ikat̄the na rahe.

Sāul kī Dubārā Tasdīq

¹² Fatah ke bād log Samuel ke pās ā kar kahne
 lage, “Wuh log kahān haiñ jinhoñ ne etarāz kiyā
 kī Sāul ham par hukūmat kare? Unheñ le āeñ
 tāki ham unheñ mār deñ.”

¹³ Lekin Sāul ne unheñ rok diyā. Us ne kahā,
 “Nahīn, āj to ham kisī bhī bhāī ko sazā-e-maut
 nahīn deñge, kyon̄ki is din Rab ne Isrāil ko rihāī
 baḅshī hai!”

¹⁴ Phir Samuel ne elān kiyā, “Āo, ham Jiljāl
 jā kar dubārā is kī tasdīq karen̄ ki Sāul hamārā
 bādshāh hai.”

¹⁵ Chunānche tamām logon̄ ne Jiljāl jā kar Rab
 ke huzūr is kī tasdīq kī ki Sāul hamārā bādshāh
 hai. Is ke bād unhoñ ne Rab ke huzūr salāmatī
 kī qurbāniyāñ pesh karke barā jashn manāyā.

12

Samuel kī Alwidāī Taqrīr

¹ Tab Samuel tamām Isrāīl se muḵhātib huā, “Maiñ ne āp kī har bāt mān kar āp par bādshāh muqarrar kiyā hai.

² Ab yihī āp ke āge āge chal kar āp kī rāhnumāi karegā. Maiñ ḵhud būḥhā hūñ, aur mere bāl safed ho gae haiñ jabki mere beṭe āp ke darmiyān hī rahte haiñ. Maiñ jawānī se le kar āj tak āp kī rāhnumāi kartā āyā hūñ.

³ Ab maiñ hāzir hūñ. Agar mujh se koī ḡhaltī huī hai to Rab aur us ke masah kie hue bādshāh ke sāmne is kī gawāhī deñ. Kyā maiñ ne kisī kā bail yā gadhā lūṭ liyā? Kyā maiñ ne kisī se ḡhalat fāydā uṭhāyā yā kisī par zulm kiyā? Kyā maiñ ne kabhī kisī se rishwat le kar ḡhalat faislā kiyā hai? Agar aisā huā to mujhe batāeñ! Phir maiñ sab kuchh wāpas kar dūngā.”

⁴ Ijtimā ne jawāb diyā, “Na āp ne ham se ḡhalat fāydā uṭhāyā, na ham par zulm kiyā hai. Āp ne kabhī bhī rishwat nahīñ li.”

⁵ Samuel bolā, “Āj Rab aur us kā masah kiyā huā bādshāh gawāh haiñ ki āp ko mujh par ilzām lagāne kā koī sabab na milā.” Awām ne kahā, “Jī, aisā hī hai.”

⁶ Samuel ne bāt jāri rakhī, “Rab ḵhud Mūsā aur Hārūn ko Isrāīl ke rāhnumā banā kar āp ke bāpdādā ko Misr se nikāl lāyā.

⁷ Ab yahāñ Rab ke taḵht-e-adālat ke sāmne khare ho jāeñ to maiñ āp ko un tamām bhalāiyōñ kī yād dilāūngā jo Rab ne āp aur āp ke bāpdādā se kī haiñ.

⁸ Āp kā bāp Yāqūb Misr āyā. Jab Misrī us kī aulād ko dabāne lage to unhoñ ne chīḵhte-chillāte Rab se madad māngī. Tab us ne Mūsā

aur Hārūn ko bhej diyā tāki wuh pūrī qaum ko Misr se nikāl kar yahān is mulk meñ læñ.

⁹ Lekin jald hī wuh Rab apne Ḳhudā ko bhūl gae. Is lie us ne unheñ dushman ke hawāle kar diyā. Kabhī Hasūr Shahr ke bādshāh kā kamāndar Sīsarā un se laṛā, kabhī Filistī aur kabhī Moāb kā bādshāh.

¹⁰ Har dafā āp ke bāpdādā ne chīḳhte-chillāte Rab se madad māngī aur iqrār kiyā, ‘Ham ne gunāh kiyā hai, kyoñki ham ne Rab ko tark karke Bāl aur Astārāt ke butoñ kī pūjā kī hai. Lekin ab hameñ dushmanoñ se bachā! Phir ham sirf terī hī ḳhidmat kareñge.’

¹¹ Aur har bār Rab ne kisī na kisī ko bhej diyā, kabhī Jidāun, kabhī Baraq, kabhī Iftāh aur kabhī Samuel ko. Un ādmiyoñ kī mārifat Allāh ne āp ko irdgird ke tamām dushmanoñ se bachāyā, aur mulk meñ amn-o-amān qāym ho gayā.

¹² Lekin jab Ammonī bādshāh Nāhas āp se laṛne āyā to āp mere pās ā kar taqāzā karne lage ki hamārā apnā bādshāh ho jo ham par hukūmat kare, hālāñki āp jānte the ki Rab hamārā Ḳhudā hamārā Bādshāh hai.

¹³ Ab wuh bādshāh dekheñ jise āp māng rahe the! Rab ne āp kī ḳhāhish pūrī karke use āp par muqarrar kiyā hai.

¹⁴ Chunāñche Rab kā ḳhauf māneñ, us kī ḳhidmat kareñ aur us kī suneñ. Sarkash ho kar us ke ahkām kī ḳhilāfwarzī mat karnā. Agar āp aur āp kā bādshāh Rab se wafādār raheñge to wuh āp ke sāth hogā.

¹⁵ Lekin agar āp us ke tābe na raheñ aur sarkash ho kar us ke ahkām kī ḳhilāfwarzī kareñ

to wuh āp kī muḵhālafat karegā, jis tarah us ne āp ke bāpdādā kī bhī muḵhālafat kī.

16 Ab khare ho kar dekheñ ki Rab kyā karne wālā hai. Wuh āp kī āñkhoñ ke sāmne hī baṛā mojizā karegā.

17 Is waqt gandum kī kaṭāī kā mausam hai. Go in dinon meñ bārish nahīn hotī, lekin main duā karūnga to Rab garajte bādāl aur bārish bhejegā. Tab āp jān leñge ki āp ne bādshāh kā taqāzā karte hue Rab ke nazdik kitnī burī bāt kī hai.”

18 Samuel ne pukār kar Rab se duā kī, aur us din Rab ne garajte bādāl aur bārish bhej dī. Yih dekh kar ijtīmā saḵht ghabrā kar Samuel aur Rab se ḍarne lagā.

19 Sab ne Samuel se iltamās kī, “Rab apne Ḳhudā se duā karke hamārī sifārish karen tāki ham mar na jāeñ. Kyoñki bādshāh kā taqāzā karne se ham ne apne gunāhoñ meñ izāfā kiyā hai.”

20 Samuel ne logoñ ko tasallī de kar kahā, “Mat ḍareñ. Beshak āp se ḡhaltī huī hai, lekin āindā ḡhayāl rakheñ ki āp Rab se dūr na ho jāeñ balki pūre dil se us kī ḡhidmat karen.

21 Bemānī butoñ ke pīchhe mat paṛnā. Na wuh fāyde kā bāis haiñ, na āp ko bachā sakte haiñ. Un kī koī haisiyat nahīn hai.

22 Rab apne azīm nām kī ḡhātir apnī qaum ko nahīn chhoṛegā, kyoñki us ne āp ko apnī qaum banāne kā faislā kiyā hai.

23 Jahān tak merā tālluḡ hai, main is meñ Rab kā gunāh nahīn karūnga ki āp kī sifārish karne

se bāz āūñ. Aur āindā bhī main āp ko achchhe aur sahīh rāste kī tālīm detā rahūngā.

²⁴ Lekin dhyān se Rab kā khauf māneñ aur pūre dil aur wafādārī se us kī k̄hidmat karen. Yād rahe ki us ne āp ke lie kitne azīm kām kie haiñ.

²⁵ Lekin agar āp ḡhalat kām karne par tule raheñ to āp apne bādshāh samet duniyā meñ se miṭ jāenge.”

13

Filistiyon se Jang

¹ Sāul 30 sāl kā thā jab taḁhtnashīn huā. Do sāl hukūmat karne ke bād

² us ne apnī fauj ke lie 3,000 Isrāīlī chun lie. Jang laṛne ke qābil bāqī ādmiyon ko us ne fāriḡh kar diyā. 2,000 faujiyon kī d̄yūṭī Mikmās aur Baitel ke pahārī ilāqe meñ lagāī gāī jahāñ Sāul k̄hud thā. Bāqī 1,000 afrād Yūnatan ke pās Binyamīn ke shahr Jibiyā meñ the.

³ Ek din Yūnatan ne Jibiyā kī Filistī chaukī par hamlā karke use shikast dī. Jald hī yih k̄habar dūsre Filistiyon tak pahuñch gāī. Sāul ne mulk ke kone kone meñ qāsīd bhej die, aur wuh narsingā bajāte bajāte logoñ ko Yūnatan kī fatah sunāte gae.

⁴ Tamām Isrāīl meñ k̄habar phaīl gāī, “Sāul ne Jibiyā kī Filistī chaukī ko tabāh kar diyā hai, aur ab Isrāīl Filistiyon kī k̄hās nafrat kā nishānā ban gayā hai.” Sāul ne tamām mardoñ ko Filistiyon se laṛne ke lie Jiljāl meñ bulāyā.

⁵ Filistī bhī Isrāīliyon se laṛne ke lie jamā hue. Un ke 30,000 rath, 6,000 ghur̄sawār aur sāhil

kī ret jaise beshumār piyādā faujī the. Unhon ne Bait-āwan ke mashriq meñ Mikmās ke qarīb apne khaime lagāe.

⁶ Isrāīliyon ne dekhā ki ham baṛe khatre meñ ā gae haiñ, aur dushman ham par bahut dabāw dāl rahā hai to pareshānī ke ālam meñ kuchh ghāron aur darāron meñ aur kuchh pattharon ke darmiyān yā qabron aur hauzon meñ chhup gae.

⁷ Kuchh itne dar gae ki wuh Dariyā-e-Yardan ko pār karke Jad aur Jiliyād ke ilāqe meñ chale gae.

Sāul kī Besabrī

Sāul ab tak Jiljāl meñ thā, lekin jo admī us ke sāth rahe the wuh khauf ke māre thartharā rahe the.

⁸ Samuel ne Sāul ko hidāyat dī thī ki sāt din merā intazār karen. Lekin sāt din guzar gae. Aur Samuel na āyā. Sāul ke faujī muntashir hone lage

⁹ to Sāul ne hukm diyā, “Bhasm hone wālī aur salāmatī kī qurbāniyān le āo.” Phir us ne kḥud qurbāniyān pesh kīn.

¹⁰ Wuh abhī is kām se fāriḡh hī huā thā ki Samuel pahuñch gayā. Sāul use kḥushāmdīd kahne ke lie niklā.

¹¹ Lekin Samuel ne pūchhā, “Āp ne kyā kiyā?”

Sāul ne jawāb diyā, “Log muntashir ho rahe the, aur āp waqt par na āe. Jab maiñ ne dekhā ki Filistī Mikmās ke qarīb jamā ho rahe haiñ

¹² to maiñ ne sochā, ‘Filistī yahān Jiljāl meñ ā kar mujh par hamlā karne ko haiñ, hālāñki maiñ ne abhī Rab se duā nahīn kī ki wuh ham

par mehrbānī kare.’ Is lie main ne jurrat karke
 ʔhud qurbāniyān pesh kīn.”

13 Samuel bolā, “Yih kaisī ahmaqānā harkat
 thī! Āp ne Rab apne ʔhudā kā hukm na mānā.
 Rab to āp aur āp kī aulād ko hameshā ke lie Isrāīl
 par muqarrar karnā chāhtā thā.

14 Lekin ab āp kī bādshāhat qāym nahīn
 rahegī. Chūnki āp ne us kī na sunī is lie Rab
 ne kisī aur ko chun kar apnī qaum kā rāhnumā
 muqarrar kiyā hai, ek aise ādmī ko jo us kī soch
 rakhegā.”

15 Phir Samuel Jiljāl se chalā gayā.

Jang kī Taiyāriyān

Bache hue Isrāīlī Sāul ke pīchhe dushman se
 larne gae. Wuh Jiljāl se rawānā ho kar Jibiyā
 pahuñch gae. Jab Sāul ne wahān fauj kā jāyāzā
 liyā to bas 600 afrād rah gae the.

16 Sāul, Yūnatan aur un kī fauj Binyamīn ke
 shahr Jibiyā meñ ʔik gae jabki Filistī Mikmās ke
 pās ʔhaimāzan the.

17 Kuchh der ke bād Filistiyon ke tīn daste mulk
 ko lūṭne ke lie nikle. Ek Suāl ke ilāqe ke shahr
 Ufrā kī taraf chal paṛā,

18 dūsrā Bait-haurūn kī taraf aur tīsrā us
 pahārī silsile kī taraf jahān se Wādī-e-Zaboīm
 aur registān dekhā jā saktā hai.

19 Un dinon meñ pūre Mulke-Isrāīl meñ lohār
 nahīn thā, kyonki Filistī nahīn chāhte the ki
 Isrāīlī talwāreñ yā neze banāeñ.

20 Apne haloñ, kudāloñ, kulhāriyon yā
 darāntiyon ko tez karwāne ke lie tamām Is-
 rāīliyon ko Filistiyon ke pās jānā paṛtā thā.

21 Filistī haloñ, kudāloñ, kāñtoñ aur kulhāriyoñ ko tez karne ke lie aur ānkusoñ kī nok ṭhīk karne ke lie chāndī ke sikke kī do tihāi lete the.

22 Natīje meñ us din Sāul aur Yūnatan ke siwā kisī bhī Isrāīlī ke pās talwār yā nezā nahīn thā.

Yūnatan Filistiyon par Hamlā Kartā Hai

23 Filistiyon ne Mikmās ke darre par qabzā karke wahān chaukī qāym kī thī.

14

1 Ek din Yūnatan ne apne jawān silāhbardār se kahā, “Āo, ham parlī taraf jāeñ jahān Filistī fauj kī chaukī hai.” Lekin us ne apne bāp ko ittalā na dī.

2 Sāul us waqt anār ke daraḳht ke sāye meñ baiṭhā thā jo Jibiyā ke qarīb ke Mijron meñ thā. 600 mard us ke pās the.

3 Aḳhiyāh Imām bhī sāth thā jo imām kā bālāpōsh pahne hue thā. Aḳhiyāh Yakabod ke bhāī Aḳhitūb kā beṭā thā. Us kā dādā Fīnhās aur pardādā Elī thā, jo purāne zamāne meñ Sailā meñ Rab kā imām thā. Kisī ko bhī mālūm na thā ki Yūnatan chalā gayā hai.

4-5 Filistī chaukī tak pahuñchne ke lie Yūnatan ne ek tang rāstā iḳhtiyār kiya jo do qarāron ke darmiyān se guzartā thā. Pahle kā nām Bosīs thā, aur wuh shimāl meñ Mikmās ke muqābil thā. Dūsre kā nām Sanā thā, aur wuh junūb meñ Jibā ke muqābil thā.

6 Yūnatan ne apne jawān silāhbardār se kahā, “Āo, ham parlī taraf jāeñ jahān in nāmaḳhtūnon kī chaukī hai. Shāyad Rab hamārī madad kare,

kyonki us ke nazdik koī farq nahīn ki ham zyādā hon yā kam.”

⁷ Us kā silāhbardār bolā, “Jo kuchh āp ṭhīk samajhte haiñ, wuhī karen. Zarūr jāēñ. Jo kuchh bhī āp kaheñge, maiñ hāzir hūñ.”

⁸ Yūnatan bolā, “Ṭhīk hai. Phir ham yon dushmanon kī taraf baṛhte jāēnge, ki ham unheñ sāf nazar aēñ.

⁹ Agar wuh hamēñ dekh kar pukāreñ, ‘Ruk jāo, warnā ham tumheñ mār deñge!’ To ham apne mansūbe se bāz ā kar un ke pās nahīn jāēnge.

¹⁰ Lekin agar wuh pukāreñ, ‘Āo, hamāre pās ā jāo!’ To ham zarūr un ke pās chaṛh jāēnge. Kyonki yih is kā nishān hogā ki Rab unheñ hamāre qabze meñ kar degā.”

¹¹ Chunānche wuh chalte chalte Filistī chaukī ko nazar aē. Filistī shor machāne lage, “Dekho, Isrāīlī apne chhupne ke bilon se nikal rahe haiñ!”

¹² Chaukī ke faujiyon ne donon ko chailenij kiyā, “Āo, hamāre pās āo to ham tumheñ sabaq sikhāēnge.” Yih sun kar Yūnatan ne apne silāhbardār ko āwāz dī, “Āo, mere pīchhe chalo! Rab ne unheñ Isrāīl ke hawāle kar diyā hai.”

¹³ Donon apne hāthon aur pairon ke bal chaṛhte chaṛhte chaukī tak jā pahunchē. Jab Yūnatan āge āge chal kar Filistiyon ke pās pahunch gayā to wuh us ke sāmne girte gae. Sāth sāth silāhbardār pīchhe se logon ko mārta gayā.

¹⁴ Is pahle hamle ke daurān unhon ne taqriban 20 ādmiyon ko mār dālā. Un kī lāsheñ ādh ekaṛ zamīn par bikhrī paṛī thīn.

15 Achānak pūrī fauj meñ dahshat phail gai, na sirf lashkargāh balki khule maidān meñ bhī. Chaukī ke mard aur lūṭne wāle daste bhī thartharāne lage. Sāth sāth zalzalā āyā. Rab ne tamām Filistī faujiyoñ ke diloñ meñ dahshat paidā kī.

Rab Filistiyon par Fatah Detā Hai

16 Sāul ke jo pahredār Jibiyā se dushman kī harkatoñ par ḡhaur kar rahe the unhoñ ne achānak dekhā ki Filistī fauj meñ halchal mach gai hai, afrā-tafrī kabhī is taraf, kabhī us taraf barh rahī hai.

17 Sāul ne fauran hukm diyā, “Faujiyoñ ko gin kar mālūm karo ki kaun chalā gayā hai.” Mālūm huā ki Yūnatan aur us kā silāhbardār maujūd nahīn haiñ.

18 Sāul ne Aḡhiyāh ko hukm diyā, “Ahd kā sandūq le āeñ.” Kyoñki wuh un dinoñ meñ Isrāīlī kaimp meñ thā.

19 Lekin Sāul abhī Aḡhiyāh se bāt kar rahā thā ki Filistī lashkargāh meñ hangāmā aur shor bahut zyādā barh gayā. Sāul ne imām se kahā, “Koī bāt nahīn, rahne deñ.”

20 Wuh apne 600 afrād ko le kar fauran dushman par ṭūṭ paṛā. Jab un tak pahuñch gae to mālūm huā ki Filistī ek dūsre ko qatl kar rahe haiñ, aur har taraf hangāmā hī hangāmā hai.

21 Filistiyon ne kāfī Isrāīliyon ko apnī fauj meñ shāmil kar liyā thā. Ab yih log Filistiyon ko chhoṛ kar Sāul aur Yūnatan ke pīchhe ho lie.

22 In ke alāwā jo Isrāīlī Ifrāīm ke pahārī ilāqe meñ idhar-udhar chhup gae the, jab unheñ

ḵhabar milī ki Filistī bhāg rahe haiñ to wuh bhī un kā tāqqub karne lage.

²³ Larṭe larṭe maidān-e-jang Bait-āwan tak phail gayā. Is tarah Rab ne us din Isrāīlyoñ ko bachā liyā.

Sāul kī Besoche-samjhe Lānat

²⁴ Us din Isrāīlī saḵht larāī ke bāis baṛī musibat meñ the. Is lie Sāul ne ḡasam khā kar kahā, “Us par lānat jo shām se pahle khānā khāe. Pahle main apne dushman se intaqām lūngā, phir hī sab khā-pī sakte haiñ.” Is wajah se kisī ne roṭī ko hāth tak na lagāyā.

²⁵ Pūrī fauj jangal meñ dāḵhil huī to wahāñ zamīn par shahd ke chhatte the.

²⁶ Tamām log jab un ke pās se guzare to dekhā ki un se shahd ṭapak rahā hai. Lekin kisī ne thoṛā bhī le kar khāne kī jurrat na kī, kyonki sab Sāul kī lānat se ḡarte the.

²⁷ Yūnatan ko lānat kā ilm na thā, is lie us ne apnī lāṭhī kā sirā kisī chhatte meñ ḡāl kar use chāṭ liyā. Us kī āñkheñ fauran chamak uṭhīñ, aur wuh tāzādam ho gayā.

²⁸ Kisī ne dekh kar Yūnatan ko batāyā, “Āp ke bāp ne fauj se ḡasam khilā kar elān kiyā hai ki us par lānat jo is din kuchh khāe. Isī wajah se ham sab itne niḡhāl ho gae haiñ.”

²⁹ Yūnatan ne jawāb diyā, “Mere bāp ne mulk ko musibat meñ ḡāl diyā hai! Dekho, is thoṛe-se shahd ko chakhne se merī āñkheñ kitnī chamak uṭhīñ aur main kitnā tāzādam ho gayā.

³⁰ Behtar hotā ki hamāre log dushman se lūṭe hue māl meñ se kuchh na kuchh khā lete. Lekin

is hālat meñ ham Filistiyon ko kis tarah zyādā nuqsān pahuñchā sakte haiñ?”

31 Us din Isrāīlī Filistiyon ko Mikmās se mār mār kar Aiyālon tak pahuñch gae. Lekin shām ke waqt wuh nihāyat niḍhāl ho gae the.

32 Phir wuh lūṭe hue rewaron par ṭuṭ paṛe. Unhon ne jaldī jaldī bheṛ-bakriyon, gāy-bailon aur bachhron ko zabah kiyā. Bhūk kī shiddat kī wajah se unhon ne ḳhūn ko sahīh taur se nikalne na diyā balki jānwaron ko zamīn par chhoṛ kar gosht ko ḳhūn samet khāne lage.

33 Kisī ne Sāūl ko ittalā dī, “Dekheñ, log Rab kā gunāh kar rahe haiñ, kyonki wuh gosht khā rahe haiñ jis meñ ab tak ḳhūn hai.” Yih sun kar Sāūl pukār uṭhā, “Āp Rab se wafādār nahīn rahe!” Phir us ne sāth wāle ādmiyon ko hukm diyā, “Koī baṛā patthar luṛhkā kar idhar le āeñ!

34 Phir tamām ādmiyon ke pās jā kar unheñ batā denā, ‘Apne jānwaron ko mere pās le āeñ tāki unheñ patthar par zabah karke khāeñ. Warnā āp ḳhūnālūdā gosht khā kar Rab kā gunāh kareñge.’ ”

Sab mān gae. Us shām wuh Sāūl ke pās āe aur apne jānwaron ko patthar par zabah kiyā.

35 Wahān Sāūl ne pahlī dafā Rab kī tāzīm meñ qurbāngāh banāi.

36 Phir us ne elān kiyā, “Āeñ, ham abhī isī rāt Filistiyon kā tāqqub karke un meñ lūṭ-mār kā silsilā jāri rakheñ tāki ek bhī na bache.” Faujiyon ne jawāb diyā, “Ṭhik hai, wuh kuchh karen jo āp ko munāsib lage.” Lekin imām bolā, “Pahle ham Allāh se hidāyat leñ.”

37 Chunānche Sāul ne Allāh se pūchhā, “Kyā ham Filistiyon kā tāqqub jāri rakheñ? Kyā tū unheñ Isrāil ke hawāle kar degā?” Lekin is martabā Allāh ne jawāb na diyā.

38 Yih dekh kar Sāul ne fauj ke tamām rāhnumāon ko bulā kar kahā, “Kisī ne gunāh kiyā hai. Mālūm karne kī koshish karen kī kaun qusūrwār hai.

39 Rab kī hayāt kī qasam jo Isrāil kā Najātdahindā hai, qusūrwār ko fauran sazā-e-maut dī jāegī, khāh wuh merā beṭā Yūnatan kyon na ho.” Lekin sab khāmosh rahe.

40 Tab Sāul ne dubārā elān kiyā, “Pūrī fauj ek taraf kharī ho jāe aur Yūnatan aur main dūsri taraf.” Logoñ ne jawāb diyā, “Jo āp ko munāsib lage wuh karen.”

41 Phir Sāul ne Rab Isrāil ke Ḳhudā se duā kī, “Ai Rab, hameñ dikhā kī kaun qusūrwār hai!”

Jab qurā ḍālā gayā to Yūnatan aur Sāul ke guroh ko qusūrwār qarār diyā gayā aur bāqī fauj ko bequsūr.

42 Phir Sāul ne hukm diyā, “Ab qurā ḍāl kar patā karen kī main qusūrwār hūñ yā Yūnatan.” Jab qurā ḍālā gayā to Yūnatan qusūrwār ṭhahrā.

43 Sāul ne pūchhā, “Batāeñ, āp ne kyā kiyā?” Yūnatan ne jawāb diyā, “Main ne sirf thoṛā-sā shahd chakh liyā jo merī lāṭhī ke sire par lagā thā. Lekin main marne ke lie taiyār hūñ.”

44 Sāul ne kahā, “Yūnatan, Allāh mujhe saḳht sazā de agar main āp ko is ke lie sazā-e-maut na dūñ.”

45 Lekin faujiyon ne etarāz kiyā, “Yih kaisī bāt hai? Yūnatan hī ne apne zabardast hamle se

Isrāīl ko āj bachā liyā hai. Use kis tarah sazā-e-maut dī jā saktī hai? Kabhī nahīn! Allāh kī hayāt kī qasam, us kā ek bāl bhī bīkā nahīn hogā, kyonki āj us ne Allāh kī madad se fatah pāī hai.” Yoñ faujiyon ne Yūnatan ko maut se bachā liyā.

⁴⁶ Tab Sāūl ne Filistiyon kā tāqqub karnā chhoṛ diyā aur apne ghar chalā gayā. Filistī bhī apne mulk meñ wāpas chale gae.

Sāūl kī Jangen

⁴⁷ Jab Sāūl taḥtnashīn huā to wuh mulk ke irdgird ke tamām dushmanon se laṛā. In meñ Moāb, Ammon, Adom, Zobāh ke bādshāh aur Filistī shāmil the. Aur jahān bhī jang chhīrī wahān us ne fatah pāī.

⁴⁸ Wuh nihāyat bahādur thā. Us ne Amālīqiyon ko bhī shikast dī aur yon Isrāīl ko un tamām dushmanon se bachā liyā jo bār bār mulk kī lūṭ-mār karte the.

Sāūl kā Ḳhāndān

⁴⁹ Sāūl ke tīn beṭe the, Yūnatan, Iswī aur Malkīshua. Us kī baṛī beṭī Mīrab aur chhoṭī beṭī Mikal thī.

⁵⁰ Bīwī kā nām Aḳhīnūsam bint Aḳhīmāz thā. Sāūl kī fauj kā kamānḍar Abinair thā, jo Sāūl ke chachā Nair kā beṭā thā.

⁵¹ Sāūl kā bāp Qīs aur Abinair kā bāp Nair sage bhāī the jin kā bāp Abiyel thā.

⁵² Sāūl ke jīte-jī Filistiyon se saḳht jang jāri rahī. Is lie jab bhī koī bahādur aur laṛne ke qābil ādmī nazar āyā to Sāūl ne use apnī fauj meñ bhartī kar liyā.

15

Tamām Amālīqiyōñ ko Halāk Karne kā Hukm

¹ Ek dīn Samuel ne Sāūl ke pās ā kar us se bāt kī, “Rab hī ne mujhe āp ko masah karke Isrāīl par muqarrar karne kā hukm diyā thā. Ab Rab kā paighām sun leñ!

² Rabbul-afwāj farmātā hai, ‘Maiñ Amālīqiyōñ kā merī qaum ke sāth sulūk nahīn bhūl saktā. Us waqt jab Isrāīlī Misr se nikal kar Kanān kī taraf safr kar rahe the to Amālīqiyōñ ne rāstā band kar diyā thā.

³ Ab waqt ā gayā hai ki tū un par hamlā kare. Sab kuchh tabāh karke mere hawāle kar de. Kuchh bhī bachne na de, balki tamām mardoñ, auratoñ, bachchoñ shīrkhāroñ samet, gāy-bailoñ, bher-bakriyoñ, ūñtoñ aur gadhoñ ko maut ke ghāṭ utār de.’ ”

⁴ Sāūl ne apne faujiyoñ ko bulā kar Talāym meñ un kā jāyzā liyā. Kul 2,00,000 piyāde fauji the, nīz Yahūdāh ke 10,000 afrād.

⁵ Amālīqiyōñ ke shahr ke pās pahuñch kar Sāūl wādī meñ tāk meñ baiṭh gayā.

⁶ Lekin pahle us ne Qīniyoñ ko khabar bhejī, “Amālīqiyōñ se alag ho kar un ke pās se chale jāeñ, warnā āp un ke sāth halāk ho jāenge. Kyōñki jab Isrāīlī Misr se nikal kar registān meñ safr kar rahe the to āp ne un par mehrbānī kī thī.” Yih khabar milte hī Qīnī Amālīqiyōñ se alag ho kar chale gae.

⁷ Tab Sāūl ne Amālīqiyōñ par hamlā karke unheñ Hawīlā se le kar Misr kī mashriqī sarhad Shūr tak shikast dī.

⁸ Pūrī qaum ko talwār se mārā gayā, sirf un kā bādshāh Ajāj zindā pakarā gayā.

⁹ Sāul aur us ke faujiyon ne use zindā chhoṛ diyā. Isī tarah sab se achchhī bheṛ-bakriyon, gāy-bailon, moṭe-tāze bachhron aur chīdā bheṛ ke bachchon ko bhī chhoṛ diyā gayā. Jo bhī achchhā thā bach gayā, kyonki Isrāīliyon kā dil nahīn kartā thā ki tandurust aur moṭe-tāze jānwaron ko halāk karen. Unhon ne sirf un tamām kamzor jānwaron ko khatm kiyā jin kī qadar-o-qīmat na thī.

Farmānbardārī Qurbāniyon se Aham Hai

¹⁰ Phir Rab Samuel se hamkalām huā,

¹¹ “Mujhe dukh hai ki main ne Sāul ko bādshāh banā liyā hai, kyonki us ne mujh se dūr ho kar merā hukm nahīn mānā.” Samuel ko itnā ghussā āyā ki wuh pūrī rāt buland āwāz se Rab se fariyād kartā rahā.

¹² Agle din wuh uṭh kar Sāul se milne gayā. Kisī ne use batāyā, “Sāul Karmil chalā gayā. Wahān apne lie yādgār kharā karke wuh āge Jiljāl chalā gayā hai.”

¹³ Jab Samuel Jiljāl pahuñchā to Sāul ne kahā, “Mubāarak ho! Main ne Rab kā hukm pūrā kar diyā hai.”

¹⁴ Samuel ne pūchhā, “Jānwaron kā yih shor kahān se ā rahā hai? Bheṛ-bakriyān mamayā rahī aur gāy-bail dākrā rahe haiñ.”

¹⁵ Sāul ne jawāb diyā, “Yih Amālīqiyon ke hān se lāe gae haiñ. Faujiyon ne sab se achchhe gāy-bailon aur bheṛ-bakriyon ko zindā chhoṛ diyā tāki unheñ Rab āp ke Kḥudā ke huzūr qurbān

kareñ. Lekin ham ne bāqī sab ko Rab ke hawāle karke mār diyā.”

16 Samuel bolā, “Ḳhāmosh! Pahle wuh bāt sun leñ jo Rab ne mujhe pichhlī rāt farmāi.” Sāul ne jawāb diyā, “Batāeñ.”

17 Samuel ne kahā, “Jab āp tamām qaum ke rāhnumā ban gae to ehsās-e-kamtari kā shikār the. To bhī Rab ne āp ko masah karke Isrāil kā bādshāh banā diyā.

18 Aur us ne āp ko bhej kar hukm diyā, ‘Jā aur Amālīqiyon ko pūre taur par halāk karke mere hawāle kar. Us waqt tak in sharīr logon se laṭā rah jab tak wuh sab ke sab miṭ na jāeñ.’

19 Ab mujhe batāeñ ki āp ne Rab kī kyon na sunī? Āp lūṭe hue māl par kyon ṭuṭ paṛe? Yih to Rab ke nazdik gunāh hai.”

20 Sāul ne etarāz kiyā, “Lekin main ne zarūr Rab kī sunī. Jis maqsad ke lie Rab ne mujhe bhejā wuh main ne pūrā kar diyā hai, kyonki main Amālīq ke bādshāh Ajāj ko giriftār karke yahān le āyā aur bāqī sab ko maut ke ghāṭ utār kar Rab ke hawāle kar diyā.

21 Mere fauji lūṭe hue māl meñ se sirf sab se achchhī bheṛ-bakriyān aur gāy-bail chun kar le āe, kyonki wuh unheñ yahān Jiljāl meñ Rab āp ke Ḳhudā ke huzūr qurbān karnā chāhte the.”

22 Lekin Samuel ne jawāb diyā, “Rab ko kyā bāt zyādā pasand hai, āp kī bhasm hone wālī aur zabah kī qurbāniyān yā yih ki āp us kī sunte haiñ? Sunanā qurbānī se kahīn behtar aur dhyān denā mendhe kī charbī se kahīn umdā hai.

23 Sarkashī ḡhaibdānī ke gunāh ke barābar hai aur ḡhurūr butparastī ke gunāh se kam nahīn hotā. Āp ne Rab kā hukm radd kiyā hai, is lie us ne āp ko radd karke bādshāh kā ohdā āp se chhīn liyā hai.”

24 Tab Sāūl ne iqrār kiyā, “Mujh se gunāh huā hai. Maiñ ne āp kī hidāyat aur Rab ke hukm kī khilāfwarzī kī hai. Maiñ ne logoñ se ḡar kar un kī bāt mān lī.

25 Lekin ab mehrbānī karke mujhe muāf karen aur mere sāth wāpas āen tāki maiñ āp kī maujūdagī meñ Rab kī parastish kar sakūñ.”

26 Lekin Samuel ne jawāb diyā, “Maiñ āp ke sāth wāpas nahīn chalūngā. Āp ne Rab kā kalām radd kiyā hai, is lie Rab ne āp ko radd karke bādshāh kā ohdā āp se chhīn liyā hai.”

27 Samuel muḡ kar wahāñ se chalne lagā, lekin Sāūl ne us ke choḡhe kā dāman itne zor se pakaḡ liyā ki wuh phaḡ kar us ke hāth meñ rah gayā.

28 Samuel bolā, “Jis tarah kapḡā phaḡ kar āp ke hāth meñ rah gayā bilkul usī tarah Rab ne āj hī Isrāīl par āp kā iḡhtiyār āp se chhīn kar kisī aur ko de diyā hai, aise shaḡhs ko jo āp se kahīñ behtar hai.

29 Jo Isrāīl kī shān-o-shaukat hai wuh na jhūḡ boltā, na kabhī apnī soch ko badaltā hai, kyōñki wuh insān nahīn ki ek bāt kah kar bād meñ use badle.”

30 Sāūl ne dubārā minnat kī, “Beshak maiñ ne gunāh kiyā hai. Lekin barāh-e-karm kam az kam merī qaum ke buzurgoñ aur Isrāīl ke sāmne to merī izzat karen. Mere sāth wāpas āen tāki

main āp kī maujūdagī meñ Rab āp ke Ḳhudā kī parastish kar sakūn.”

³¹ Tab Samuel mān gayā aur Sāūl ke sāth dūsroñ ke pās wāpas āyā. Sāūl ne Rab kī parastish kī,

³² phir Samuel ne elān kiyā, “Amālīq ke bādshāh Ajāj ko mere pās le āo!” Ajāj itmīnān se Samuel ke pās āyā, kyonki us ne sochā, “Beshak maut kā ḳhatrā ṭal gayā hai.”

³³ Lekin Samuel bolā, “Terī talwār se beshumār māeñ apne bachchoñ se mahrūm ho gaī haiñ. Ab terī mān bhī beaulād ho jāegī.” Yih kah kar Samuel ne wahīñ Jiljāl meñ Rab ke huzūr Ajāj ko talwār se ṭukre ṭukre kar diyā.

³⁴ Phir wuh Rāmā wāpas chalā gayā, aur Sāūl apne ghar gayā jo Jibiyā meñ thā.

³⁵ Is ke bād Samuel jite-jī Sāūl se kabhī na milā, kyonki wuh Sāūl kā mātām kartā rahā. Lekin Rab ko dukh thā ki main ne Sāūl ko Isrāīl par kyon muqarrar kiyā.

16

Nae Bādshāh Dāūd ko Muqarrar Kiyā Jātā Hai

¹ Ek din Rab Samuel se hamkalām huā, “Tū kab tak Sāūl kā mātām karegā? Maiñ ne to use radd karke bādshāh kā ohdā us se le liyā hai. Ab mendhe kā sīng zaitūn ke tel se bhar kar Baitlaham chalā jā. Wahāñ ek ādmī se mil jis kā nām Yassī hai. Kyonki main ne us ke beṭoñ meñ se ek ko chun liyā hai ki wuh nayā bādshāh ban jāe.”

² Lekin Samuel ne etarāz kiyā, “Maiñ kis tarah jā saktā hūñ? Sāūl yih sun kar mujhe mār ḍalegā.” Rab ne jawāb diyā, “Ek jawān gāy apne

sāth le kar logoñ ko batā de ki maiñ ise Rab ke huzūr qurbān karne ke lie āyā hūñ.

³ Yassī ko dāwat de ki wuh qurbānī kī ziyāfat meñ sharīk ho jāe. Āge maiñ tujhe batāūngā ki kyā karnā hai. Maiñ tujhe dikhāūngā ki kis beṭe ko mere lie masah karke chun lenā hai.”

⁴ Samuel mān gayā. Jab wuh Bait-laham pahuñch gayā to log chaunk uṭhe. Larazte larazte shahr ke buzurg us se milne āe aur pūchhā, “Ḳhairiyat to hai ki āp hamāre pās ā gae haiñ?”

⁵ Samuel ne unheñ tasallī de kar kahā, “Ḳhairiyat hai. Maiñ Rab ke huzūr qurbānī pesh karne ke lie āyā hūñ. Apne āp ko Rab ke lie maḵsūs-o-muḳaddas karen aur phir mere sāth qurbānī kī ziyāfat meñ sharīk ho jāeñ.” Samuel ne Yassī aur us ke beṭoñ ko bhī dāwat dī aur unheñ apne āp ko maḵsūs-o-muḳaddas karne ko kahā.

⁶ Jab Yassī apne beṭoñ samet qurbānī kī ziyāfat ke lie āyā to Samuel kī nazar Iliyāb par paṛī. Us ne sochā, “Beshak yih wuh hai jise Rab masah karke bādshāh banānā chāhtā hai.”

⁷ Lekin Rab ne farmāyā, “Is kī shakl-o-sūrat aur lambe qad se muta'assir na ho, kyonki yih mujhe nāmanzūr hai. Maiñ insān kī nazar se nahīñ deḳhtā. Kyonki insān zāhirī sūrat par ḡhaur karke faislā kartā hai jabki Rab ko har ek kā dil sāf sāf nazar ātā hai.”

⁸ Phir Yassī ne apne dūsre beṭe Abīnadāb ko bulā kar Samuel ke sāmne se guzarne diyā. Samuel bolā, “Nahīñ, Rab ne ise bhī nahīñ chunā.”

⁹ Is ke bād Yassī ne tīsre beṭe Sammā ko pesh kiyā. Lekin yih bhī nahīn chunā gayā thā.

¹⁰ Yoñ Yassī ne apne sāt beṭon ko ek ek karke Samuel ke sāmne se guzarne diyā. In meñ se koī Rab kā chunā huā bādshāh na niklā.

¹¹ Āḡhirkār Samuel ne pūchhā, “In ke alāwā koī aur beṭā to nahīn hai?” Yassī ne jawāb diyā, “Sab se chhoṭā beṭā abhī bāqī rah gayā hai, lekin wuh bāhar kheton meñ bheṛ-bakriyon kī nigarānī kar rahā hai.” Samuel ne kahā, “Use fauran bulā leñ. Us ke āne tak ham khāne ke lie nahīn baiṭheñge.”

¹² Chunāñche Yassī chhoṭe ko bulā kar andar le āyā. Yih beṭā gorā thā. Us kī āñkheñ ḡhūbsūrat aur shakl-o-sūrat qābil-e-tārīf thī. Rab ne Samuel ko batāyā, “Yihī hai. Uṭh kar ise masah kar.”

¹³ Samuel ne tel se bharā huā mendhe kā sīng le kar use Dāūd ke sar par unḡel diyā. Sab bhāī maujūd the. Usī waqt Rab kā Rūh Dāūd par nāzil huā aur us kī sārī umr us par ṭhahrā rahā. Phir Samuel Rāmā wāpas chalā gayā.

Dāūd Sāul ko Badrūh se Ārām Dilātā Hai

¹⁴ Lekin Rab ke Rūh ne Sāul ko chhoṛ diyā thā. Is ke bajāe Rab kī taraf se ek burī rūh use dahshatzadā karne lagī.

¹⁵ Ek din Sāul ke mulāzimon ne us se kahā, “Allāh kī taraf se ek burī rūh āp ke dil meñ dahshat paidā kar rahī hai.

¹⁶ Hamārā āqā apne ḡhādimon ko hukm de ki wuh kisī ko ḡhūnḡ lāeñ jo sarod bajā sake. Jab bhī Allāh kī taraf se yih burī rūh āp par āe to wuh apnā sāz bajā kar āp ko sukūn dilāegā.”

17 Sāūl ne jawāb diyā, “Ṭhīk hai, aisā hī karo. Kisī ko bulā lāo jo sāz bajāne meñ māhir ho.”

18 Ek mulāzim bolā, “Maiñ ne ek ādmī ko dekhā hai jo ḳhūb bajā saktā hai. Wuh Baitlaham ke rahne wāle Yassī kā beṭā hai. Wuh na sirf mahārat se sarod bajā saktā hai balki baṛā jangjū bhī hai. Yih bhī us kī ek ḳhūbī hai ki wuh har mauṇe par samajhdārī se bāt kar saktā hai. Aur wuh ḳhūbsūrat bhī hai. Rab us ke sāth hai.”

19 Sāūl ne fauran apne qāsidoñ ko Yassī ke pās bhej kar use ittalā dī, “Apne beṭe Dāūd ko jo bheṛ-bakriyoñ ko sañbhāltā hai mere pās bhej denā.”

20 Yih sun kar Yassī ne roṭī, mai kā mashkizā aur ek jawān bakrī gadhe par lād kar Dāūd ke hawāle kar dī aur use Sāūl ke darbār meñ bhej diyā.

21 Is tarah Dāūd Sāūl kī ḳhidmat meñ hāzir ho gayā. Wuh bādshāh ko bahut pasand āyā balki Sāūl ko itnā pyārā lagā ki use apnā silāhbardār banā liyā.

22 Sāūl ne Yassī ko ittalā bhejī, “Dāūd mujhe bahut pasand āyā hai, is lie use mustaqil taur par merī ḳhidmat karne kī ijāzat deñ.”

23 Aur jab bhī burī rūh Sāūl par ātī to Dāūd apnā sarod bajāne lagtā. Tab Sāūl ko sukūn miltā aur burī rūh us par se dūr ho jātī.

17

Jātī Jālūt

1 Ek din Filistiyon ne apni fauj ko Yahūdāh ke shahr Sokā ke qarīb jamā kiyā. Wuh Ifas-dammīm meñ khaimāzan hue jo Sokā aur Azīqā ke darmiyān hai.

2 Jawāb meñ Sāul ne apni fauj ko bulā kar Wādī-e-Ailā meñ jamā kiyā. Wahān Isrāīl ke mard jang ke lie tartīb se khaṛe hue.

3 Yoñ Filistī ek pahārī par khaṛe the aur Isrāīlī dūsri pahārī par. Un ke bīch meñ wādī thī.

4 Phir Filistī safon se Jāt Shahr kā pahalwān nikal kar Isrāīliyon ke sāmne kharā huā. Us kā nām Jālūt thā aur wuh 9 fuṭ se zyādā lambā thā.

5 Us ne hifāzat ke lie pītal kī kaī chīzeñ pahan rakhī thīn: sar par khod, dhaṛ par zirābaktar jo 57 kilogrām waznī thā

6 aur pindliyon par baktar. Kandhon par pītal kī shamshīr laṭkī huī thī.

7 Jo nezā wuh pakar kar chal rahā thā us kā dastā khaḍḍī ke shahtīr jaisā moṭā aur lambā thā, aur us ke lohe kī nok kā wazn 7 kilogrām se zyādā thā. Jālūt ke āge āge ek ādmī us kī ḍhāl uṭhāe chal rahā thā.

8 Jālūt Isrāīlī safon ke sāmne ruk kar garjā, “Tum sab kyon laṛne ke lie saf-ārā ho gae ho? Kyā main Filistī nahīn hūn jabki tum sirf Sāul ke naukar-chākar ho? Chalo, ek ādmī ko chun kar use yahān nīche mere pās bhej do.

9 Agar wuh mujh se laṛ sake aur mujhe mār de to ham tumhāre ḡhulām ban jāenge. Lekin agar main us par ḡhālib ā kar use mār ḍālūn to tum hamāre ḡhulām ban jāoge.

10 Āj main Isrāīlī safon kī badnāmī karke unheñ chailenḡ kartā hūn ki mujhe ek ādmī do

jo mere sāth laṛe.”

¹¹ Jālūt kī yih bāteñ sun kar Sāul aur tamām Isrāīlī ghabrā gae. Aur un par dahshat tārī ho gaī.

Dāūd Bhāiyōñ se Milne ke lie Fauj ke pās Jātā Hai

¹² Us waqt Dāūd kā bāp Yassī kāfī būrḥā ho chukā thā. Us ke kul 8 beṭe the, aur wuh Ifrātā ke ilāqe ke Bait-laham meñ rahtā thā.

¹³ Lekin us ke tīn sab se baṛe beṭe Filistiyōñ se laṛne ke lie Sāul kī fauj meñ bhartī ho gae the. Sab se baṛe kā nām Iliyāb, dūsre kā Abīnadāb aur tīsre kā Sammā thā.

¹⁴⁻¹⁵ Dāūd to sab se chhoṭā bhāī thā. Wuh dūsroñ kī tarah pūrā waqt Sāul ke pās na guzār sakā, kyonki use bāp kī bheṛ-bakriyōñ ko sañbhālne kī zimmedārī dī gaī thī. Is lie wuh ātā jātā rahā. Chunāñche wuh maujūd nahīn thā

¹⁶ jab Jālūt 40 din subh-o-shām Isrāīliyōñ kī safoñ ke sāmne khaṛe ho kar unheñ chailenj kartā rahā.

¹⁷ Ek din Yassī ne Dāūd se kahā, “Beṭā, apne bhāiyōñ ke pās kaimp meñ jā kar un kā patā karo. Bhune hue anāj ke yih 16 kilogrām aur yih das roṭiyāñ apne sāth le kar jaldī jaldī udhar pahuñch jāo.

¹⁸ Panīr kī yih das ṭikkīyāñ un ke kaptān ko de denā. Bhāiyōñ kā hāl mālūm karke un kī kōī chīz wāpas le āo tāki mujhe tasallī ho jāe ki wuh ṭhīk haiñ.

¹⁹ Wuh Wādī-e-Ailā meñ Sāul aur Isrāīlī fauj ke sāth Filistiyōñ se laṛ rahe haiñ.”

²⁰ Agle din subah-sawere Dāūd ne rewar ko kisi aur ke sapurd karke sāmān uṭhāyā aur Yassī kī hidāyat ke mutābiq chalā gayā. Jab wuh kaimp ke pās pahuñch gayā to Isrāīlī faujī nāre lagā lagā kar maidān-e-jang ke lie nikal rahe the.

²¹ Wuh larne ke lie tartīb se khare ho gae. Aur dūsri taraf Filistī safeñ bhī taiyār huñ.

²² Yih dekh kar Dāūd ne apnī chizeñ us admī ke pās chhoṛ diñ jo lashkar ke sāmān kī nigarānī kar rahā thā, phir bhāg kar maidān-e-jang meñ bhāiyōñ se milne chalā gayā.

Wuh abhī un kā hāl pūchh hī rahā thā

²³ ki Jātī Jālūt māmūl ke mutābiq Filistiyōñ kī safōñ se nikal kar Isrāīliyōñ ke sāmne wuhī tanz kī bāteñ bakne lagā. Dāūd ne bhī us kī bāteñ sunīñ.

²⁴ Jālūt ko dekhte hī Isrāīliyōñ ke roñgṭe khare ho gae. Aur wuh bhāg kar

²⁵ āpas meñ kahne lage, “Kyā āp ne is admī ko hamārī taraf barhte hue dekhā? Suneñ ki wuh kis tarah hamārī badnāmī karke hameñ chailenj kar rahā hai. Bādshāh ne elān kiyā hai ki jo shaḥs ise mār de use barā ajr milegā. Shahzādī se us kī shādī hogī, aur āindā us ke bāp ke ḡhāndān ko ṭaiks nahīñ denā paregā.”

²⁶ Dāūd ne sāth wāle faujiyōñ se pūchhā, “Kyā kah rahe haiñ? Us admī ko kyā inām milegā jo is Filistī ko mār kar hamārī qaum kī ruswāi dūr karegā? Yih nāmaḡhtūn Filistī kaun hai ki zindā Ḡhudā kī fauj kī badnāmī karke use chailenj kare!”

²⁷ Logoñ ne dubārā Dāūd ko batāyā ki bādshāh us admī ko kyā degā jo Jālūt ko mār ḡālegā.

28 Jab Dāūd ke baṛe bhāī Iliyāb ne Dāūd kī bāteñ sunīn to use ḡhussā āyā aur wuh use jhīrakne lagā, “Tū kyon āyā hai? Bayābān meñ apnī chand ek bheṛ-bakriyon ko kis ke pās chhoṛ āyā hai? Maiñ terī shoḡhī aur dil kī sharārat ḡhūb jāntā hūñ. Tū sirf jang kā tamāshā deḡhne āyā hai!”

29 Dāūd ne pūchhā, “Ab mujh se kyā ḡhaltī huī? Maiñ ne to sirf sawāl pūchhā.”

30 Wuh us se muṛ kar kisī aur ke pās gayā aur wuhī bāt pūchhne lagā. Wuhī jawāb milā.

Hathiyār kā Chunāo

31 Dāūd kī yih bāteñ sun kar kisī ne Sāūl ko ittalā dī. Sāūl ne use fauran bulāyā.

32 Dāūd ne bādshāh se kahā, “Kisī ko is Filistī kī wajah se himmat nahīn hārnā chāhie. Maiñ us se laṛūngā.”

33 Sāūl bolā, “Āp? Āp jaisā laṛkā kis tarah us kā muḡābalā kar saktā hai? Āp to abhī bachche se ho jābki wuh tajrabākār jangjū hai jo jawānī se hathiyār istemāl kartā āyā hai.”

34 Lekin Dāūd ne isrār kiyā, “Maiñ apne bāp kī bheṛ-bakriyon kī nigarānī kartā hūñ. Jab kabhī koī sherbabar yā rīchh rewaṛ kā jānwar chhīn kar bhāg jātā

35 to maiñ us ke pīchhe jātā aur use mār mār kar bheṛ ko us ke muñh se chhuṛā letā thā. Agar sher yā rīchh jawāb meñ mujh par hamlā kartā to maiñ us ke sar ke bāloñ ko pakaṛ kar use mār detā thā.

36 Is tarah āp ke ḡhādīm ne kāī sheron aur rīchhoñ ko mār ḡālā hai. Yih nāmaḡhtūn bhī

un kī tarah halāk ho jāegā, kyonki us ne zindā ẖudā kī fauj kī badnāmī karke use chaileñj kiyā hai.

³⁷ Jis Rab ne mujhe sher aur rīchh ke panje se bachā liyā hai wuh mujhe is Filistī ke hāth se bhī bachāegā.”

Sāul bolā, “Ṭhīk hai, jāeñ aur Rab āp ke sāth ho.”

³⁸ Us ne Dāūd ko apnā zirābaktar aur pītal kā ẖhod pahnāyā.

³⁹ Phir Dāūd ne Sāul kī talwār bāndh kar chalne kī koshish kī. Lekin use bahut mushkil lag rahā thā. Us ne Sāul se kahā, “Maiñ yih chīzeñ pahan kar nahīñ laṛ saktā, kyonki maiñ in kā ādi nahīñ hūñ.” Unheñ utār kar

⁴⁰ us ne nadī se pāñch chikne chikne patthar chun kar unheñ apnī charwāhe kī thailī meñ ḍāl liyā. Phir charwāhe kī apnī lāṭhī aur falāḅhan pakaṛ kar wuh Filistī se laṛne ke lie Isrāīlī safon se niklā.

Dāūd kī Fatah

⁴¹ Jālūt Dāūd kī jānib barhā. Dhāl ko uṭhāne wālā us ke āge āge chal rahā thā.

⁴² Us ne hiqāratāmez nazon se Dāūd kā jāyzā liyā, kyonki wuh gorā aur ẖhūbsūrat naujawān thā.

⁴³ Wuh garjā, “Kyā maiñ kuttā hūñ ki tū lāṭhī le kar merā muqābalā karne āyā hai?” Apne dewatāon ke nām le kar wuh Dāūd par lānat bhej kar

⁴⁴ chillāyā, “Idhar ā tāki maiñ terā gosht parindoñ aur janglī jānwaron ko khilāūñ.”

45 Dāūd ne jawāb diyā, “Āp talwār, nezā aur shamshīr le kar merā muqābalā karne āe haiñ, lekin main Rabbul-afwāj kā nām le kar ātā hūñ, usī kā nām jo Isrāīlī fauj kā Ḳhudā hai. Kyonki āp ne usī ko chailēñj kiyā hai.

46 Āj hī Rab āp ko mere hāth meñ kar degā, aur main āp kā sar qalam kar dūngā. Isī din main Filistī faujiyon kī lāsheñ parindon aur janglī jānwaron ko khilā dūngā. Tab tamām duniyā jān legī ki Isrāīl kā Ḳhudā hai.

47 Sab jo yahāñ maujūd haiñ jān leñge ki Rab ko hameñ bachāne ke lie talwār yā neze kī zarūrat nahīñ hotī. Wuh ḳhud hī jang kar rahā hai, aur wuhī āp ko hamāre qabze meñ kar degā.”

48 Jālūt Dāūd par hamlā karne ke lie āge barhā, aur Dāūd bhī us kī taraf dauṛā.

49 Chalthe chalthe us ne apnī thailī se patthar nikālā aur use falāḳhan meñ rakh kar zor se chalāyā. Patthar uṛtā uṛtā Filistī ke mātthe par jā lagā. Wuh khopaṛī meñ dhañs gayā, aur pahalwān muñh ke bal gir gayā.

50-51 Yon Dāūd falāḳhan aur patthar se Filistī par ghālib āyā. Us ke hāth meñ talwār nahīñ thī. Tab us ne Jālūt kī taraf dauṛ kar usī kī talwār miyān se khīñch kar Filistī kā sar kāṭ ḍālā.

Jab Filistiyon ne dekhā ki hamārā pahalwān halāk ho gayā hai to wuh bhāg nikle.

52 Isrāīl aur Yahūdāh ke mard fatah ke nāre lagā lagā kar Filistiyon par tūt paṛe. Un kā tāqqub karte karte wuh Jāt aur Aqrūn ke darwāzon tak pahuñch gae. Jo rāstā Shāraim

se Jāt aur Aqrūn tak jātā hai us par har taraf Filistiyōn kī lāsheñ nazar āññ.

⁵³ Phir Isrāīliyōn ne wāpas ā kar Filistiyōn kī chhoṛī huī lashkargāh ko lūṭ liyā.

⁵⁴ Bād meñ Dāūd Jālūt kā sar Yarūshalam ko le āyā. Filistī ke hathiyār us ne apne ḡhaimē meñ rakh lie.

Sāul Dāūd ke Ḳhāndān kā Patā Kartā Hai

⁵⁵ Jab Dāūd Jālūt se laṛne gayā to Sāul ne fauj ke kamānḍar Abinair se pūchhā, “Is jawān ādmī kā bāp kaun hai?” Abinair ne jawāb diyā, “Āp kī hayāt kī ḡasam, mujhe mālūm nahīñ.”

⁵⁶ Bādshāh bolā, “Phir patā karen!”

⁵⁷ Jab Dāūd Filistī kā sar ḡalam karke wāpas āyā to Abinair use bādshāh ke pās lāyā. Dāūd abhī Jālūt kā sar uṭhāe phir rahā thā.

⁵⁸ Sāul ne pūchhā, “Āp kā bāp kaun hai?” Dāūd ne jawāb diyā, “Maiñ Bait-laham ke rahne wāle āp ke ḡhādim Yassī kā beṭā hūñ.”

18

Dāūd aur Yūnatan kī Dostī

¹ Is guftgū ke bād Dāūd kī mulāḡāt bādshāh ke beṭe Yūnatan se huī. Un meñ fauran ḡahrī dostī paidā ho gaī, aur Yūnatan Dāūd ko apnī jān ke barābar azīz rakhne lagā.

² Us din se Sāul ne Dāūd ko apne darbār meñ rakh liyā aur use bāp ke ḡhar wāpas jāne na diyā.

³ Aur Yūnatan ne Dāūd se ahd bāndhā, kyoñki wuh Dāūd ko apnī jān ke barābar azīz rakhtā thā.

⁴ Ahd kī tasdīq ke lie Yūnatan ne apnā choḡhā utār kar use apne zirābaktar, talwār, kamān aur peṭī samet Dāūd ko de diyā.

⁵ Jahān bhī Sāūl ne Dāūd ko laṛne ke lie bhejā wahān wuh kāmyāb huā. Yih dekh kar Sāūl ne use fauj kā baṛā afsar banā diyā. Yih bāt awām aur Sāūl ke afsaroṅ ko pasand āi.

Sāūl Dāūd se Hasad Kartā Hai

⁶ Jab Dāūd Filistiyon ko shikast dene se wāpas āyā to tamām shahron se aurateṅ nikal kar Sāūl Bādshāh se milne āin. Daf aur sāz bajāte hue wuh ḡhushī ke gīt gā gā kar nāchne lagīn.

⁷ Aur nāchte nāchte wuh gātī rahīn, “Sāūl ne to hazār halāk kie jabki Dāūd ne das hazār.”

⁸ Sāūl baṛe ḡhusse meṅ ā gayā, kyonki auraton kā gīt use nihāyat burā lagā. Us ne sochā, “Un kī nazar meṅ Dāūd ne das hazār halāk kie jabki maiṅ ne sirf hazār. Ab sirf yih bāt rah gāi hai ki use bādshāh muḡarrar kiyā jāe.”

⁹ Us waqt se Sāūl Dāūd ko shak kī nazar se dekhne lagā.

¹⁰⁻¹¹ Agle din Allāh ne dubārā Sāūl par burī rūh āne dī, aur wuh ghar ke andar wajd kī hālat meṅ ā gayā. Dāūd māmūl ke mutābiq sāz bajāne lagā tāki bādshāh ko sukūn mile. Sāūl ke hāth meṅ nezā thā. Achānak us ne use phaiṅk kar Dāūd ko dīwār ke sāth chhed ḡalne kī koshish kī. Lekin Dāūd ek taraf haṭ kar bach niklā. Ek aur dafā aisā huā, lekin Dāūd phir bach gayā.

¹² Yih dekh kar Sāūl Dāūd se ḡarne lagā, kyonki us ne jān liyā ki Rab mujhe chhoṛ kar Dāūd kā hāmī ban gayā hai.

13 Ākhirkār us ne Dāūd ko darbār se dūr karke hazār faujiyoṅ par muqarrar kar diyā. In ādmiyoṅ ke sāth Dāūd muḳhtalif jangoṅ ke lie nikaltā rahā.

14 Aur jo kuchh bhī wuh kartā us meṅ kāmyāb rahtā, kyonki Rab us ke sāth thā.

15 Jab Sāūl ne dekhā ki Dāūd ko kitnī zyādā kāmyābī huī hai to wuh us se mazīd dar gayā.

16 Lekin Isrāīl aur Yahūdāh ke bāqī log Dāūd se bahut muhabbat rakhte the, kyonki wuh har jang meṅ nikalte waqt se le kar ghar wāpas āte waqt tak un ke āge āge chaltā thā.

Dāūd Sāūl kā Dāmād Ban Jātā Hai

17 Ek din Sāūl ne Dāūd se bāt kī, “Maiṅ apnī baṛī beṭī Mīrab kā rishtā āp ke sāth bāndhnā chāhtā hūn. Lekin pahle sābit karen ki āp achchhe faujī haiṅ, jo Rab kī jangoṅ meṅ ḳhūb hissā le.” Lekin dil hī dil meṅ Sāūl ne sochā, “Ḳhud to maiṅ Dāūd par hāth nahīn uṭhāūngā, behtar hai ki wuh Filistiyōṅ ke hāthoṅ mārā jāe.”

18 Lekin Dāūd ne etarāz kiyā, “Maiṅ kaun hūn ki bādshāh kā dāmād banūn? Isrāīl meṅ to mere ḳhāndān aur ābāi kunbe kī koī haisiyat nahīn.”

19 To bhī shādī kī taiyāriyān kī gain. Lekin jab muqarrarā waqt ā gayā to Sāūl ne Mīrab kī shādī ek aur ādmī banām Adriyel Mahūlātī se karwā dī.

20 Itne meṅ Sāūl kī chhoṭī beṭī Mīkal Dāūd se muhabbat karne lagī. Jab Sāūl ko is kī ḳhabar milī to wuh ḳhush huā.

21 Us ne sochā, “Ab maiṅ beṭī kā rishtā us ke sāth bāndh kar use yoṅ phaṅsā dūngā ki wuh

Filistiyon se larṭe larṭe mar jāegā.” Dāūd se us ne kahā, “Āj āp ko merā dāmād banane kā dubārā mauqā milegā.”

22 Phir us ne apne mulāzimon ko hukm diyā ki wuh chupke se Dāūd ko bataēn, “Suneñ, āp bādshāh ko pasand haiñ, aur us ke tamām afsar bhī āp ko pyār karte haiñ. Āp zarūr bādshāh kī peshkash qabūl karke us kā dāmād ban jāēn.”

23 Lekin Dāūd ne etarāz kiyā, “Kyā āp kī dānist meñ bādshāh kā dāmād bananā chhoṭī-sī bāt hai? Maiñ to ḡharīb ādmī hūñ, aur merī koī haisiyat nahīn.”

24 Mulāzimon ne bādshāh ke pās wāpas jā kar use Dāūd ke alfāz bataē.

25 Sāūl ne unheñ phir Dāūd ke pās bhej kar use ittalā dī, “Bādshāh mahr ke lie paise nahīn māngtā balki yih ki āp un ke dushmanon se badlā le kar 100 Filistiyon ko qatl kar deñ. Sabūt ke taur par āp ko un kā ḡhatnā karke jild kā kaṭā huā hissā bādshāh ke pās lānā paṛegā.” Shart kā maqsad yih thā ki Dāūd Filistiyon ke hāthon mārā jāe.

26 Jab Dāūd ko yih ḡhabar milī to use Sāūl kī peshkash pasand āī. Muḡarrarā waqt se pahle

27 us ne apne ādmiyon ke sāth nīkal kar 200 Filistiyon ko mār diyā. Lāshon kā ḡhatnā karke wuh jild ke kul 200 ṭukṛe bādshāh ke pās lāyā tāki bādshāh kā dāmād bane. Yih dekh kar Sāūl ne us kī shādī Mīkal se karwā dī.

28 Sāūl ko mānanā paṛā ki Rab Dāūd ke sāth hai aur ki merī beṭī Mīkal use bahut pyār kartī hai.

²⁹ Tab wuh Dāūd se aur bhī ḍarne lagā. Is ke bād wuh jite-jī Dāūd kā dushman banā rahā.

³⁰ Un dinon meñ Filistī sardār Isrāīl se laṛte rahe. Lekin jab bhī wuh jang ke lie nikle to Dāūd Sāūl ke bāqī afsaron kī nisbat zyādā kāmyāb hotā thā. Natīje meñ us kī shohrat pūre mulk meñ phail gaī.

19

Yūnatan Dāūd kī Sifārish Kartā Hai

¹ Ab Sāūl ne apne beṛe Yūnatan aur tamām mulāzimon ko sāf batāyā ki Dāūd ko halāk karnā hai. Lekin Dāūd Yūnatan ko bahut pyārā thā,

² is lie us ne use āgāh kiyā, “Merā bāp āp ko mār dene ke mawāqe dhūnd rahā hai. Kal subah khabardār raheñ. Kāhīn chhup kar merā intazār kareñ.

³ Phir maiñ apne bāp ke sāth shahr se nikal kar āp ke qarīb se guzarūnga. Wahān maiñ un se āp kā muāmalā chheṛ kar mālūm karūnga ki wuh kyā irādā rakhte haiñ. Jo kuchh bhī wuh kaheñge maiñ āp ko batā dūngā.”

⁴ Aglī subah jab Yūnatan ne apne bāp se bāt kī to us ne Dāūd kī sifārish karke kahā, “Bādshāh apne kḥādīm Dāūd kā gunāh na kareñ, kyonki us ne āp kā gunāh nahīn kiyā balki hameshā āp ke lie faydāmand rahā hai.

⁵ Usī ne apnī jān ko khatre meñ ḍāl kar Filistī ko mār ḍālā, aur Rab ne us ke wasīle se tamām Isrāīl ko baṛī najāt baḥshī. Us waqt āp kḥud bhī sab kuchh dekh kar kḥush hue. To phir āp gunāh karke us jaise bequsūr ādmī ko kyon bilāwajah marwānā chāhte haiñ?”

⁶ Yūnatan kī bāteñ sun kar Sāūl mān gayā. Us ne wādā kiyā, “Rab kī hayāt kī qasam, Dāūd ko mārā nahīn jāegā.”

⁷ Bād meñ Yūnatan ne Dāūd ko bulā kar use sab kuchh batāyā, phir use Sāūl ke pās lāyā. Tab Dāūd pahle kī tarah bādshāh kī k̄hidmat karne lagā.

Sāūl kā Dāūd par Dūsrā Hamlā

⁸ Ek bār phir jang chhiṛ gaī, aur Dāūd nikal kar Filistiyōñ se laṛā. Is dafā bhī us ne unheñ yoñ shikast dī ki wuh farār ho gae.

⁹ Lekin ek din jab Sāūl apnā nezā pakaṛe ghar meñ baiṭhā thā to Allāh kī bhejī huī burī rūh us par ghālib āī. Us waqt Dāūd sarod bajā rahā thā.

¹⁰ Achānak Sāūl ne neze ko phaiñk kar Dāūd ko dīwār ke sāth chhed ḍālne kī koshish kī. Lekin wuh ek taraf haṭ gayā aur nezā us ke qarīb se guzar kar dīwār meñ dhañs gayā. Dāūd bhāg gayā aur us rāt Sāūl ke hāth se bach gayā.

¹¹ Sāūl ne fauran apne ādmiyōñ ko Dāūd ke ghar ke pās bhej diyā tāki wuh makān kī pahrādārī karke Dāūd ko subah ke waqt qatl kar deñ. Lekin Dāūd kī bīwī Mīkal ne us ko āgāh kar diyā, “Āj rāt ko hī yahāñ se chale jāeñ, warnā āp nahīn bacheñge balki kal subah hī mār die jāeñge.”

¹² Chunāanche Dāūd ghar kī khiṛkī meñ se niklā, aur Mīkal ne utarne meñ us kī madad kī. Tab Dāūd bhāg kar bach gayā.

¹³ Mīkal ne Dāūd kī chārpāī par but rakh kar us ke sar par bakriyōñ ke bāl lagā die aur bāqī hisse par kambal bichhā diyā.

14 Jab Sāūl ke ādmī Dāūd ko pakarṇe ke lie āe to Mīkal ne kahā, “Wuh bīmār hai.”

15 Faujiyon ne Sāūl ko ittalā dī to us ne unheñ hukm diyā, “Use chārpāi samet hī mere pās le āo tāki use mār dūn.”

16 Jab wuh Dāūd ko le jāne ke lie āe to kyā dekhte haiñ ki us kī chārpāi par but paṛā hai jis ke sar par bakriyon ke bāl lage haiñ.

17 Sāūl ne apnī beṭī ko bahut jhirkā, “Tū ne mujhe is tarah dhokā de kar mere dushman kī farār hone meñ madad kyon kī? Terī hī wajah se wuh bach gayā.” Mīkal ne jawāb diyā, “Us ne mujhe dhamkī dī ki main tujhe qatl kar dūngā agar tū farār hone meñ merī madad na kare.”

Dāūd Rāmā meñ Samuel ke pās

18 Is tarah Dāūd bach niklā. Wuh Rāmā meñ Samuel ke pās farār huā aur use sab kuchh sunāyā jo Sāūl ne us ke sāth kiyā thā. Phir donoñ mil kar Nayot chale gae. Wahāñ wuh ṭhahre.

19 Sāūl ko ittalā dī gaī, “Dāūd Rāmā ke Nayot meñ ṭhahrā huā hai.”

20 Us ne fauran apne ādmiyon ko use pakarṇe ke lie bhej diyā. Jab wuh pahuñche to dekhā ki nabiyon kā pūrā guroh wahāñ nabuwwat kar rahā hai, aur Samuel khud un kī rāhnumāi kar rahā hai. Unheñ dekhte hī Allāh kā Rūh Sāūl ke ādmiyon par nāzil huā, aur wuh bhī nabuwwat karne lage.

21 Sāūl ko is bāt kī khabar milī to us ne mazīd ādmiyon ko Rāmā bhej diyā. Lekin wuh bhī wahāñ pahuñchte hī nabuwwat karne lage. Sāūl ne tīsri bār ādmiyon ko bhej diyā, lekin yihī kuchh un ke sāth bhī huā.

22 Ākhir meñ Sāul k̄hud Rāmā ke lie rawānā huā. Chalthe chalte wuh sīkū ke bare hauz par pahuñchā. Wahāñ us ne logoñ se pūchhā, “Dāūd aur Samuel kahāñ haiñ?” Unhoñ ne jawāb diyā, “Rāmā kī ābādī Nayot meñ.”

23 Sāul abhī Nayot nahīñ pahuñchā thā ki Allāh kā Rūh us par bhī nāzil huā, aur wuh nabuwwat karte karte Nayot pahuñch gayā.

24 Wahāñ wuh apne kaproñ ko utār kar Samuel ke sāmne nabuwwat kartā rahā. Nabuwwat karte karte wuh zamīn par leṭ gayā aur wahāñ pūre din aur pūrī rāt parā rahā. Isī wajah se yih qaul mashhūr huā, “Kyā Sāul ko bhī nabiyon meñ shumār kiyā jātā hai?”

20

Dāūd aur Yūnatan Ahd Bāndhte Haiñ

1 Ab Dāūd Rāmā ke Nayot se bhī bhāg gayā. Chupke se wuh Yūnatan ke pās āyā aur pūchhā, “Mujh se kyā ḡhaltī huī hai? Merā kyā qusūr hai? Mujh se āp ke bāp ke k̄hilāf kyā jurm sarzad huā hai ki wuh mujhe qatl karnā chāhte haiñ?”

2 Yūnatan ne etarāz kiyā, “Yih kabhī nahīñ ho saktā! Āp nahīñ mareṅge. Merā bāp to mujhe hameshā sab kuchh batā detā hai, k̄hāh bāt baṛī ho yā chhoṭī. To phir wuh aisā koī mansūbā mujh se kyon chhupāe? Āp kī yih bāt sarāsar ḡhalat hai.”

3 Lekin Dāūd ne qasam khā kar isrār kiyā, “Zāhir hai ki āp ko is ke bāre meñ ilm nahīñ. Āp ke bāp ko sāf mālūm hai ki maiñ āp ko pasand hūñ. ‘Wuh to sochte hoṅge, Yūnatan ko is bāt kā ilm na ho, warnā wuh dukh mahsūs karegā.’

Lekin Rab kī aur āp kī jān kī qasam, main̄ baṛe khatre meñ hūñ, aur maut se bachnā mushkil hī hai.”

⁴ Yūnatan ne kahā, “Mujhe batāeñ ki main̄ kyā karūñ to main̄ use karūñga.”

⁵ Tab Dāūd ne apnā mansūbā pesh kiyā. “Kal Nae Chāñd kī Īd hai, aur bādshāh tawaqfo kareñge ki main̄ un kī ziyāfat meñ sharīk hūñ. Lekin is martabā mujhe parsoñ shām tak bāhar khule maidān meñ chhupā rahne kī ijāzat deñ.

⁶ Agar āp ke bāp merā patā kareñ to unheñ kah denā, ‘Dāūd ne baṛe zor se mujh se apne shahr Bait-laham ko jāne kī ijāzat māñgī. Use baṛī jaldī thī, kyonki us kā pūrā khāñdān apnī sālānā qurbānī chaṛhānā chāhtā hai.’

⁷ Agar āp ke bāp jawāb deñ ki thīk hai to phir mālūm hogā ki khatrā ṭal gayā hai. Lekin agar wuh baṛe ḡhusse meñ ā jāeñ to yaqīn jāneñ ki wuh mujhe nuqsān pahuñchāne kā irādā rakhte haiñ.

⁸ Barāh-e-karm mujh par mehrbānī karke yād rakheñ ki āp ne Rab ke sāmne apne khādim se ahd bāñdhā hai. Agar main̄ wāqāi qusūrwar ṭahrūñ to āp khud mujhe mār ḍāleñ. Lekin kisī sūrat meñ bhī mujhe apne bāp ke hawāle na kareñ.”

⁹ Yūnatan ne jawāb diyā, “Fikr na kareñ, main̄ kabhī aisā nahīñ karūñga. Jab bhī mujhe ishārā mil jāe ki merā bāp āp ko qatl karne kā irādā rakhtā hai to main̄ zarūr āp ko fauran ittalā dūñgā.”

¹⁰ Dāūd ne pūchhā, “Agar āp ke bāp ḡhusse meñ jawāb deñ to kaun mujhe khabar

pahuñchāegā?”

¹¹ Yūnatan ne jawāb meñ kahā, “Āeñ ham nikal kar khule maidān meñ jāeñ.” Donoñ nikle

¹² to Yūnatan ne Dāūd se kahā, “Rab Isrāīl ke Ḳhudā kī qasam, parsoñ is waqt tak maiñ apne bāp se bāt mālūm kar lūngā. Agar wuh āp ke bāre meñ achchhī soch rakhe aur maiñ āp ko ittalā na dūñ

¹³ to Rab mujhe saḳht sazā de. Lekin agar mujhe patā chale ki merā bāp āp ko mār dene par tulā huā hai to maiñ āp ko is kī ittalā bhī dūngā. Is sūrat meñ maiñ āp ko nahīñ rokūngā balki āp ko salāmatī se jāne dūngā. Rab usī tarah āp ke sāth ho jis tarah wuh pahle mere bāp ke sāth thā.

¹⁴ Lekin darḳhāst hai ki mere jīte-jī mujh par Rab kī-sī mehrbānī kareñ tāki maiñ mar na jāūñ.

¹⁵ Mere ḳhāndān par bhī hameshā tak mehrbānī kareñ. Wuh kabhī bhī āp kī mehrbānī se mahrūm na ho jāe, us waqt bhī nahīñ jab Rab ne āp ke tamām dushmanoñ ko rū-e-zamīn par se miṭā diyā hogā.”

¹⁶ Chunāñche Yūnatan ne Dāūd se ahd bāndh kar kahā, “Rab Dāūd ke dushmanoñ se badlā le.”

¹⁷ Wuh bolā, “Qasam khāeñ ki āp yih ahd utne pukhtā irāde se qāym rakheñge jitnī āp mujh se muhabbat rakhte haiñ.” Kyoñki Yūnatan Dāūd ko apnī jān ke barābar azīz rakhtā thā.

¹⁸ Phir Yūnatan ne apnā mansūbā pesh kiyā. “Kal to Nae Chāñd kī Īd hai. Jaldī se patā chalegā ki āp nahīñ āe, kyoñki āp kī kursī ḳhālī rahegī.

¹⁹ Is lie parsoñ shām ke waqt khule maidān meñ wahāñ chale jāeñ jahāñ pahle chhup gae

the. Patthar ke dher ke qarīb baiṭh jāēn.

²⁰ Us waqt main ghar se nikal kar tīn tīr patthar ke dher kī taraf chalāūngā goyā meñ kisī chiz ko nishānā banā kar mashq kar rahā hūn.

²¹ Phir main laṛke ko tīroñ ko le āne ke lie bhej dūngā. Agar main use batā dūn, ‘Tīr urlī taraf paṛe haiñ, unheñ jā kar le āo’ to āp khauf khāe baḡhair chhupne kī jagah se nikal kar mere pās ā sakeṅge. Rab kī hayāt kī qasam, is sūrat meñ koī khatrā nahīn hogā.

²² Lekin agar main laṛke ko batā dūn, ‘Tīr parlī taraf paṛe haiñ’ to āp ko fauran hijrat karnī paṛegī. Is sūrat meñ Rab kḡhud āp ko yahāñ se bhej rahā hogā.

²³ Lekin jo bāteñ ham ne āj āpas meñ kī haiñ Rab kḡhud hameshā tak in kā gawāh rahe.”

Sāul kī Dāūd se Alāniyā Dushmanī

²⁴ Chunāñche Dāūd khule maidān meñ chhup gayā. Nae chānd kī Īd āī to bādshāh ziyāfat ke lie baiṭh gayā.

²⁵ Māmūl ke mutābiq wuh dīwār ke pās baiṭh gayā. Abinair us ke sāth baiṭhā thā aur Yūnatan us ke muqābil. Lekin Dāūd kī jagah kḡhālī rahī.

²⁶ Us din Sāul ne bāt na chheṛī, kyonki us ne sochā, “Dāūd kisī wajah se nāpāk ho gayā hogā, is lie nahīn āyā.”

²⁷ Lekin agle din jab Dāūd kī jagah phir kḡhālī rahī to Sāul ne Yūnatan se pūchhā, “Yassī kā beṭā na to kal, na āj ziyāfat meñ sharīk huā hai. Kyā wajah hai?”

²⁸ Yūnatan ne jawāb diyā, “Dāūd ne baṛe zor se mujh se Bait-laham jāne kī ijāzat māngī.

29 Us ne kahā, ‘Mehrbānī karke mujhe jāne deñ, kyonki merā ḵhāndān ek ḵhās qurbānī chaḥhā rahā hai, aur mere bhāi ne mujhe āne kā hukm diyā hai. Agar āp ko manzūr ho to barāh-e-karm mujhe apne bhāiyon ke pās jāne kī ijāzat deñ.’ Yihī wajah hai ki wuh bādshāh kī ziyāfat meñ sharīk nahīn huā.”

30 Yih sun kar Sāul āpe se bāhar ho gayā. Wuh garjā, “Harāmzāde! Mujhe ḵhūb mālūm hai ki tū ne Dāūd kā sāth diyā hai. Sharm kī bāt hai, tere lie aur terī mān ke lie.

31 Jab tak Yassī kā beṭā zindā hai tab tak na tū aur na terī bādshāhat qāym rahegī. Ab jā, use le ā, kyonki use marnā hī hai.”

32 Yūnatan ne kahā, “Kyon? Us ne kyā kiyā jo sazā-e-maut ke lāyq hai?”

33 Jawāb meñ Sāul ne apnā nezā zor se Yūnatan kī taraf phaiṅk diyā tāki use mār ḍāle. Yih dekh kar Yūnatan ne jān liyā ki Sāul Dāūd ko qatl karne kā puḵhtā irādā rakhtā hai.

34 Baḥe ḡhusse ke ālam meñ wuh kharā huā aur chalā gayā. Us din us ne khānā khāne se inkār kiyā. Use bahut dukh thā ki merā bāp Dāūd kī itnī be'izzatī kar rahā hai.

35 Agle din Yūnatan subah ke waqt ghar se nikal kar khule maidān meñ us jagah ā gayā jahān Dāūd se milnā thā. Ek laḥkā us ke sāth thā.

36 Us ne laḥke ko hukm diyā, “Chalo, us taraf bhāgnā shurū karo jis taraf maiñ tiron ko chalāūngā tāki tujhe mālūm ho ki wuh kahān haiñ.” Chunānche laḥkā daurṇe lagā, aur

Yūnatan ne tīr itne zor se chalāyā ki wuh us se āge kahīn dūr jā girā.

³⁷ Jab laṛkā tīr ke qarīb pahuñch gayā to Yūnatan ne āwāz dī, “Tīr parlī taraf hai.

³⁸ Jaldī karo, bhāg kar āge niklo aur na ruko!” Phir laṛkā tīr ko uṭhā kar apne mālik ke pās wāpas ā gayā.

³⁹ Wuh nahīn jāntā thā ki is ke pīchhe kyā maqsad hai. Sirf Yūnatan aur Dāūd ko ilm thā.

⁴⁰ Phir Yūnatan ne kamān aur tīroñ ko laṛke ke sapurd karke use hukm diyā, “Jāo, sāmān le kar shahr meñ wāpas chale jāo.”

⁴¹ Laṛkā chalā gayā to Dāūd patthar ke dher ke junūb se nikal kar Yūnatan ke pās āyā. Tīn martabā wuh Yūnatan ke sāmne muñh ke bal jhuk gayā. Ek dūsre ko chūm kar donoñ kḥūb roe, kḥāskar Dāūd.

⁴² Phir Yūnatan bolā, “Salāmatī se jāeñ! Aur kabhī wuh wāde na bhūleñ jo ham ne Rab kī qasam khā kar ek dūsre se kie haiñ. Yih ahd āp ke aur mere aur āp kī aur merī aulād ke darmiyān hameshā qāym rahe. Rab kḥud hamārā gawāh hai.”

Phir Dāūd rawānā huā, aur Yūnatan shahr ko wāpas chalā gayā.

21

Dāūd Nob meñ Aḳhīmalik ke pās Thahartā Hai

¹ Dāūd Nob meñ Aḳhīmalik Imām ke pās gayā. Aḳhīmalik kānpte hue us se milne ke lie āyā aur pūchhā, “Āp akele kyoñ āe haiñ? Koī āp ke sāth nahīn.”

2 Dāūd ne jawāb diyā, “Bādshāh ne mujhe ek ḳhās zimmedārī dī hai jis kā zikr tak karnā manā hai. Kisī ko bhī is ke bāre meñ jānanā nahīn chāhie. Maiñ ne apne ādmiyoñ ko hukm diyā hai ki fulāñ fulāñ jagah par merā intazār karen.

3 Ab mujhe zarā batāen ki khāne ke lie kyā mil saktā hai? Mujhe pāñch roṭiyān de deñ, yā jo kuchh bhī āp ke pās hai.”

4 Imām ne jawāb diyā, “Mere pās ām roṭī nahīn hai. Maiñ āp ko sirf Rab ke lie maḳhsūsshudā roṭī de saktā hūñ. Shart yih hai ki āp ke ādmī pichhle dinoñ meñ auratoñ se hambistar na hue hoñ.”

5 Dāūd ne use tasallī de kar kahā, “Fikr na karen. Pahle kī tarah hameñ is muhimm ke daurān bhī auratoñ se dūr rahnā parā hai. Mere faujī ām muhimmoñ ke lie bhī apne āp ko pāk rakhte haiñ, to is dafā wuh kahīn zyādā pāk-sāf haiñ.”

6 Phir imām ne Dāūd ko maḳhsūsshudā roṭiyān dīñ yāñī wuh roṭiyān jo mulāqāt ke ḳhaime meñ Rab ke huzūr rakhī jātī thīñ aur usī din tāzā roṭiyōñ se tabdīl huī thīñ.

7 Us waqt Sāūl ke charwāhoñ kā Adomī inchārj Doeg wahān thā. Wuh kisī majbūrī ke bāis Rab ke huzūr ṭhahrā huā thā. Us kī maujūdagī meñ

8 Dāūd ne Aḳhīmalik se pūchhā, “Kyā āp ke pās koī nezā yā talwār hai? Mujhe bādshāh kī muhimm ke lie itnī jaldī se nikalnā parā ki apnī talwār yā koī aur hathiyār sāth lāne ke lie fursat na milī.”

9 Aḳhīmalik ne jawāb diyā, “Jī hai. Wādī-e-Ailā meñ āp ke hāthoñ māre gae Filistī mard Jālūt kī

talwār mere pās hai. Wuh ek kapṛe meñ liṭī mere bālāpoṣh ke pīchhe paṛī hai. Agar āp use apne sāth le jānā chāheñ to le jāeñ. Mere pās koī aur hathiyār nahīñ hai.” Dāūd ne kahā, “Is qism kī talwār kahīñ aur nahīñ miltī. Mujhe de deñ.”

Dāūd Filistī Bādshāh ke pās

¹⁰ Usī din Dāūd āge niklā tāki Sāūl se bach sake. Isrāīl ko chhoṛ kar wuh Filistī shahr Jāt ke bādshāh Akīs ke pās gayā.

¹¹ Lekin Akīs ke mulāzimoñ ne bādshāh ko āgāh kiyā, “Kyā yih mulk kā bādshāh Dāūd nahīñ hai? Isī ke bāre meñ Isrāīlī nāch kar gīt gāte haiñ, ‘Sāūl ne hazār halāk kie jabki Dāūd ne das hazār.’ ”

¹² Yih sun kar Dāūd ghabrā gayā aur Jāt ke bādshāh Akīs se bahut ḍarne lagā.

¹³ Achānak wuh pāgal ādmī kā rūp bhar kar un ke darmiyān ajīb ajīb harkateñ karne lagā. Shahr ke darwāze ke pās jā kar us ne us par betuke-se nishān lagāe aur apnī dāṛhī par rāl ṭapakne dī.

¹⁴ Yih dekh kar Akīs ne apne mulāzimoñ ko jhīrkā, “Tum is ādmī ko mere pās kyon le āe ho? Tum khud dekh sakte ho ki yih pāgal hai.

¹⁵ Kyā mere pās pāgalon kī kamī hai ki tum is ko mere sāmne le āe ho tāki is tarah kī harkateñ kare? Kyā mujhe aise mehmān kī zarūrat hai?”

22

Adullām ke Ghār aur Moāb Meñ

¹ Is tarah Dāūd Jāt se bach niklā aur Adullām ke ghār meñ chhup gayā. Jab us ke bhāiyon aur

bāp ke gharāne ko is kī k̄habar milī to wuh Bait-laham se ā kar wahān us ke sāth jā mile.

² Aur log bhī jaldī se us ke gird jamā ho gae. Aise jo kisī musībat meñ phañse hue the yā apnā qarz adā nahīn kar sakte the aur aise bhī jin kā dil talkhī se bharā huā thā. Hote hote Dāūd taq̄riban 400 afrād kā rāhnumā ban gayā.

³ Dāūd Adullām se rawānā ho kar Mulk-e-Moāb ke shahr Misfāh chalā gayā. Us ne Moābī bādshāh se guzārish kī, “Mere mān-bāp ko us waqt tak yahān panāh deñ jab tak mujhe patā na ho ki Allāh mere lie kyā irādā rakhtā hai.”

⁴ Wuh apne mān-bāp ko bādshāh ke pās le āyā, aur wuh utnī der tak wahān t̄hahre jitnī der Dāūd apne pahārī q̄ile meñ rahā.

⁵ Ek din Jād Nabī ne Dāūd se kahā, “Yahān pahārī q̄ile meñ mat raheñ balki dubārā Yahūdāh ke ilāqe meñ wāpas chale jāeñ.” Dāūd us kī sun kar hārat ke jangal meñ jā basā.

Sāul Nob ke Imāmoñ se Badlā Letā Hai

⁶ Sāul ko ittalā dī gaī ki Dāūd aur us ke ādmī dubārā Yahūdāh meñ pahuñch gae haiñ. Us waqt Sāul apnā nezā pakare jhāu ke us darakht ke sāye meñ baiṭhā thā jo Jibiyā kī pahārī par thā. Sāul ke irdgird us ke mulāzim khare the.

⁷ Wuh pukār uṭhā, “Binyamīn ke mardo! Suneñ, kyā Yassī kā beṭā āp sab ko khet aur angūr ke bāgh degā? Kyā wuh fauj meñ āp ko hazār hazār aur sau sau afrād par muqarrar karegā?”

⁸ Lagtā hai ki āp is kī ummīd rakhte haiñ, warnā āp yoñ mere k̄hilāf sāzish na karte.

Kyōnki āp meñ se kisī ne bhī mujhe yih nahīn batāyā ki mere apne beṭe ne is ādmī ke sāth ahd bāndhā hai. Āp ko merī fikr tak nahīn, warnā mujhe ittalā dete ki Yūnatan ne mere mulāzim Dāūd ko ubhārā hai ki wuh merī tāk meñ baiṭh jāe. Kyōnki āj to aisā hī ho rahā hai.”

⁹ Doeg Adomī Sāūl ke afsaron ke sāth wahān khaṛā thā. Ab wuh bol uṭhā, “Maiñ ne Yassī ke beṭe ko dekhā hai. Us waqt wuh Nob meñ Aḳhīmalik bin Aḳhītūb se milne āyā.

¹⁰ Aḳhīmalik ne Rab se dariyāft kiyā ki Dāūd kā aglā qadam kyā ho. Sāth sāth us ne use safr ke lie khānā aur Filistī mard Jālūt kī talwār bhī dī.”

¹¹ Bādshāh ne fauran Aḳhīmalik bin Aḳhītūb aur us ke bāp ke pūre ḳhāndān ko bulāyā. Sab Nob meñ imām the.

¹² Jab pahuñche to Sāūl bolā, “Aḳhītūb ke beṭe, sunēñ.” Aḳhīmalik ne jawāb diyā, “Jī mere āqā, hukm.”

¹³ Sāūl ne ilzām lagā kar kahā, “Āp ne Yassī ke beṭe Dāūd ke sāth mere ḳhilāf sāzisheñ kyoñ kī haiñ? Batāēñ, āp ne use roṭī aur talwār kyoñ dī? Āp ne Allāh se dariyāft kyoñ kiyā ki Dāūd āge kyā kare? Āp hī kī madad se wuh sarkash ho kar merī tāk meñ baiṭh gayā hai, kyoñki āj to aisā hī ho rahā hai.”

¹⁴ Aḳhīmalik bolā, “Lekin mere āqā, kyā mulāzimoñ meñ se koī aur āp ke dāmād Dāūd jaisā wafādār sābit huā hai? Wuh to āp ke muhāfiz daste kā kaptān aur āp ke gharāne kā muazzaz membar hai.

15 Aur yih pahlī bār nahīn thā ki main ne us ke lie Allāh se hidāyat māngī. Is muāmāle mein bādshāh mujh aur mere khāndān par ilzām na lagāe. Main ne to kisī sāzish kā zikr tak nahīn sunā.”

16 Lekin bādshāh bolā, “Akhīmalik, tujhe aur tere bāp ke pūre khāndān ko marnā hai.”

17 Us ne sāth khare apne muhāfizoñ ko hukm diyā, “Jā kar imāmoñ ko mār do, kyonki yih bhī Dāūd ke ittahādī haiñ. Go in ko mālūm thā ki Dāūd mujh se bhāg rahā hai to bhī inhoñ ne mujhe ittalā na dī.”

Lekin muhāfizoñ ne Rab ke imāmoñ ko mār ḍalne se inkār kiyā.

18 Tab bādshāh ne Doeg Adomī ko hukm diyā, “Phir tum hī imāmoñ ko mār do.” Doeg ne un ke pās jā kar un sab ko qatl kar diyā. Katān kā bālāpōsh pahnane wāle kul 85 ādmī us din māre gae.

19 Phir us ne jā kar imāmoñ ke shahr Nob ke tamām bāshindoñ ko mār ḍalā. Shahr ke mard, aurateñ, bachche shīrkhāroñ samet, gāy-bail, gadhe aur bher-bakriyāñ sab us din halāk hue.

20 Sirf ek hī shaḅhs bach gayā, Abiyātar jo Akhīmalik bin Akhītūb kā beṭā thā. Wuh bhāg kar Dāūd ke pās āyā

21 aur use ittalā dī ki Sāul ne Rab ke imāmoñ ko qatl kar diyā hai.

22 Dāūd ne kahā, “Us din jab main ne Doeg Adomī ko wahāñ dekhā to mujhe mālūm thā ki wuh zarūr Sāul ko khābar pahuñchāegā. Yih merā hī qusūr hai ki āp ke bāp kā pūrā khāndān halāk ho gayā hai.

²³ Ab mere sāth raheñ aur mat ÷areñ. Jo ādmī āp ko qatl karnā chāhtā hai wuh mujhe bhī qatl karnā chāhtā hai. Āp mere sāth rah kar mahfūz raheñge.”

23

Dāūd Qailā ko Bachātā Hai

¹ Ek din Dāūd ko khabar milī ki Filistī Qailā Shahr par hamlā karke gāhne kī jaghoñ se anāj lūṭ rahe haiñ.

² Dāūd ne Rab se dariyāft kiyā, “Kyā main jā kar Filistiyon par hamlā karūñ?” Rab ne jawāb diyā, “Jā, Filistiyon par hamlā karke Qailā ko bachā.”

³ Lekin Dāūd ke ādmī etarāz karne lage, “Ham pahle se yahāñ Yahūdāh mein logon kī mukhālafat se ÷arte haiñ. Jab ham Qailā jā kar Filistiyon par hamlā karenge to phir hamārā kyā banegā?”

⁴ Tab Dāūd ne Rab se dubārā hidāyat māngī, aur dubārā use yihī jawāb milā, “Qailā ko jā! Main Filistiyon ko tere hawāle kar dūngā.”

⁵ Chunāñche Dāūd apne ādmiyon ke sāth Qailā chalā gayā. Us ne Filistiyon par hamlā karke unheñ baṛī shikast dī aur un kī bheṛ-bakriyon ko chhīn kar Qailā ke bāshindon ko bachāyā.

⁶ Wahāñ Qailā mein Abiyātar Dāūd ke logon mein shāmil huā. Us ke pās imām kā bālāposh thā.

⁷ Jab Sāul ko khabar milī ki Dāūd Qailā Shahr mein ṭahrā huā hai to us ne sochā, “Allāh ne

use mere hawāle kar diyā hai, kyonki ab wuh fasildār shahr meñ jā kar phaṅs gayā hai.”

⁸ Wuh apnī pūrī fauj ko jamā karke jang ke lie taiyāriyāñ karne lagā tāki utar kar Qailā kā muhāsarā kare jis meñ Dāūd ab tak ṭhahrā huā thā.

⁹ Lekin Dāūd ko patā chalā ki Sāūl us ke ḳhilāf taiyāriyāñ kar rahā hai. Us ne Abiyātar Imām se kahā, “Imām kā bālāposh le āeñ tāki ham Rab se hidāyat māñgeñ.”

¹⁰ Phir us ne duā kī, “Ai Rab Isrāīl ke Ḳhudā, mujhe ḳhabar milī hai ki Sāūl merī wajah se Qailā par hamlā karke use barbād karnā chāhtā hai.

¹¹ Kyā shahr ke bāshinde mujhe Sāūl ke hawāle kar deñge? Kyā Sāūl wāqāī āegā? Ai Rab, Isrāīl ke Ḳhudā, apne ḳhādīm ko batā!” Rab ne jawāb diyā, “Hāñ, wuh āegā.”

¹² Phir Dāūd ne mazīd dariyāft kiyā, “Kyā shahr ke buzurg mujhe aur mere logoñ ko Sāūl ke hawāle kar deñge?” Rab ne kahā, “Hāñ, wuh kar deñge.”

¹³ Lihāzā Dāūd apne taqrīban 600 ādmiyoñ ke sāth Qailā se chalā gayā aur idhar-udhar phirne lagā. Jab Sāūl ko ittalā milī ki Dāūd Qailā se nikal kar bach gayā hai to wahāñ jāne se bāz āyā.

Yūnatan Dāūd se Miltā Hai

¹⁴ Ab Dāūd bayābān ke pahārī qiloñ aur Dasht-e-Zif ke pahārī ilāqe meñ rahne lagā. Sāūl to musalsal us kā khoj lagātā rahā, lekin Allāh hameshā Dāūd ko Sāūl ke hāth se bachātā rahā.

15 Ek din jab Dāūd Horish ke qarīb thā to use ittalā milī ki Sāūl āp ko halāk karne ke lie niklā hai.

16 Us waqt Yūnatan ne Dāūd ke pās ā kar us ki hauslā-afzāi kī ki wuh Allāh par bharosā rakhe.

17 Us ne kahā, “Ḍareñ mat. Mere bāp kā hāth āp tak nahīñ pahuñchegā. Ek din āp zarūr Isrāīl ke bādshāh ban jāeñge, aur merā rutbā āp ke bād hī āegā. Merā bāp bhī is haqīqat se ḳhūb wāqif hai.”

18 Donoñ ne Rab ke huzūr ahd bāndhā. Phir Yūnatan apne ghar chalā gayā jabki Dāūd wahāñ Horish meñ ṭaharrā rahā.

Dāūd Zif meñ Bach Jātā Hai

19 Dasht-e-Zif meñ ābād kuchh log Sāūl ke pās ā gae jo us waqt Jibiyā meñ thā. Unhoñ ne kahā, “Ham jānte haiñ ki Dāūd kahāñ chhup gayā hai. Wuh Horish ke pahārī qiloñ meñ hai, us pahārī par jis kā nām Hakīlā hai aur jo Yashīmon ke junūb meñ hai.

20 Ai bādshāh, jab bhī āp kā dil chāhe aeñ to ham use pakaṛ kar āp ke hawāle kar deñge.”

21 Sāūl ne jawāb diyā, “Rab āp ko barkat baḳhshe ki āp ko mujh par tars āyā hai.

22 Ab wāpas jā kar mazīd taiyāriyāñ karen. Patā karen ki wuh kahāñ ātā jātā hai aur kis ne use wahāñ dekhā hai. Kyoñki mujhe batāyā gayā hai ki wuh bahut chālāk hai.

23 Har jagah kā khoj lagāeñ jahāñ wuh chhup jātā hai. Jab āp ko sārī tafsilāt mālūm hoñ to mere pās aeñ. Phir maiñ āp ke sāth wahāñ pahuñchūngā. Agar wuh wāqaī wahāñ kahīñ ho

to main use zarūr dhūṇḍ nikālūṅgā, ḵhāh mujhe pūre Yahūdāh kī chhānbīn kyon na karnī paṛe.”

²⁴⁻²⁵ Zif ke admī wāpas chale gae. Thoṛī der ke bād Sāul bhī apnī fauj samet wahān ke lie niklā. Us waqt Dāūd aur us ke log Dasht-e-Maūn meñ Yashīmon ke junūb meñ the. Jab Dāūd ko ittalā milī ki Sāul us kā tāqqub kar rahā hai to wuh registān ke mazīd junūb meñ chalā gayā, wahān jahān baṛī chaṭṭān nazar ātī hai. Lekin Sāul ko patā chalā aur wuh fauran registān meñ Dāūd ke pīchhe gayā.

²⁶ Chalthe chalthe Sāul Dāūd ke qarīb hī pahuñch gayā. Āḵhirkār sirf ek pahārī un ke darmiyān rah gāī. Sāul pahārī ke ek dāman meñ thā jabki Dāūd apne logon samet dūsre dāman meñ bhāgtā huā bādshāh se bachne kī koshish kar rahā thā. Sāul abhī unheñ gher kar pakarne ko thā

²⁷ ki achānak qāsīd Sāul ke pās pahuñchā jis ne kahā, “Jaldī āeñ! Filistī hamāre mulk meñ ghus āe haiñ.”

²⁸ Sāul ko Dāūd ko chhoṛnā paṛā, aur wuh Filistiyon se laṛne gayā. Us waqt se pahārī kā nām “Alahdagī kī Chaṭṭān” paṛ gayā.

²⁹ Dāūd wahān se chalā gayā aur Ain-jadī ke pahārī qilon meñ rahne lagā.

24

Dāūd Sāul ko Qatl Karne se Inkār Kartā Hai

¹ Jab Sāul Filistiyon kā tāqqub karne se wāpas āyā to use ḵhabar milī ki Dāūd Ain-jadī ke registān meñ hai.

2 Wuh tamām Isrāīl ke 3,000 chīdā faujiyon ko le kar Pahārī Bakriyon kī Chaṭṭānoṅ ke lie rawānā huā tāki Dāūd ko pakar le.

3 Chalthe chalte wuh bheroṅ ke kuchh bāroṅ se guzarne lage. Wahān ek ghār ko dekh kar Sāūl andar gayā tāki apnī hājat rafā kare. Ittifāq se Dāūd aur us ke ādmī usī ghār ke pichhle hisse meṅ chhupe baiṭhe the.

4 Dāūd ke ādmiyon ne āhistā se us se kahā, “Rab ne to āp se wādā kiyā thā, ‘Main tere dushman ko tere hawāle kar dūngā, aur tū jo jī chāhe us ke sāth kar sakegā.’ Ab yih waqt ā gayā hai!” Dāūd reṅgte reṅgte āge Sāūl ke qarīb pahuṅch gayā. Chupke se us ne Sāūl ke libās ke kināre kā ṭukrā kāṭ liyā aur phir wāpas ā gayā.

5 Lekin jab apne logoṅ ke pās pahuṅchā to us kā zamīr use malāmat karne lagā.

6 Us ne apne ādmiyon se kahā, “Rab na kare ki main apne āqā ke sāth aisā sulūk karke Rab ke masah kie hue bādshāh ko hāth lagāūṅ. Kyoṅki Rab ne khud use masah karke chun liyā hai.”

7 Yih kah kar Dāūd ne un ko samjhāyā aur unheṅ Sāūl par hamlā karne se rok diyā.

Thoṛī der ke bād Sāūl ghār se nikal kar āge chalne lagā.

8 Jab wuh kuchh fāsile par thā to Dāūd bhī niklā aur pukār uṭhā, “Ai bādshāh salāmat, ai mere āqā!” Sāūl ne pichhe dekhā to Dāūd muṅh ke bal jhuk kar

9 bolā, “Jab log āp ko batāte haiṅ ki Dāūd āp ko nuqsān pahuṅchāne par tulā huā hai to āp kyoṅ dhyān dete haiṅ?”

10 Āj āp apnī ānkhon se dekh sakte haiñ ki yih jhūṭ hī jhūṭ hai. Ghār meñ āp Allāh kī marzī se mere qabze meñ ā gae the. Mere logoñ ne zor diyā ki maiñ āp ko mār dūñ, lekin maiñ ne āp ko na chherā. Maiñ bolā, ‘Maiñ kabhī bhī bādshāh ko nuqsān nahīñ pahuñchāūngā, kyonki Rab ne khud use masah karke chun liyā hai.’

11 Mere bāp, yih dekheñ jo mere hāth meñ hai! Āp ke libās kā yih ṭukrā maiñ kāṭ sakā, aur phir bhī maiñ ne āp ko halāk na kiyā. Ab jān leñ ki na maiñ āp ko nuqsān pahuñchāne kā irādā rakhtā hūñ, na maiñ ne āp kā gunāh kiyā hai. Phir bhī āp merā tāqqub karte hue mujhe mār ḍālne ke darpai haiñ.

12 Rab khud faislā kare ki kis se ghaltī ho rahī hai, āp se yā mujh se. Wuhī āp se merā badlā le. Lekin khud maiñ kabhī āp par hāth nahīñ uṭhāūngā.

13 Qadīm qaul yihī bāt bayān kartā hai, ‘Badkārōñ se badkārī paidā hotī hai.’ Merī nīyat to sāf hai, is lie maiñ kabhī aisā nahīñ karūngā.

14 Isrāīl kā bādshāh kis ke khilāf nikal āyā hai? Jis kā tāqqub āp kar rahe haiñ us kī to kōī haisiyat nahīñ. Wuh murdā kuttā yā pissū hī hai.

15 Rab hamārā munsif ho. Wuhī ham donoñ kā faislā kare. Wuh mere muāmale par dhyān de, mere haq meñ bāt kare aur mujhe be'ilzām ṭhahrā kar āp ke hāth se bachāe.”

16 Dāūd khāmosh huā to Sāūl ne pūchhā, “Dāūd mere beṭe, kyā āp kī āwāz hai?” Aur wuh phūṭ phūṭ kar rone lagā.

17 Us ne kahā, “Āp mujh se zyādā rāstbāz haiñ.

Āp ne mujh se achchhā sulūk kiyā jabki main āp se burā sulūk kartā rahā hūn.

¹⁸ Āj āp ne mere sāth bhalāī kā sabūt diyā, kyōnki go Rab ne mujhe āp ke hawāle kar diyā thā to bhī āp ne mujhe halāk na kiyā.

¹⁹ Jab kisī kā dushman us ke qabze meñ ā jātā hai to wuh use jāne nahīn detā. Lekin āp ne aisā hī kiyā. Rab āp ko us mehrbānī kā ajr de jo āp ne āj mujh par kī hai.

²⁰ Ab main jāntā hūn ki āp zarūr bādshāh ban jāenge, aur ki āp ke zariye Isrāīl kī bādshāhī qāym rahegī.

²¹ Chunānche Rab kī qasam khā kar mujh se wādā karen ki na āp merī aulād ko halāk karenge, na mere ābāī gharāne meñ se merā nām miṭā denge.”

²² Dāūd ne qasam khā kar Sāūl se wādā kiyā. Phir Sāūl apne ghar chalā gayā jabki Dāūd ne apne logon ke sāth ek pahārī qile meñ panāh le lī.

25

Samuel kī Maut

¹ Un dīnon meñ Samuel faut huā. Tamām Isrāīl Rāmā meñ janāze ke lie jamā huā. Us kā mātām karte hue unhoñ ne use us kī khāndānī qabr meñ dafn kiyā.

Nābāl Dāūd kī Be'izzatī Kartā Hai

Un dīnon meñ Dāūd Dasht-e-Fārān meñ chalā gayā.

²⁻⁴ Maūn meñ Kālib ke khāndān kā ek admī rahtā thā jis kā nām Nābāl thā. Wuh nihāyat amīr thā. Karmil ke qarīb us kī 3,000 bherēn

aur 1,000 bakriyān thīn. Bīwī kā nām Abījel thā. Wuh zahīn bhī thī aur ḡhūbsūrat bhī. Us ke muqābale meñ Nābāl saḡhtimizāj aur kamīnā thā. Ek din Nābāl apnī bheṛoñ ke bāl katarne ke lie Karmil āyā.

Jab Dāūd ko ḡhabar milī

⁵ to us ne 10 jawānoñ ko bhej kar kahā, “Karmil jā kar Nābāl se mileñ aur use merā salām deñ.

⁶ Use batānā, ‘Allāh āp ko tawīl zindagī atā kare. Āp kī, āp ke ḡhāndān kī aur āp kī tamām milkiyat kī salāmatī ho.

⁷ Sunā hai ki bheṛoñ ke bāl katarne kā waqt ā gayā hai. Karmil meñ āp ke charwāhe hameshā hamāre sāth rahe. Us pūre arse meñ na unheñ hamārī taraf se koī nuqsān pahuñchā, na koī chīz chorī huī.

⁸ Apne logoñ se ḡhud pūchh leñ! Wuh is kī tasdīq kareñge. Āj āp ḡhushī manā rahe haiñ, is lie mere jawānoñ par mehrbānī kareñ. Jo kuchh āp ḡhushī se de sakte haiñ wuh unheñ aur apne beṛe Dāūd ko de deñ.’ ”

⁹ Dāūd ke ādmī Nābāl ke pās gae. Use Dāūd kā salām de kar unhoñ ne us kā paighām diyā aur phir jawāb kā intazār kiyā.

¹⁰ Lekin Nābāl ne karāḡht lahje meñ kahā, “Yih Dāūd kaun hai? Kaun hai Yassī kā beṛā? Ājkal bahut-se aise ḡhulām haiñ jo apne mālik se bhāge hue haiñ.

¹¹ Maiñ apnī roṡī, apnā pānī aur katarne wāloñ ke lie zabah kiyā gayā gosht le kar aise āwārā phirne wāloñ ko kyoñ de dūn? Kyā patā hai ki yih kahān se āe haiñ.”

12 Dāūd ke ādmī chale gae aur Dāūd ko sab kuchh batā diyā.

13 Tab Dāūd ne hukm diyā, “Apnī talwāreñ bāndh lo!” Sab ne apnī talwāreñ bāndh liñ. Us ne bhī aisā kiyā aur phir 400 afrād ke sāth Karmil ke lie rawānā huā. Bāqī 200 mard sāmān ke pās rahe.

Abijel Dāūd kā Ġhussā Ṭhanḍā Kartī Hai

14 Itne meñ Nābāl ke ek naukar ne us kī bīwī ko ittalā dī, “Dāūd ne registān meñ se apne qāsidoñ ko Nābāl ke pās bhejā tāki use mubārakbād deñ. Lekin us ne jawāb meñ garaj kar unheñ gāliyañ dī haiñ,

15 hālānki un logoñ kā hamāre sāth sulūk hameshā achchhā rahā hai. Ham aksar rewaṛoñ ko charāne ke lie un ke qarīb phirte rahe, to bhī unhoñ ne hameñ kabhī nuqsān na pahuñchāyā, na koī chīz chorī kī.

16 Jab bhī ham un ke qarīb the to wuh din rāt chārdīwārī kī tarah hamārī hifāzat karte rahe.

17 Ab soch leñ ki kyā kiyā jāe! Kyonki hamārā mālik aur us ke tamām ghar wāle bare khatre meñ haiñ. Wuh khud itnā sharīr hai ki us se bāt karne kā koī faydā nahīn.”

18 Jitnī jaldī ho sakā Abijel ne kuchh sāmān ikatṭhā kiyā jis meñ 200 roṭiyañ, mai kī do mashkeñ, khāne ke lie taiyār kī gaī pāñch bhereñ, bhune hue anāj ke sārhe 27 kilogrām, kishmish kī 100 aur anjīr kī 200 ṭikkīyañ shāmil thiñ. Sab kuchh gadhoñ par lād kar

19 us ne apne naukaroñ ko hukm diyā, “Mere āge nikal jāo, main tumhāre pīchhe pīchhe āūngī.” Apne shauhar ko us ne kuchh na batāyā.

20 Jab Abījel pahār kī āṛ meñ utarne lagī to Dāūd apne ādmīyon samet us kī taraf baṛhte hue nazar āyā. Phir un kī mulāqāt huī.

21 Dāūd to abhī tak baṛe ḡhusse meñ thā, kyonki wuh soch rahā thā, “Is ādmī kī madad karne kā kyā fāydā thā! Ham registān meñ us ke rewaṛoñ kī hifāzat karte rahe aur us kī kōī bhī chīz gum na hone dī. To bhī us ne hamārī nekī ke jawāb meñ hamārī be’izzatī kī hai.

22 Allāh mujhe saḡht sazā de agar maiñ kal subah tak us ke ek ādmī ko bhī zindā chhoṛ dūñ!”

23-24 Dāūd ko dekh kar Abījel jaldī se gadhe par se utar kar us ke sāmne muñh ke bal jhuk gaī. Us ne kahā, “Mere āqā, mujhe hī qusūrwar ṭhahraēñ. Mehrbānī karke apnī ḡhādimā ko bolne deñ aur us kī bāt suneñ.

25 Mere mālik us sharīr ādmī Nābāl par zyādā dhyān na deñ. Us ke nām kā matlab ahmaq hai aur wuh hai hī ahmaq. Afsos, merī un ādmīyon se mulāqāt nahīñ huī jo āp ne hamāre pās bheje the.

26 Lekin Rab kī aur āp kī hayāt kī qasam, Rab ne āp ko apne hāthoñ se badlā lene aur qātil banane se bachāyā hai. Aur Allāh kare ki jo bhī āp se dushmanī rakhte aur āp ko nuqsān pahuñchānā chāhte haiñ unheñ Nābāl kī-sī sazā mil jāe.

27 Ab guzārish hai ki jo barkat hameñ mili hai us meñ āp bhī sharīk hoñ. Jo chīzeñ āp kī ḡhādimā lāī hai unheñ qabūl karke un jawānoñ meñ taqsīm kar deñ jo mere āqā ke pīchhe ho lie haiñ.

28 Jo bhī ḡhaltī huī hai apnī ḡhādīmā ko muāf kījie. Rab zarūr mere āqā kā ḡharānā hameshā tak qāym rakhegā, kyoṅki āp Rab ke dushmanoṅ se laṛte haiṅ. Wuh āp ko jīte-jī ḡhaltiyāṅ karne se bachāe rakhe.

29 Jab koī āp kā tāqqub karke āp ko mār dene kī koshish kare to Rab āp kā ḡhudā āp kī jān jāndāroṅ kī thailī meṅ mahfūz rakhegā. Lekin āp ke dushmanoṅ kī jān wuh falāḡhan ke patthar kī tarah dūr phaiṅk kar halāk kar degā.

30 Jab Rab apne tamām wāde pūre karke āp ko Isrāīl kā bādshāh banā degā

31 to koī aisī bāt sāmne nahīṅ āegī jo ṭhokar kā bāis ho. Mere āqā kā zamīr sāf hogā, kyoṅki āp badlā le kar qātil nahīṅ bane hoṅge. Guzārish hai ki jab Rab āp ko kāmyābī de to apnī ḡhādīmā ko bhī yād karen.

32 Dāūd bahut ḡhush huā. “Rab Isrāīl ke ḡhudā kī tārif ho jis ne āj āp ko mujh se milne ke lie bhej diyā.

33 Āp kī basīrat mubāarak hai! Āp mubāarak haiṅ, kyoṅki āp ne mujhe is din apne hāthoṅ se badlā le kar qātil banane se rok diyā hai.

34 Rab Isrāīl ke ḡhudā kī qasam jis ne mujhe āp ko nuqsān pahuṅchāne se rok diyā, kal subah Nābāl ke tamām ādmī halāk hote agar āp itnī jaldī se mujh se milne na ātīṅ.”

35 Dāūd ne Abījel kī peshkardā chīzeṅ qabūl karke use ruḡhsat kiyā aur kahā, “Salāmatī se jāeṅ. Maiṅ ne āp kī sunī aur āp kī bāt manzūr kar lī hai.”

Rab Nābāl ko Sazā Detā Hai

³⁶ Jab Abījel apne ghar pahuñchī to dekhā ki bahut raunaq hai, kyonki Nābāl bādshāh kī-sī ziyāfat karke khushiyān manā rahā thā. Chūnki wuh nashe meñ dhut thā is lie Abījel ne use us waqt kuchh na batāyā.

³⁷ Aglī subah jab Nābāl hosh meñ ā gayā to Abījel ne use sab kuchh kah sunāyā. Yih sunte hī Nābāl ko daurā paṛ gayā, aur wuh patthar-sā ban gayā.

³⁸ Das din ke bād Rab ne use marne diyā.

³⁹ Jab Dāūd ko Nābāl kī maut kī khabar mil gaī to wuh pukārā, “Rab kī tārif ho jis ne mere lie Nābāl se laṛ kar merī be'izzatī kā badlā liyā hai. Us kī mehrbānī hai ki maiñ ghalat kām karne se bach gayā hūn jabki Nābāl kī burāi us ke apne sar par ā gaī hai.”

Abījel kī Dāūd se Shādī

Kuchh der ke bād Dāūd ne apne logoñ ko Abījel ke pās bhejā tāki wuh Dāūd kī us ke sāth shādī kī darḳhāst pesh karen.

⁴⁰ Chunānche us ke mulāzim Karmil meñ Abījel ke pās jā kar bole, “Dāūd ne hamen shādī kā paighām de kar bhejā hai.”

⁴¹ Abījel kharī huī, phir muñh ke bal jhuk kar bolī, “Maiñ un kī khidmat meñ hāzir hūn. Maiñ apne mālik ke khādimoñ ke pānw dhone tak taiyār hūn.”

⁴² Wuh jaldī se taiyār huī aur gadhe par baiṭh kar Dāūd ke mulāzimoñ ke sāth rawānā huī. Pāñch naukarāniyān us ke sāth chalī gaīn. Yoñ Abījel Dāūd kī bīwī ban gaī.

⁴³ Ab Dāūd kī do bīwiyān thīn, kyonki pahle us kī shādī Akhīnūsam se huī thī jo Yazrael se thī.

⁴⁴ Jahān tak Sāul kī beṭī Mikal kā tālluq thā Sāul ne use Dāūd se le kar us kī dubārā shādī Faltiyel bin Lais se karwāī thī jo Jallim kā rahne wālā thā.

26

Dāūd Sāul ko Dusrī Bār Bachne Detā Hai

¹ Ek din Dasht-e-Zif ke kuchh bāshinde dubārā Jibiyā meñ Sāul ke pās ā gae. Unhoñ ne bādshāh ko batāyā, “Ham jānte haiñ ki Dāūd kahān chhup gayā hai. Wuh us pahārī par hai jo Hakilā kahlātī hai aur Yashīmon ke muqābil hai.”

² Yih sun kar Sāul Isrāil ke 3,000 chīdā faujiyon ko le kar Dasht-e-Zif meñ gayā tāki Dāūd ko dhūnd nikāle.

³ Hakilā Pahārī par Yashīmon ke muqābil wuh ruk gae. Jo rāstā pahār par se guzartā hai us ke pās unhoñ ne apnā kaimp lagāyā. Dāūd us waqt registān meñ chhup gayā thā. Jab use khabar milī ki Sāul merā tāqqub kar rahā hai

⁴ to us ne apne logoñ ko mālūm karne ke lie bhejā. Unhoñ ne wāpas ā kar use ittalā dī ki bādshāh wāqāī apnī fauj samet registān meñ pahuñch gayā hai.

⁵ Yih sun kar Dāūd khud khud nikal kar chupke se us jagah gayā jahān Sāul kā kaimp thā. Us ko mālūm huā ki Sāul aur us kā kamāndar Abinair bin Nair kaimp ke ain bīch meñ sō rahe haiñ jabki bāqī ādmī dāyrā banā kar un ke irdgird so rahe haiñ.

⁶ Do mard Dāūd ke sāth the, Aḳhīmalik Hitti aur Abīshai bin Zarūyāh. Zarūyāh Yoāb kā bhāi thā. Dāūd ne pūchhā, “Kaun mere sāth kaimp meñ ghus kar Sāul ke pās jāegā?” Abīshai ne jawāb diyā, “Maiñ sāth jāūngā.”

⁷ Chunānche donoñ rāt ke waqt kaimp meñ ghus āe. Soe hue faujiyon aur Abinair se guzar kar wuh Sāul tak pahuñch gae jo zamīn par leṭā so rahā thā. Us kā nezā sar ke qarīb zamīn meñ gaṛā huā thā.

⁸ Abīshai ne āhistā se Dāūd se kahā, “Āj Allāh ne āp ke dushman ko āp ke qabze meñ kar diyā hai. Agar ijāzat ho to maiñ use us ke apne neze se zamīn ke sāth chhed dūñ. Maiñ use ek hī wār meñ mār dūngā. Dūsre wār kī zarūrat hī nahīn hogī.”

⁹ Dāūd bolā, “Na karo! Use mat mārñā, kyonki jo Rab ke masah kie hue ḳhādīm ko hāth lagāe wuh qusūrwar thahregā.

¹⁰ Rab kī hayāt kī qasam, Rab ḳhud Sāul kī maut muqarrar karegā, ḳhāh wuh būrhā ho kar mar jāe, ḳhāh jang meñ laṛte hue.

¹¹ Rab mujhe is se mahfūz rakhe ki maiñ us ke masah kie hue ḳhādīm ko nuqsān pahuñchāūñ. Nahīn, ham kuchh aur karenge. Us kā nezā aur pānī kī surāhī pakaṛ lo. Ao, ham yih chīzeñ apne sāth le kar yahāñ se nikal jāte haiñ.”

¹² Chunānche wuh donoñ chīzeñ apne sāth le kar chupke se chale gae. Kaimp meñ kisī ko bhī patā na chalā, koī na jāgā. Sab soe rahe, kyonki Rab ne unheñ gahrī nīnd sulā diyā thā.

¹³ Dāūd wādī ko pār karke pahārī par charh gayā. Jab Sāul se fāsīlā kāfī thā

14 to Dāūd ne fauj aur Abinair ko ūnchī āwāz se pukār kar kahā, “Ai Abinair, kyā āp mujhe jawāb nahīn deṅge?” Abinair pukārā, “Āp kaun haiṅ ki bādshāh ko is tarah kī ūnchī āwāz deṅ?”

15 Dāūd ne tanzan jawāb diyā, “Kyā āp mard nahīn haiṅ? Aur Isrāīl meṅ kaun āp jaisā hai? To phir āp ne apne bādshāh kī sahīh hifāzat kyoṅ na kī jab koī use qatl karne ke lie kaimp meṅ ghus āyā?”

16 Jo āp ne kiyā wuh ṭhīk nahīn hai. Rab kī hayāt kī qasam, āp aur āp ke ādmī sazā-e-maut ke lāyq haiṅ, kyoṅki āp ne apne mālik kī hifāzat na kī, go wuh Rab kā masaḥ kiyā huā bādshāh hai. Kḥud dekh leṅ, jo nezā aur pānī kī surāhī bādshāh ke sar ke pās the wuh kahān haiṅ?”

17 Tab Sāūl ne Dāūd kī āwāz pahchān lī. Wuh pukārā, “Mere beṭe Dāūd, kyā āp kī āwāz hai?”

18 Dāūd ne jawāb diyā, “Jī, bādshāh salāmat. Mere āqā, āp merā tāqqub kyoṅ kar rahe haiṅ? Maiṅ to āp kā kḥādim hūṅ. Maiṅ ne kyā kiyā? Mujh se kyā jurm sarzad huā hai?”

19 Guzārish hai ki merā āqā aur bādshāh apne kḥādim kī bāt sune. Agar Rab ne āp ko mere kḥilāf uksāyā ho to wuh merī ḡhallā kī nazar qabūl kare. Lekin agar insān is ke pīchhe haiṅ to Rab ke sāmne un par lānat! Apnī harkatoṅ se unhoṅ ne mujhe merī maurūsī zamīn se nikāl diyā hai aur natīje meṅ maiṅ Rab kī qaum meṅ nahīn rah saktā. Haqīqat meṅ wuh kah rahe haiṅ, ‘Jāo, dīgar mābūdoṅ kī pūjā karo!’

20 Aisā na ho ki maiṅ watan se aur Rab ke huzūr se dūr mar jāūṅ. Isrāīl kā bādshāh pissū ko dhūṅḍ nikālne ke lie kyoṅ nikal āyā hai? Wuh

to pahāroñ meñ merā shikār tītar ke shikār kī tarah kar rahe haiñ.”

²¹ Tab Sāūl ne iqrār kiyā, “Maiñ ne gunāh kiyā hai. Dāūd mere beṭe, wāpas aeñ. Ab se maiñ āp ko nuqsān pahuñchāne kī koshish nahīñ karūñga, kyoñki āj merī jān āp kī nazar meñ qīmtī thī. Maiñ baṛī bewuqūfī kar gayā hūñ, aur mujh se baṛī ḡhaltī huī hai.”

²² Dāūd ne jawāb meñ kahā, “Bādshāh kā nezā yahāñ mere pās hai. Āp kā koī jawān ā kar use le jāe.

²³ Rab har us shaḡhs ko ajr detā hai jo insāf kartā aur wafādār rahtā hai. Āj Rab ne āp ko mere hawāle kar diyā, lekin maiñ ne us ke masah kie hue bādshāh ko hāth lagāne se inkār kiyā.

²⁴ Aur merī duā hai ki jitnī qīmtī āp kī jān āj merī nazar meñ thī, utnī qīmtī merī jān bhī Rab kī nazar meñ ho. Wuhī mujhe har musibat se bachāe rakhe.”

²⁵ Sāūl ne jawāb diyā, “Mere beṭe Dāūd, Rab āp ko barkat de. Āindā āp ko baṛī kāmyābī hāsil hogī.”

Is ke bād Dāūd ne apnī rāh lī aur Sāūl apne ghar chalā gayā.

27

Dāūd Dubārā Akīs ke pās

¹ Is tajrabe ke bād Dāūd sochne lagā, “Agar maiñ yihīñ ṭhahar jāūñ to kisī din Sāūl mujhe mār ḡalegā. Behtar hai ki apnī hifāzat ke lie Filistiyoñ ke mulk meñ chalā jāūñ. Tab Sāūl pūre

Isrāīl meñ merā khoj lagāne se bāz āegā, aur main mahfūz rahūngā.”

² Chunānche wuh apne 600 ādmiyoñ ko le kar Jāt ke bādshāh Akīs bin Māok ke pās chalā gayā.

³ Un ke khandān sāth the. Dāūd kī do bīwiyañ Akhīnūsam Yazraelī aur Nābāl kī bewā Abījel Karmilī bhī sāth thīn. Akīs ne unheñ Jāt Shahr meñ rahne kī ijāzat dī.

⁴ Jab Sāul ko khabar milī ki Dāūd ne Jāt meñ panāh lī hai to wuh us kā khoj lagāne se bāz āyā.

⁵ Ek din Dāūd ne Akīs se bāt kī, “Agar āp kī nazar-e-karm mujh par hai to mujhe dehāt kī kisī ābādī meñ rahne kī ijāzat deñ. Kyā zarūrat hai ki main yahān āp ke sāth dārul-hukūmat meñ rahūñ?”

⁶ Akīs muttafiq huā. Us din us ne use Siqlāj Shahr de diyā. Yih shahr us waqt se Yahūdāh ke bādshāhoñ kī milkiyat meñ rahā hai.

⁷ Dāūd ek sāl aur chār mahīne Filistī mulk meñ thahrā rahā.

⁸ Siqlāj se Dāūd apne ādmiyoñ ke sāth muḥtalif jaghoñ par hamlā karne ke lie nikaltā rahā. Kabhī wuh Jasūriyoñ par dhāwā bolte, kabhī Jirziyoñ yā Amālīqiyoñ par. Yih qabile qadīm zamāne se Yahūdāh ke junūb meñ Shūr aur Misr kī sarhad tak rahte the.

⁹ Jab bhī koī maqām Dāūd ke qabze meñ ā jātā to wuh kisī bhī mard yā aurat ko zindā na rahne detā lekin bheṛ-bakriyoñ, gāy-bailoñ, gadhoñ, ūñṭoñ aur kaproñ ko apne sāth Siqlāj le jātā.

Jab bhī Dāūd kisī hamle se wāpas ā kar bādshāh Akīs se miltā

¹⁰ to wuh pūchhtā, “Āj āp ne kis par chhāpā mārā?” Phir Dāūd jawāb detā, “Yahūdāh ke junūbī ilāqe par,” yā “Yarahmiyeliyoñ ke junūbī ilāqe par,” yā “Qīniyoñ ke junūbī ilāqe par.”

¹¹ Jab bhī Dāūd kisī ābādī par hamlā kartā to wuh tamām bāshindoñ ko maut ke ghāṭ utār detā aur na mard, na aurat ko zindā chhoṛ kar Jāt lātā. Kyoñki us ne sochā, “Aisā na ho ki Filistiyon ko patā chale ki main asal meñ Isrāīlī ābādīyon par hamlā nahīn kar rahā.”

Jitnā waqt Dāūd ne Filistī mulk meñ guzārā wuh aisā hī kartā rahā.

¹² Akīs ne Dāūd par pūrā bharosā kiyā, kyoñki us ne sochā, “Ab Dāūd ko hameshā tak merī k̄hidmat meñ rahnā paregā, kyoñki aisī harkaton se us kī apnī qaum us se saṅht mutanaffir ho gāi hai.”

28

¹ Un dinoñ meñ Filistī Isrāīl se laṛne ke lie apnī faujeñ jamā karne lage. Akīs ne Dāūd se bhī bāt kī, “Tawaqqo hai ki āp apne faujiyon samet mere sāth mil kar jang ke lie nikleñge.”

² Dāūd ne jawāb diyā, “Zarūr. Ab āp k̄hud dekheñge ki āp kā k̄hādīm kyā karne ke qābil hai!” Akīs bolā, “Thīk hai. Pūrī jang ke daurān āp mere muhāfiz hoñge.”

Sāul Jādūgarnī kī Taraf Rujū Kartā Hai

³ Us waqt Samuel intaqāl kar chukā thā, aur pūre Isrāīl ne us kā mātām karke use us ke ābāī shahr Rāmā meñ dafnāyā thā.

Un dinon meñ Isrāīl meñ murdon se rābitā karne wāle aur ghaibdān nahīn the, kyonki Sāūl ne unheñ pūre mulk se nikāl diyā thā.

⁴ Ab Filistiyon ne apnī lashkargāh Shūnīm ke pās lagāi jabki Sāūl ne tamām Isrāīliyon ko jamā karke Jilbua ke pās apnā kaimp lagāyā.

⁵ Filistiyon kī baṛī fauj dekh kar wuh saḥt dahshat khāne lagā.

⁶ Us ne Rab se hidāyat hāsil karne kī koshish kī, lekin koī jawāb na milā, na khāb, na muqaddas qurā dālne se aur na nabiyon kī mārifat.

⁷ Tab Sāūl ne apne mulāzimon ko hukm diyā, “Mere lie murdon se rābitā karne wālī dhūṇḍo tāki main jā kar us se mālūmāt hāsil kar lūn.” Mulāzimon ne jawāb diyā, “Ain-dor meñ aisi aurat hai.”

⁸ Sāūl bhes badal kar do ādmiyon ke sāth Aindor ke lie rawānā huā.

Rāt ke waqt wuh jādūgarnī ke pās pahuñch gayā aur bolā, “Murdon se rābitā karke us rūh ko Pātāl se bulā deñ jis kā nām main āp ko batātā hūñ.”

⁹ Jādūgarnī ne etarāz kiyā, “Kyā āp mujhe marwānā chāhte haiñ? Āp ko patā hai ki Sāūl ne tamām ghaibdānon aur murdon se rābitā karne wālon ko mulk meñ se miṭā diyā hai. Āp mujhe kyon phānsānā chāhte haiñ?”

¹⁰ Tab Sāūl ne kahā, “Rab kī hayāt kī qasam, āp ko yih karne ke lie sazā nahīn milegī.”

¹¹ Aurat ne pūchhā, “Main kis ko bulāūn?” Sāūl ne jawāb diyā, “Samuel ko bulā deñ.”

¹² Jab Samuel aurat ko nazar āyā to wuh chīkh uṭhī, “Āp ne mujhe kyon dhokā diyā? Āp to Sāūl

haiñ!”

¹³ Sāul ne use tasallī de kar kahā, “Dareñ mat. Batāeñ to sahi, kyā dekh rahī haiñ?” Aurat ne jawāb diyā, “Mujhe ek rūh nazar ā rahī hai jo chaṛhtī chaṛhtī zamīn meñ se nikal kar ā rahī hai.”

¹⁴ Sāul ne pūchhā, “Us kī shakl-o-sūrat kaisī hai?” Jādūgarnī ne kahā, “Choḡhe meñ liptā huā būrhā ādmī hai.”

Yih sun kar Sāul ne jān liyā ki Samuel hī hai. Wuh muñh ke bal zamīn par jhuk gayā.

¹⁵ Samuel bolā, “Tū ne mujhe Pātāl se bulwā kar kyon muztarib kar diyā hai?” Sāul ne jawāb diyā, “Main baṛī musibat meñ hūñ. Filistī mujh se laṛ rahe haiñ, aur Allāh ne mujhe tark kar diyā hai. Na wuh nabiyon kī mārifat mujhe hidāyat detā hai, na khāb ke zariye. Is lie main ne āp ko bulwāyā hai tāki āp mujhe batāeñ ki main kyā karūñ.”

¹⁶ Lekin Samuel ne kahā, “Rab khud hī tujhe chhoṛ kar terā dushman ban gayā hai to phir mujh se dariyāft karne kā kyā fāydā hai?”

¹⁷ Rab is waqt tere sāth wuh kuchh kar rahā hai jis kī peshgoī us ne merī mārifat kī thī. Us ne tere hāth se bādshāhī chhīn kar kisī aur yānī Dāūd ko de dī hai.

¹⁸ Jab Rab ne tujhe Amālīqiyon par us kā saḡht ḡhazab nāzil karne kā hukm diyā thā to tū ne us kī na sunī. Ab tujhe is kī sazā bhugatnī paṛegī.

¹⁹ Rab tujhe Isrāil samet Filistiyon ke hawāle kar degā. Kal hī tū aur tere beṭe yahān mere pās pahuñcheṅge. Rab terī pūrī fauj bhī Filistiyon ke qabze meñ kar degā.”

²⁰ Yih sun kar Sāūl sakht ghabrā gayā, aur wuh gir kar zamīn par darāz ho gayā. Jism kī pūrī tāqat khatm ho gayā thī, kyonki us ne pichhle pūre din aur rāt rozā rakhā thā.

²¹ Jab jādūgarnī ne Sāūl ke pās jā kar dekhā ki us ke rongte khare ho gae haiñ to us ne kahā, “Janāb, main ne āp kā hukm mān kar apnī jān khatre meñ dāl di.

²² Ab zarā merī bhī sunen. Mujhe ijāzat den ki main āp ko kuchh khānā khilāūñ tāki āp taqwiyat pā kar wāpas jā sakeñ.”

²³ Lekin Sāūl ne inkār kiyā, “Main kuchh nahīn khāūngā.” Tab us ke ādmiyon ne aurat ke sāth mil kar use bahut samjhāyā, aur ākhirkar us ne un kī sunī. Wuh zamīn se uṭh kar chārpāi par baiṭh gayā.

²⁴ Jādūgarnī ke pās moṭā-tāzā bachhrā thā. Use us ne jaldī se zabah karwā kar taiyār kiyā. Us ne kuchh āṭā bhī le kar gūndhā aur us se beḱhamīrī roṭī banāi.

²⁵ Phir us ne khānā Sāūl aur us ke mulāzimon ke sāmne rakh diyā, aur unhoñ ne khāyā. Phir wuh usī rāt dubārā rawānā ho gae.

29

Filistī Dāūd par Shak Karte Haiñ

¹ Filistiyon ne apnī faujon ko Afīq ke pās jamā kiyā, jabki Isrāīliyon kī lashkargāh Yazrael ke chashme ke pās thī.

² Filistī sardār jang ke lie nikalne lage. Un ke pichhe sau sau aur hazār hazār sipāhiyon ke

guroh ho lie. Ākhir meñ Dāūd aur us ke ādmī bhī Akīs ke sāth chalne lage.

³ Yih dekh kar Filistī kamāndaron ne pūchhā, “Yih Isrāīlī kyon sāth jā rahe haiñ?” Akīs ne jawāb diyā, “Yih Dāūd hai, jo pahle Isrāīlī bādshāh Sāūl kā faujī afsar thā aur ab kāfī der se mere sāth hai. Jab se wuh Sāūl ko chhoṛ kar mere pās āyā hai maiñ ne us meñ aib nahīn dekhā.”

⁴ Lekin Filistī kamāndar ḡhusse se bole, “Use us shahr wāpas bhej deñ jo āp ne us ke lie muqarrar kiyā hai! Kahīn aisā na ho ki wuh hamāre sāth nikal kar achānak ham par hī hamlā kar de. Kyā apne mālik se sulah karāne kā koī behtar tarīqā hai ki wuh apne mālik ko hamāre kaṭe hue sar pesh kare?”

⁵ Kyā yih wuhī Dāūd nahīn jis ke bāre meñ Isrāīlī nāchte hue gāte the, ‘Sāūl ne hazār halāk kie jabki Dāūd ne das hazār?’”

⁶ Chunānche Akīs ne Dāūd ko bulā kar kahā, “Rab kī hayāt kī qasam, āp diyānatdār haiñ, aur merī khāhish thī ki āp Isrāīl se larne ke lie mere sāth nikleñ, kyonki jab se āp merī khidmat karne lage haiñ maiñ ne āp meñ aib nahīn dekhā. Lekin afsos, āp sardāron ko pasand nahīn haiñ.

⁷ Is lie mehrbānī karke salāmatī se lauṭ jāeñ aur kuchh na kareñ jo unheñ burā lage.”

⁸ Dāūd ne pūchhā, “Mujh se kyā ḡhaltī huī hai? Kyā āp ne us din se mujh meñ nuqs pāyā hai jab se maiñ āp kī khidmat karne lagā hūñ? Maiñ apne mālik aur bādshāh ke dushmanon se larne ke lie kyon nahīn nikal saktā?”

9 Akīs ne jawāb diyā, “Mere nazdīk to āp Allāh ke farishte jaise achchhe haiñ. Lekin Filistī kamāñdar is bāt par bazid haiñ ki āp Isrāīl se larne ke lie hamāre sāth na nikleñ.

10 Chunāñche kal subah-sawere uṭh kar apne ādmiyoñ ke sāth rawānā ho jānā. Jab din charhe to der na karnā balki jaldī se apne ghar chale jānā.”

11 Dāūd aur us ke ādmiyoñ ne aisā hī kiyā. Agle din wuh subah-sawere uṭh kar Filistī mulk meñ wāpas chale gae jabki Filistī Yazrael ke lie rawānā hue.

30

Siqḷāj kī Tabāhī aur Dāūd kā Badlā

1 Tisre din jab Dāūd Siqḷāj pahuñchā to dekhā ki shahr kā satyānās ho gayā hai. Un kī ḡhairmaujūdagi meñ Amālīqiyōñ ne Dasht-e-Najab meñ ā kar Siqḷāj par bhī hamlā kiyā thā. Shahr ko jalā kar

2 wuh tamām bāshindoñ ko chhoṭoñ se le kar baṛoñ tak apne sāth le gae the. Lekin koī halāk nahīn huā thā balki wuh sab ko apne sāth le gae the.

3 Chunāñche jab Dāūd aur us ke ādmī wāpas āe to dekhā ki shahr bhasm ho gayā hai aur tamām bāl-bachche chhin gae haiñ.

4 Wuh phūṭ phūṭ kar rone lage, itne roe ki aḡhirkār rone kī sakat hī na rahī.

5 Dāūd kī do bīwiyōñ Aḡhinūsam Yazraelī aur Abījel Karmilī ko bhī asīr kar liyā gayā thā.

6 Dāūd kī jān baṛe ḡhatre meñ ā gāī, kyoñki us ke mard ḡham ke māre āpas meñ use sangsār

karne kī bāteñ karne lage. Kyoñki beṭe-beṭiyon ke chhin jāne ke bāis sab saḡht ranjīdā the. Lekin Dāūd ne Rab apne Ḳhudā meñ panāh le kar taqwiyat pāi.

⁷ Us ne Abiyātar bin Aḳhīmalik ko hukm diyā, “Qurā ḡālne ke lie imām kā bālāposh le āeñ.” Jab imām bālāposh le āyā

⁸ to Dāūd ne Rab se dariyāft kiyā, “Kyā main luṭeron kā tāqqub karūñ? Kyā main un ko jā lūngā?” Rab ne jawāb diyā, “Un kā tāqqub kar! Tū na sirf unheñ jā legā balki apne logon ko bachā bhī legā.”

⁹⁻¹⁰ Tab Dāūd apne 600 mardon ke sāth rawānā huā. Chalthe chalthe wuh Basor Nadī ke pās pahuñch gae. 200 afrād itne niḡhāl ho gae the ki wuh wahīñ ruk gae. Bāqī 400 mard nadī ko pār karke āge baṛhe.

¹¹ Rāste meñ unheñ khule maidān meñ ek Misrī ādmī milā aur use Dāūd ke pās lā kar kuchh pāñī pilāyā aur kuchh roṭī,

¹² anjīr kī ṭikkī kā ṭukrā aur kishmish kī do ṭikkiyāñ khilāñ. Tab us kī jān meñ jān ā gaī. Use tīn din aur rāt se na khānā, na pāñī milā thā.

¹³ Dāūd ne pūchhā, “Tumhārā mālik kaun hai, aur tum kahāñ ke ho?” Us ne jawāb diyā, “Main Misrī ḡhulām hūñ, aur ek Amālīqī merā mālik hai. Jab main safr ke daurān bīmār ho gayā to us ne mujhe yahāñ chhoṛ diyā. Ab main tīn din se yahāñ paṛā hūñ.

¹⁴ Pahle ham ne Karetiyon yāñī Filistiyon ke junūbī ilāqe aur phir Yahūdāh ke ilāqe par hamlā kiyā thā, ḳhāskar Yahūdāh ke junūbī

hisse par jahān Kālib kī aulād ābād hai. Shahr Siqlāj ko ham ne bhasm kar diyā thā.”

15 Dāūd ne sawāl kiyā, “Kyā tum mujhe batā sakte ho ki yih luṭere kis taraf gae haiñ?” Misrī ne jawāb diyā, “Pahle Allāh kī qasam khā kar wādā kareñ ki āp mujhe na halāk kareñge, na mere mālik ke hawāle kareñge. Phir main āp ko un ke pās le jāūngā.”

16 Chunāñche wuh Dāūd ko Amālīqī luṭeron ke pās le gayā. Jab wahāñ pahuñche to dekhā ki Amālīqī idhar-udhar bikhre hue baṛā jashn manā rahe haiñ. Wuh har taraf khānā khāte aur mai pīte hue nazar ā rahe the, kyonki jo māl unhoñ ne Filistiyon aur Yahūdāh ke ilāqe se luṭ liyā thā wuh bahut zyādā thā.

17 Subah-sawere jab abhī thoṛī raushnī thī Dāūd ne un par hamlā kiyā. Larṭe larṭe agle din kī shām ho gaī. Dushman hār gayā aur sab ke sab halāk hue. Sirf 400 jawān bach gae jo ūñṭon par sawār ho kar farār ho gae.

18 Dāūd ne sab kuchh chhuṛā liyā jo Amālīqiyon ne luṭ liyā thā. Us kī do bīwiyāñ bhī sahīh-salāmat mil gaīñ.

19 Na bachchā na buzurg, na beṭā na beṭī, na māl yā koī aur luṭī huī chīz rahī jo Dāūd wāpas na lāyā.

20 Amālīqiyon ke gāy-bail aur bher-bakriyāñ Dāūd kā hissā ban gaīñ, aur us ke logon ne unheñ apne rewaron ke āge āge hāñk kar kahā, “Yih luṭe hue māl meñ se Dāūd kā hissā hai.”

21 Jab Dāūd apne ādmiyoñ ke sāth wāpas ā rahā thā to jo 200 ādmī niḍhāl hone ke bāis Basor Nadī se āge na jā sake wuh bhī un se ā mile. Dāūd ne salām karke un kā hāl pūchhā.

22 Lekin bāqī ādmiyoñ meñ kuchh sharārati log buṛbuṛāne lage, “Yih hamāre sāth larne ke lie āge na nikle, is lie inheñ lūṭe hue māl kā hissā pāne kā haq nahīn. Bas wuh apne bāl-bachchoñ ko le kar chale jāeñ.”

23 Lekin Dāūd ne inkār kiyā. “Nahīn, mere bhāiyo, aisā mat karnā! Yih sab kuchh Rab kī taraf se hai. Usī ne hameñ mahfūz rakh kar hamlā-āwar luṭeroñ par fatah baḅshī.

24 To phir ham āp kī bāt kis tarah māneñ? Jo pīchhe rah kar sāmān kī hifāzat kar rahā thā use bhī utnā hī milegā jitnā ki use jo dushman se larne gayā thā. Ham yih sab kuchh barābar barābar taqsīm kareñge.”

25 Us waqt se yih usūl ban gayā. Dāūd ne ise Isrāīlī qānūn kā hissā banā diyā jo āj tak jāri hai.

26 Siqlāj wāpas pahuñchne par Dāūd ne lūṭe hue māl kā ek hissā Yahūdāh ke buzurgoñ ke pās bhej diyā jo us ke dost the. Sāth sāth us ne paighām bhejā, “Āp ke lie yih tohfā Rab ke dushmanoñ se lūṭ liyā gayā hai.”

27 Yih tohfe us ne zail ke shahroñ meñ bhej die: Baitel, Rāmāt-najab, Yattīr,

28 Aroīr, Sifmot, Istimua,

29-31 Rakal, Hurmā, Bor-asān, Atāq aur Habrūn. Is ke alāwā us ne tohfe Yarahmiyeliyoñ, Qīniyoñ aur bāqī un tamām shahroñ ko bhej die jin meñ wuh kabhī ṭhahrā thā.

31

Sāul aur Us ke Beṭoṅ kā Anjām

¹ Itne meṅ Filistiyōṅ aur Isrāīliyoṅ ke darmiyān jang chhiṛ gaī thī. Laṛte laṛte Isrāīlī farār hone lage, lekin bahut-se log Jilbua ke pahārī silsile par shahīd ho gae.

² Phir Filistī Sāul aur us ke beṭoṅ Yūnatan, Abīnadāb aur Malkīshua ke pās jā pahuṅche. Tīnoṅ beṭe halāk ho gae

³ Jabki laṛāī Sāul ke irdgird urūj tak pahuṅch gaī. Phir wuh tīrandāzoṅ kā nishānā ban kar burī tarah zaḳhmī ho gayā.

⁴ Us ne apne silāhbardār ko hukm diyā, “Apnī talwār miyān se khīnch kar mujhe mār dāl, warnā yih nāmaḳhtūn mujhe chhed kar be'izzat kareṅge.” Lekin silāhbardār ne inkār kiyā, kyoṅki wuh bahut ḍarā huā thā. Āḳhir meṅ Sāul apnī talwār le kar ḳhud us par gir gayā.

⁵ Jab silāhbardār ne dekhā ki merā mālik mar gayā hai to wuh bhī apnī talwār par gir kar mar gayā.

⁶ Yoṅ us din Sāul, us ke tīn beṭe, us kā silāhbardār aur us ke tamām ādmī halāk ho gae.

⁷ Jab Maidān-e-Yazrael ke pār aur Dariyā-e-Yardan ke pār rahne wāle Isrāīliyoṅ ko ḳhabar milī ki Isrāīlī fauj bhāg gaī aur Sāul apne beṭoṅ samet mārā gayā hai to wuh apne shahroṅ ko chhoṛ kar bhāg nikle, aur Filistī chhoṛe hue shahroṅ par qabzā karke un meṅ basne lage.

⁸ Agle din Filistī lāshoṅ ko lūṭne ke lie dubārā maidān-e-jang meṅ ā gae. Jab unheṅ Jilbua ke

pahārī silsile par Sāul aur us ke tīnoñ beṭe murdā mile

⁹ to unhoñ ne Sāul kā sar kāt kar us kā zirābaktar utār liyā aur qāsidoñ ko apne pūre mulk meñ bhej kar apne butoñ ke mandir meñ aur apnī qaum ko fatah kī ittalā dī.

¹⁰ Sāul kā zirābaktar unhoñ ne Astārāt Dewī ke mandir meñ mahfūz kar liyā aur us kī lāsh ko Bait-shān kī fasīl se laṭkā diyā.

¹¹ Jab Yabīs-jiliyād ke bāshindoñ ko ḳhabar milī ki Filistiyon ne Sāul kī lāsh ke sāth kyā kuchh kiyā hai

¹² to shahr ke tamām laṛne ke qābil ādmī Bait-shān ke lie rawānā hue. Pūrī rāt chalte hue wuḥ shahr ke pās pahuñch gae. Sāul aur us ke beṭoñ kī lāshoñ ko fasīl se utār kar wuḥ unheñ Yabīs ko le gae. Wahāñ unhoñ ne lāshoñ ko bhasm kar diyā

¹³ aur bachī huī haḍḍiyon ko shahr meñ jhāū ke daraḳht ke sāye meñ dafnāyā. Unhoñ ne rozā rakh kar pūre hafte tak un kā mātam kiyā.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

PDF generated using Haiola and XeLaTeX on 15 May 2025 from source files dated 15 May 2025

123ff8cb-27b3-5817-a02a-22e67145fd30